

JOS BLONG JISAS KRAES BLONG OL LATA-DEI SENT • EPRIL 2013

Lahona

**Jisas Kraes: Ridima mo
Eksampol, ol pej 18, 26**

Oi Fren Oli Oi Pipol We . . . , p. 52

Yu Bin Konvet? Oi 10 Wei blong Save, p. 56

**Stap Tokbaot Oi Tempol wetem Oi
Pikinini blong Yu, ol pej 62, 64**



*"Laet blong
Kraes hem
i tabu paoa
o filing we
i kam long
God tru long
Jisas Kraes.
I givim laet
mo laef long
evri samting."*

Elda Rijad G. Skot blong
Kworom blong Olgeta
Twelaf Aposol, "Pis blong
Save Wanem I Raet mo
Rong mo Pis long Maen,"
Liahona, Nov. 2004, 15.



OL MESEJ

- 4 Fas Presidensi Mesej:
Hem I Girap Bakegen
long Ded**
I Kam long Presiden Henri B. Aering
- 7 Visiting Tijing Mesej:
Ol Tempol Kavenan**

OL SPESEL STORI

- 12 Ded mo Laef: Lukluk blong
Paeonia long Laef Bakegen
long Ded**
*Ol Paeonia mo ol eli profet oli
testifae abaot kasem hop tru
laef bakegen long ded.*

LONG KOVA

Long fored: Foto pikja i kam long Tim Tagat
© IRI. Long Bak: Foto Pikja i kam long Matiu
Raea. Insaed long fored blong kova: Foto i
kam long Kristin Sumska.

18 Misin mo Ministri blong Jisas Kraes

I Kam long Elda Rasel M. Nelson
*Yumi save folem 5 samting long
laef blong Sevya taem yumi lu-
kaotem blong folem Hem mo an-
dastanem Atonmen blong Hem.*

26 Wik blong Ista

*Long las wik blong laef blong
Hem, Sevya i bin mekem wan
merikel we i bigwan moa bitim
evri merikel.*

30 Stap Helpem Ol Pikinini blong Rere blong Kasem Baptae


I Kam long Jesika Larsen
mo Marisa Widison
*Wanem nao ol papa mo mama
oli save mekem blong mekem
se baptaes blong pikinini blong
olgeta i gat moa mining?*

34 Go Kolosap long Tempol

I Kam long Elda Jairo Masagardi
*Lanem olsem wanem tempol
i save help blong statem fasin
blong jenism laef.*

OL DIPATMEN

- 8 Epril Konfrens Notbuk:
Stap Stadi Ol Toktok
blong Konfrens Tugeta**
I Kam long Greg Bati
- 9 Tijing Blong Ol Yut Oli
Kam Strong: Olsem
Wanem I Impoten blong
Gat Ol Gud Fren**
- 10 Wanem Yumi Bilivim: Tabu
Spirit I Givim Kamfot, I Givim
Inspiresen, mo I Testifae**
- 36 Ol Voes blong Ol Lata-dei Sent**
- 74 Ol Nius blong Jos**
- 80 Kasem Taem Yumi Mit
Bakegen: Stap Drink
Aot long Wel**
I Kam long Aron L. Wes



40

**40 Stap Jusum Pat
la we I Moa Gud**

I Kam long Matiu D. Fliton

*Blong hem i komitim hem fulwan
long gospel blong Jisas Kraes,
Soltan i mas lego sam gudfala
samting i go.*

52



42 Oi Kwestin mo Ansa

*"Olsem wanem nao bae mi eks-
plenem long fren blong mi se fasin
blong brekem loa blong fastiti i no
wan gudfala tingting nating?"*

**44 Olsem Wanem blong Wok
long Ol Prishud Koling**

I Kam long Presiden
Tomas S. Monson

*Lanem ki blong go kasem, tijim,
mo tajem ol laef blong olgeta we
yu stap givim seves long olgeta.*

45 Spes blong Yumi

**46 From Wanem Yumi Nidim
Buk blong Momon**

*Fo risen from wanem i nid blong
gat Buk blong Momon.*

**48 Gro long Gudfala Graon:
Fetful Yut long Yuganda**

I Kam long Sindi Smit

*Oi yang man mo yang woman
ia oli kam strong moa tru long
ol sakrifaes we oli mekem blong
gospel ia.*

**52 Blong Oi Yut Oli Kam Strong:
Wanem la Wan Tru Fren?**

I Kam long Ilein S. Dalton

**54 Olsem Wanem Nao Mi Save:
Invitesen blong Mi blong Ka-
sem Fasin blong Sevem Man**

I Kam long Emeson Jose da Silva

*Taem long en mi akseptem invi-
tesen blong fren blong mi, mi bin
save se mi bin faenem wan impo-
ten samting.*

**56 Oi Ten Wei blong Save
se Yu Bin Konvet**

I Kam long Teila Orton

*Wanem mi bin lanem abaot fasin
blong jenism laef, i helpem mi
folemap progres blong mi insaed
long gospel.*

**59 Posta: Had Wok I
Gud mo I Nidim**

*Luk sapos yu save faenem
Liahona we oli haedem
insaed long isu ia. Klu:
Yusum spesel ae blong yu.*



61

**60 Smol Misinari blong
Apuwoman Deni**

I Kam long Emilia Maria
Gimaraes Korea

*Lav blong Vito long gospel i bin
wan laet long fasin blong apuwo-
man blong hem i jenism laef.*

**61 Spesel Witnes: From Wanem
Jos I Gat Wan Longfala Nem?**

I Kam long Elda M. Rasel Balad

62 Stap Selebretem Oi Tempol!

I Kam long Darsi Jensen

*Long evri ples long wol, ol pikinini
oli stap selebret blong gat wan
tempol kolosap olgeta.*

**64 Oi Kwestin mo Ansa long
saed blong Tempol**

*Ol ansa long ol kwestin olsem,
From wanem yumi gat ol tempol?
Wanem i stap hapan insaed long
ol tempol?*

**65 Miusik: Famle I Stap
Tugeta Foreva**

I Kam Rut Muir Gadna
mo Vanja Y. Watkins

**66 Tekem Praemer I Go Hom: Jisas
Kraes I Bin Putumbak Jos blong
Hem long Oi Las Dei ia**

**68 Folem Rod: Ples we Jos
I Bin Oganaes long Hem**

I Kam long Jan Pinboro

70 Blong Oi Yang Pikinini

**81 Pikja blong Profet:
Wilfod Wudrof**

EPRIL 2013 VOL. 7 NO. 1

LIAHONA 10784 852

Ofisol intanasonol magasin blong Jos blong Jisas Kraes blong Ol Lata-dei Sent

Fas Presidens: Tomas S. Monson, Henri B. Aering, Dita F. Ukdof

Kwromblong Olgeta Twelef Apostol:

Boed K. Peka, L. Tom Peri, Rasel M. Nelson, Dalin H. Oks, M. Rasel Balad, Rijad G. Skot, Robert D. Hels, Jefri R. Holan, Deved A. Bedna, Kwentin L. Luk, D. Tod Kristofeson, Nil L. Andasen

Edita: Kreg A. Kadon

Ol Advaesa: Sein M. Bowen, Bradli D. Fosta, Kristofel golden Junia, Antoni D. Pekins

Manejing Daerekta: Deved T. Wona

Daerekta blong Famle mo Memba Sapot:

Vinsen A. Vogen

Daerekta blong Ol Jos Magasin: Alan R. Loeboj

Bisnis maneja: Gaf Kanon

Manejing Edita: R. Val Jonson

Asisten Manejing Edita: LaRen Pota Gont,

Pablikesen Asisten: Melisa Senteno

Raeting mo Editing Tim: Susan Baret, Raeyan Kar, Deved Dikson, Deved A. Edwods, Matiu D. Fliton, Mindi Rei Fraedman, Lori Fula, Geri H. Gaf, Jenifa Gres Jons, Hikari Loftes, Maekel R. Moris, Rijad M. Romni, Pol VanDenBeg, Julia Wudberi

Manejing Art Daerekta: J. Skot Knudsen

Art Daerekta: Tad R. Piteson

Senia Disaena: Janet Andrus, Fei P. Andrus, C. Kimbol Bot, Tomas Jael, Keri Lin C. Herin, Kolin Hinkli, Erik P. Jonsen, Skot M. Moi, Brad Teri

Intellectual Propeti Kodineta: Kolet Nebeker One

Prodaksen Maneja: Jein An Pita

Prodaksen Tim: Koni Boutopli Bridj, Hawod G. Braon, Juli Bedet, Braean W. Gigi, Katlin Hawod, Denis Kerbi, Jini J. Nilson, Tae Pilja, Geli Tate Rafeti

Pripres: Jeft L. Martin

Printing Daerekta: Kreg K. Sejwuk

Distribusen Daerekta: Ivan Larsen

Blong kasem kopi blong magasin mo ol praes aotsaed long Yunaeted Stet mo Kanada, kontaktem lokol Jos distribusen senta o wod o branji lida blong yu.

Sendem ol smol storian we yu raetem mo ol

kwestin i go long *Liahona*, Room 2420, 50 E. North Temple St., Salt Lake City, UT 84150-0024, USA; o imel long: liahona@ldschurch.org.

Liahona (long Buk blong Momon hem i minim "kampas" o "soem rod") oli publisim long lanwis blong Albania, Amenia, Bulgaria, Kambodia, Seubano, Jaena, Kroesia, Tsek, Danis, Datj, Inglis, Estonia, Fiji, Finis, Franis, Jemani, Grik, Hungaria, Aeslan, Indonesia, Italia, Japan, Kiribati, Koria, Latvia, Lithuania, Malagasi, Marsal, Mongolia, Norwe, Polan, Portugal, Romania, Rasia, Samoa, Slovenia, Spen, Swahili, Swiden, Talalog, Tahiti, Tai, Tonga, Ukrein, Urdu, Vanuatu mo Vietnam. (Namba blong magasin long wan yia i jenis folem ol lanwis.)

© 2013 i kam long Intellectual Reserve, Inc. Oli holem evri raet. Oli printini long Yunaeted Stet blong Amerika.

Stori mo pikja long *Liahona* oli save mekem kopi blong yusum long ol samting blong no winim mane, long jos o long hor. Sam long ol pikja ia bae oli no save mekem kopi long olgeta sapos i gat tabu long hem long kredit laen wetem artwok. Ol kwestin blong kopi raet oli sud raetem i go long Intellectual Property Office, 50 E. North Temple St., Salt Lake City, UT 84150, USA; imel: cor-intellectualproperty@ldschurch.org.

For Readers in the United States and Canada:

April 2013 Vol. 7 No. 1. LIAHONA (USPS 311-480) Bislama (ISSN 1938-6346) is published two times a year (April and October) by The Church of Jesus Christ of Latter-day Saints, 50 E. North Temple St., Salt Lake City, UT 84150. USA subscription price is \$10.00 per year; Canada \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Sam Tingting blong Famle Haos Naet

Liahona ia i gat ol stori mo aktiviti we yu save yusum long famle haos naet. Olgeta ia oli sam long ol eksampol.



FOTO PIKIA I KAM LONG KODI BEL © RI

"Misin mo Ministri blong Jisas Kraes,"

pej 18: Elda Rasel M. Nelson i serem faef samting abaot laef blong Jisas Kraes we yumi save folem. Gat tingting ia blong toktokraon long ol fo samting ia mo olsem wanem blong yusum olgeta long laef blong yu. Ating bae yu wantem blong ridim wan skripja stori abaot laef blong Sevya o luk wan Baebol vidio (biblevideos.lds.org) we i tokbaot wan long ol faef samting ia. Ating bae yu wantem endem wetem wan testemoni abaot laef mo ministri blong Hem mo singsing "More Holiness Give Me" (*Hymns*, no. 131).

"Wanem la Wan Tru Fren?" pej 52: Ating bae yu wantem blong stat mo askem, wanem ia wan tru fren? Ridim mining we

Elda Robet D. Hels i givim mo toktokraon long wanem kaen fren nao yumi mas kam. Gat tingting ia blong talem wan eksperiens blong wan taem, taem wan i bin stap olsem wan tru fren long yu, mo tokbaot ol fasin we i save helpem ol memba blong famle i kam ol moa gud fren long ol narafala man.

"Stap Selebretem Ol Tempol!"

Wetem famle blong yu, lukluk long ol pikja long ol defren wei we ol pikinini oli bin stap selebretem tempol. Gat tingting ia blong soem wan pikja blong tempol we i kolosap long yu mo stap talem from wanem ol tempol oli impoten. Talemaot strong se long tempol nomo ol famle oli save sil. Ating bae yu wantem blong en wetem singsing "Famle I Stap Tugeta Foreva" (pej 65).

LONG LANWIS BLONG YU

Liahonamo ol nara tul blong Jos oli stap long plante lanwis long www.languages.lds.org.

OL TOPIK INSAED LONG MAGASIN IA

Ol namba oli ripresentem fas pej blong stori ta.

Atonmen, 18, 26, 45

Baptaes, 30

Buk blong Momon, 46

Ded, 4, 12, 39

Eksampol, 48

Famle, 30, 65

Fasin blong Goherd Strong, 59

Fasin blong Jenism Laef, 34, 54, 56, 60

Fasin blong stap obej, 40, 42, 56

Fet, 48

Frensip, 9, 52, 54

Glad, 37

Hop, 12

Insperesen, 36, 38

Jastiti, 42

Jeneral konfrens, 8, 37

Jisas Kraes, 4, 18, 26

Jos oganaesesen, 61

Laef Bakegen long Ded, 4, 12, 26

Misinari wok, 34, 39, 48, 52, 54, 60

Ol Kavenan, 7

Ol Odinens, 18

Ol samting we oli kam faswan, 40

Ol Standet, 42, 45

Ol Tempol, 34, 62

Prea, 18, 45

Prishud, 44

Restoresen, 66

Revelesen, 10, 46

Sakramen, 18

Sakrifaes, 40

Seves, 44, 70

Smit, Josef, 66

Tabu Spirit, 10, 36

Tempol wok, 7, 64, 38, 65, 80

Tijing, 8, 9, 30

Wudrof, Wilfod, 81



I Kam long Presiden
Henri B. Aering

Fas Kaonsela long
Fas Presidensi

Hem I Girap Bakegen long Ded

Wan testemoni abaot trutok ia blong Laef Bakegen long Ded blong Jisas Kraes i wan stamba blong, tugeta, hop mo strong tingting. Mo i save olsem wetem evri pikinini blong God. Hem i bin olsem long mi long wan dei blong sama long Jun 1969 taem we mama blong mi i bin ded, mo i bin olsem long mi blong plante yia, mo bae i olsem kasem we mi save luk hem bakegen.

Fasin blong stap hapi i riplesem sore we yumi harem from smol taem we i seperetem yumi long olgeta we oli ded. Hem i moa long wan hop blong wan hapi kam tugeta. From se Lod i bin soemaot mo talemaot plante samting tru ol profet blong Hem, mo from Tabu Spirit i bin konfemem trutok blong Laef Bakegen long Ded long mi, mi save luk long maen blong mi se bae i olsem wanem blong kam tugeta wetem olgeta we yumi lavem we oli bin laef bakegen long ded mo oli kam tabu:

Olgeta ia, oli olgeta we bambae oli girap long laef bakegen long ded blong ol stret man. . . .

Olgeta ia, oli olgeta we nem blong olgeta, oli raetem long heven, ples we God mo Kraes oli jaj blong evri man.

Olgeta ia, oli olgeta we oli ol stret man we oli kam stret gud evriwan tru long Jisas, we i man blong toktok from niu kavenan, we i tekem i kam atonmen ia we i stret gud evriwan tru long blad blong hem we i ron (Luk long D&C 76:65, 68–69).

From se Jisas Kraes i bin brekem ol rop blong ded, evri pikinini blong Papa long Heven we i bon i kam long wol bae oli girap bakegen long ded insaed long wan bodi we bae i neva save ded. So testemoni blong mi mo yu abaot trutok ia we i gat glori i save karemaot sting blong ol famle memba o fren blong yumi we yumi lavem we oli ded finis wetem wan bigfala glad mo wan strong tingting.

Lod i bin givim long yumi evriwan presen blong laef bakegen long ded, long taem we ol spirit blong yumi i joen bakegen wetem ol bodi we oli klin aot long evri samting we i no stret (luk long Alma 11:42–44). Mama blong mi



bae i kam yang mo naes, ol taem blong olfala mo ol yia blong ol harem nogud bae i nomo gat. Hemia bae i kam long hem mo long yumi olsem wan presen.

Be olgeta long yumi we oli wantem stap wetem hem blong oltaem, oli mas mekem ol joes blong kwalifae from rilesensip ia, blong stap long ples we Papa mo Pikinini blong Hem we Hem i lavem tumas mo i laef bakegen long ded, tufala i stap long hem long glori. Hemia i wan ples ia nomo we famle laef i save gohed blong taem we i no save finis. Wan testemoni blong trutok ia i mekem strong tingting blong mi i kam antap blong mi mas kwalifae mo olgeta we mi lavem oli mas kwalifae blong kasem hae digri blong celestial kingdom tru long Atonmen blong Jisas Kraes we i stap wok long laef blong yumi (luk long D&C 76:70).

Lod i givim long yumi wan gaed long rod ia blong lukaotem laef we i no save finis tru long ol sakramen prea we i helpem mi mo i save helpem yu. Oli invaetem yumi blong riniu ol kavenan blong yumi blong baptaes long evri sakramen miting.

Yumi promes blong oltaem tingbaot Sevya. Ol simbol blong sakrifae blong Hem i helpem yumi blong talem tangkyu from hae praes we Hem i bin pem blong brekem ol rop blong ded, blong givim yumi sore, mo givim fogivnes from evri sin blong yumi sapos yumi jusum blong sakem sin.

Yumi promes blong kipim ol komanmen blong Hem. Taem yumi ridim ol skripja mo ol toktok blong ol profet we oli stap laef tedei mo stap lisin long ol spika we oli kasem insperesen long ol sakramen miting blong yumi, i mekem yumi tingbaot bakegen long ol kavenan blong mekem olsem. Tabu Spirit i tekem i kam long ol maen mo hat blong yumi ol komanmen we yumi nidim moa blong kipim long dei ia.

Insaed long ol prea blong sakramen, God i promes blong sendem Tabu Spirit blong i stap wetem yumi (luk long Moronae 4:3, 5:2; D&C 20:77, 79). Mi bin faenem long taem ia se God i save givim long mi wanem we i olsem wan intaviu blong miwan. Hem i mekem mi save wanem



nao mi bin mekem we Hem i laekem, nid blong mi blong sakem sin mo fasin blong fogiv, mo ol nem mo ol fes blong pipol we Hem i gat blong mi givim seves long olgeta long bihaf blong Hem.

Truaot ol yia, eksperiens ia, we i bin ripit, i tanem hop i kam long ol filing blong jariti mo

i givim wan filing blong mi save stret se sore i stap oltaem blong mi tru long Atonmen mo Laef Bakegen long ded blong Sevya.

Mi testifae se Jisas i Kraes ia we i bin girap bakegen, Sevya blong yumi, mo eksampol blong yumi we i stret evriwan mo gaed blong go long laef we i no save finis. ■

YUSUM MESEJ IA BLONG TIJ

Yumi mas yusum evri skripja long laef blong yumi, blong hem i save stap blong helpem mo lanem yumi (1 Nifae 19:23). Gat tingting ia blong ridim ol sakramen prea, we oli stap long Doctrine and Covenants 20:76–79. Afta ridim ol tijing blong Presiden Aering abaot ol sakramen prea, ating bae yu wantem blong invaetem olgeta we yu stap tijim blong tingbaot ol wei we ol prea ia i save givhan long ol laef blong olgeta mo helpem olgeta blong gobak blong stap bakegen wetem Papa long Heven mo Jisas Kraes.

Intaviu blong Yuwan Wetem God

Presiden Aering i tijim se taem yumi lisin long ol sakramen prea, yumi save filim olsem se yumi stap gat wan intaviu blong yumiwan wetem God. Presiden Aering i tingbaot ol trifala eria ia. Gat tingting ia blong raetem ol kwestin ia long jenol blong yu mo tingting hevi long olgeta evri Sandei long manis ia. Taem yu tingting hevi mo kasem ol

filng we i kam long Tabu Spirit, yu save raetem ol samting ia tu long jenol blong yu.


- Wanem nao mi bin mekem we i mekem God i glad from?
- Wanem nao mi nidim blong sakem sin from o askem forgivnes from?
- Huia nao God i laekem blong mi givim seves long hem?

OL PIKININI

Oltaem Tingbaot Jisas

Jekob i stap traem blong tingbaot Sevya oltaem (luk long D&C 20:77). Lukluk raon long bedrum

blong hem. Wanem nao yu luk we i save helpem hem oltaem blong tingbaot Jisas?



Wetem prea, stadi long toktok ia, mo olsem we i stret, toktok raon long hem wetem ol sista we yu stap visitim. Yusum ol kwestin blong helpem yu blong mekem ol sista blong yu oli kam strong moa mo blong mekem Rilif Sosaeti i kam wan aktiv pat long laef blong yu. Blong kasem moa infomesen, go long reliefsociety.lds.org.

Ol Tempol Kavenan

Ol odinens blong sevem man we oli kasem long tempol we i letem yumi blong gobak samdei long Papa blong yumi long Heven long wan famle rilesensip we i no save finis mo blong kasem endaomen wetem ol blesing mo paoa we i kam antap, i nidim evri sakrifaeas mo traehad,¹ Presiden Tomas S. Monson i bin talem. Sapos yu no bin go yet long tempol, yu save rere blong kasem ol tabu tempol odinens ia tru long fasin blong:

- Stap biliv long Papa long Heven, Jisas Kraes, mo long Tabu Spirit,
- Stap kasem wan testemoni abaot Atonmen blong Jisas Kraes mo gospel we i kambak.
- Stap sastenem mo folem profet we i stap laef.
- Stap kwalifae from wan tempol rekomend tru long fasin blong pem taeting, stap klin long tingting, stap ones, kipim Tok blong Waes, mo laef gud folem ol tijing blong Jos.
- Stap givim taem, talen, mo ol nara samting blong help bildim kingdom blong Lod.
- Stap tekempat long wok blong famle histri.²



Presiden Monson i gohed blong tijim, “Taem yumi tingbaot ol kavenan we yumi mekem insaed [long tempol], bae yumi save gotru gud evri tes mo save winim wanwan temtesen.”³

I Kamaot long Ol Skripja

Doctrine and Covenants 14:7; 25:13109:22

OL NOT

1. Luk long Tomas S. Monson, “The Holy Temple—a Beacon to the World,” *Liahona*, Mei 2011, 92.
2. Luk long *Daughters in My Kingdom: The History and Work of Relief Society* (2011), 21.
3. Tomas S. Monson, *Liahona*, Mei 2011, 93.
4. *Daughters in My Kingdom*, 29–30.
5. Sarah Rich, long *Daughters in My Kingdom*, 30.

Wanem Mi Save Mekem?

1. Mi stap wosip long tempol oltaem?
2. Mi stap leftemap tingting blong ol sista blong mi blong kasem ol blesing blong tempol?

Fet, Famle, Help



I Kamaot long Histri blong Yumi

“Bitim 5000 Sent oli bin fulumap Nauvu Tempol afta dedikesen blong hem. . . .

“Strong, paoa, mo ol blesing blong ol tempol kavenan i [bin sastenem] Ol Lata-dei Sent long rod blong olgeta i go long [Wes], taem oli [bin safa] from kolkol, hot, hanggri, pua, sik, aksiden, mo ded.”⁴

Semmak olsem ol Rilif Sosaeti sista, Sera Rij i bin givim seves olsem wan tempol woka. Hem i bin tokbaot eksperiens blong hem:

“Sapos i no bin from fet mo save we mifala i bin kasem long tempol tru . . . long Spirit blong Lod, trip blong mifala bae i olsem wan taem long tudak. . . . Be mifala i bin gat fet long Papa blong mifala long Heven, . . . wetem filing se mifala i olsem ol pipol blong Hem we Hem i bin jusum . . . , mo blong mifala i harem nogud i no bin hapen be, mifala i bin filim glad long dei ia blong sevem mifala we i bin kam tru.”⁵

Fasin blong muv i no bin wan “taem long tudak” blong ol fetful Lata-dei Sent woman. Ol tempol kavenan blong olgeta i bin sastenem olgeta.

STAP STADI LONG OL TOKTOK BLONG KONFRENS TUGETA

Blong stap jenisim ol wei blong stap luklukbak long konfrens i mekem storian raon long gospel olsem wan famle i kam moa gud.

I Kam long Grek Bati

Blong sam yia mifala i bin glad blong stap ridim tru ol konfrens magasin olsem wan famle, wan stori long wan taem. Taem mifala i stat, bae mifala i jes kam tugeta raon long tebol mo wanwan i gat taem blong ridim wan paragraf blong ridim strong. Be mifala i faenem se mifala i bin stap rid i go tru nomo, mo nomo stop blong tekem gud ol mesej ia.

Blong kasem moa long wanem we mifala i stap ridim, waef blong mi mo mi i bin pem wan kopi blong konfrens magasin blong wanwan memba blong famle mo plan blong hamas toktok we bae mifala i niddim blong stadi evri wik, olsem bae mifala i save ridim evriwan bifo nekis jenerol konfrens. Blong sam wik, bae mifala i ridim wan toktok, mo ol nara wik bae i tu toktok, be evriwan i stadi long toktok ia mo makem ol pat we oli bin laekem. Afta, blong famle haos naet, bae mifla i tijim mifala wanwan long ol sekSEN we mifala i bin makem.

Plante taem ol pikinini blong mifala oli gat ol kwestin we bae i openem storian blong mifala, o waef blong mi mo mi i askem ol kwestin long stadi blong mitufala. Mitufala i laekem tumas blong harem ol yangfala blong mitufala oli eksplenem ol ansa blong olgeta long ol

kwestin ia, serem ol samting we oli bin lanem long seminari, long jos, o long stadi blong olgetawan. Hem i bin kam wan gudfala wei blong harem ol testemoni blong wanwan oltaem long wan ples we i gud tumas.

I no longtaem mifala i faenem se sem samting i hapen long moning skripja stadi blong mifala. Sam dei bae mifala i rid tru sam ves nomo bifo taem i finis blong toktok raon long ol ves ia mo olsem wanem oli go wetem wanem i stap hapen raon long mifala.

Ol moning blong mifala naoia i stap fulap wetem storian, laf, mo yuniti bifo mifala i go long wanwan rod blong mifala. Mifala i gat ol strong testemoni long kaonsel blong profet blong yumi blong stadi mo prea tugeta evri dei. Famle blong mifala i bin jenis i go long wan we i stap lanem samting mo stap mekem wanwan i kam strong moa.

Evri samting ia, i wan ansa blong wantem blong save gud smol moa aot long jeneral konfrens. ■

Greg Bati i stap long Yuta, YSA.



STADI MO YUSUM OL MESEJ BLONG KONFRENS

"Tingbaot se ol mesej we yumi bin harem long konfrens ia bae oli printim long namba blong manis Mei blong *Ensign* mo *Liahona* magasin. Mi askem strong long yufala blong stadi ol mesej, blong tingting hevi long ol tijing blong hem, mo afta blong yusum olgeta long laef blong yu."

President Tomas S. Monson, "A Word at Closing," *Liahona*, Mei 2010, 113.



OLSEM WANEM I IMPOTEN BLONG GAT OL GUD FREN

Ol fren oli gat wan strong paoa long ol aksen blong yumi, speseli long yangfala blong yumi. “Bae oli lidim olsem wanem yu tingting mo mekem samting, mo tu, oli helpem blong pusum yu long wanem kaen man o woman yu save kam.” Mo taem yu jusum ol gud fren, “bae oli kam wan we i mekem yu strong moa mo kam wan blesing long yu. . . . Bae oli helpem yu blong kam wan moa gud man o woman mo mekem i moa isi long yu blong laef long gospel blong Jisas Kraes.”²

Long ol pej 52–53 blong namba ia, Ilein S. Dalton, Yang Woman Jeneral Presiden, i tijim se i impoten blong stap lukaotem mo kam wan gud fren. “Lukaotem wan samting we i moa gud long wan naraman hem i impoten long wan tru frensip,” hem i talem.

Taem wan i stap bildim ol frensip long ol prinsipol ia bae i helpem ol yut blong gat wan rilesensip mo ol sosol skil we oli save stap blong longtaem moa i bitim blong jes kam “ol fren” long ol sosol netwok long intanet. Olsem wan papa o mama, yu save helpem ol pikinini blong yu oli andastanem from wanem i impoten blong kam wan gud fren mo blong jusum ol fren we bae i leftemap tingting blong olgeta blong laef folem gospel. Sam tingting long ples i save help.

Sam Tingting blong Tijim Ol Yut

- Olsem wan famle, lukaotem ol skripja we oli givim ol eksampol blong ol gud fren. Toktokraon long wanem kwaliti nao i mekem ol frensip ia oli strong.

Tingbaot Deved mo Jonatan (luk long 1 Samuel 18–23), Rut mo Naomi (luk long Ruth 1–2), mo Alma wetem ol boe blong Mosaea (luk long Mosaea 27–28; Alma 17–20).³

- Luklukbak long seksen blong ol fren long buk blong *Blong Ol Yut Oli Kam Strong*. Serem wetem ol yangfala blong yu olsem wanem fasin blong mekem fren i lidim laef blong yu. Invaetem olgeta blong serem olsem wanem oli bin lidim ol fren blong olgeta mo olsem wanem ol fren blong olgeta i bin lidim olgeta.
- Ridim stori blong Sista Dalton long namba ia. Tokbaot gol we gel blong hem, Emi i bin putum blong lukaotem ol gud fren. Helpem ol pikinini blong yu blong setem ol gol abaot ol kaen fren we oli wantem gat mo kaen fren we oli wantem kam.
- Tingting blong gat wan famle haos naet blong serem ol tingting blong bildim ol frensip, olsem: “Blong gat ol gud fren, yu mas kam wan gud fren. Soem tru intres long ol narawan; smael mo lego olgeta oli save se yu kea long olgeta. Tritim evriwan wetem fasin blong stap kaen mo respek, mo stopem fasin blong jajem mo tokbaot olgeta we oli stap raon long yu.”⁴

Sam Tingting blong Tijim Ol Pikinini

- Stap wan fren i minim tu blong helpem ol narawan. Ridim “Stanap long Saed blong Caleb” long



OL SKRIPJA LONG SAED BLONG FRENSIP

Ol Proverb 17:17;18:24

Prija 4:9–10

Matiu 25:34–40

Luk 22:32.

Mosaea 18:8–9

Maj 2009 *Liahona* mo toktok wetem ol pikinini blong yu abaot ol wei we oli save stap kaen long evriwan we oli mitim.

- Long evri situesen, yumi mas di-saed wanem kaen fren bae yumi kam. Singing tugeta “Mi Traem blong Kam Olsem Jisas,”⁵ mo afta, toktok wetem ol pikinini blong yu abaot olsem wanem oli save jusum blong kam wan gud fren, olsem Sevya, long plante defren ples. ■

OL NOT

1. Luk long *For the Strength of Youth* (buklet, 2011), 6.
2. Luk long *Blong Ol Yut Oli Kam Strong*, 8.
3. Luk long Jeffrey R. Holland, “Real Friendship,” *New Era*, Jun 1998, 62–66.
4. Luk long *Blong Ol Yut Oli Kam Strong*, 8.
5. “I’m Trying to Be Like Jesus,” *Children’s Songbook*, 78–79.

TABU SPIRIT I GIVIM KAMFOT, INSPIRESEN, MO I TESTIFAE

Presen we i Tabu Spirit, hem i wan long ol bigfala blesing we yumi kasem long laef ia, from Tabu Spirit i givim kamfot, inspiresen, woning, i klinim gud, mo i givhan long yumi. Hem i save fulumap yumi “wetem hop mo lav we i stret evriwan” (Moronae 8:26). Hem i tijim “trutok blong evri samting” (Moronae 10:5). Yumi kasem revelesen mo ol presen long saed blong spirit i kam long God tru long-Tabu Spirit. Moa impoten, yumi kasem ol testemoni blong yumi long Papa long Heven mo Jisas Kraes tru long-Tabu Spirit.

Bifo yu bin baptaes, yu bin save filim Tabu Spirit wanwan taem. Be nomo taem yu kasem presen ia we i Tabu Spirit afta long baptaes blong yu, yu bin save glad blong gat oltaem kampani blong Tabu Spirit, hemia sapos yu klin inaf. Presen ia, yumi kasem tru wan we i gat

Melkesedek Prishud taem i putum ol han blong hem antap long hed blong yu (luk long Ol Wok 19:6; luk long D&C 33:15). Afta long hemia, evri Sabat dei yu save riniu ol kavenan blong yu blong baptaes taem yu tekem sakramen, mo long wei ia, yu kasem blesing ia blong Lod we i blong yu save oltaem gat Spirit blong Hem i stap wetem yu (luk long D&C 20:77).

Tabu Spirit, we plante taem yumi save long hem olsem Spirit, hem i nambatri memba blong Godhed. Profet Josef Smit i bin tijim se Papa i gat wan bodi blong mit mo bun we oli save tajem, semmak olsem hemia blong man; Pikinini blong Hem tu; be Tabu Spirit, hem i no gat wan bodi blong mit mo bun, be hem i wan we i Spirit. Sapos i no olsem, bae Tabu Spirit i no save stap insaed long yumi (luk long D&C 130:22).

“From Spirit blong Lod i no stap long ol tempol we i no tabu” (Hileman 4:24), yumi mas klin inaf blong gat kampani blong Hem. Yumi stap klin inaf taem we, wetem ol nara samting, yumi gat ol klin tingting, yumi laef wetem fasin blong stap tru, mo yumi stap lukaot blong obei ol komanmen. ■

Blong moa infomesen, luk long 2 Nifae 31:13, 17:32:5;3 Nifae 27:20; Moronae 10:5–8; Joseph Smith—History 1:70.



YUMI NO MAS TEKEM PRESEN IA OLSEM SAMTING NATING

“Olsem evri nara presen, presen ia, yumi mas kasem mo akseptem mo stap glad long hem. Taem ol han blong prishud oli stap antap long hed blong yu blong konfemem yu wan memba blong Jos, yu bin harem ol toktok ia, ‘Kasem Tabu Spirit.’ Hemia i no minim se Tabu Spirit bae i stap oltaem olsem kompanion blong yu. Ol skripja i wonem yumi se Spirit blong Lod bae ‘i no stap oltaem wetem man’ (Jenesis 6:3). Taem oli konfemem yumi, yumi kasem ræt ia blong gat kampani blong Tabu Spirit, be hem i wan ræt we yumi mas gohed blong winim tru long fasin blong stap obei mo stap klin inaf.”

Elda Josef B. Witlin (1917–2008) blong Kworom blong Olgeta Twelef Aposol, “The Unspeakable Gift,” *Liahona*, 28 Mei 2003.

Afta we yumi kasem presen
ia we i Tabu Spirit, yumi
save mekem plante samting
blong invaetem paoa blong
Hem long ol laef blong yumi:

Prea



Stadi ol skripja.



Stap klin inaf blong tekem sakramen.




FOTO PIKIA WE I KAM LONG KRISTINA SMT, IV TAFF,
KODI BEL, MO MATU RAEA.



Wosip long tempol.



*Lukluk ol gudfala media,
yusum klin lanwís, mo gat
ol tingting we oli klin gud.*

Ded MO LaeF

DED MO LAEF: LUKLUK BLONG PAEONIA
LONG FASIN BLONG LAEF BAKEGEN LONG DED

Taem olgeta fas konvet long Jos oli bin travel i go long Wes blong Yunaeted Stet blong joen tugeta wetem ol Sent, oli bin faenem ded be tru niufala fet blong olgeta long gospel we i kambak, i mekem oli kam strong. Wanem i kam afta, oli samfala pat blong stori blong ol paeonia we oli soem hop blong ol Sent long Laef Bakegen long Ded, tugeta wetem ol gudfala tijing we i kam long ol fas faef Presiden blong Jos.

Wan stori blong wan Lata dei Seni papa blong Skandinavia we i no givim nem we yang boe blong hem i bin ded long rod, long Niu Yok i go long Yuta long 1866.

“Wetem help blong wan fren, oli bin digim wan smol grev mo putum smol bodi insaed. From smol pikinini ia i ded from wan sik we i save pas kwiktaem, i no gat ol man i kam blong krae, i no gat wan fenerol, o saen blong ol flaoa, i no gat singsing long saed blong spirit, i no gat wan toktok abaot laef blong hem. Be bifo papa blong smol pikinini ia we i ded i go, hem i mekem wan smol prea blong dedikesen long lanwis blong hem (lanwis blong Denmak) mo i go olsem: . . .

“Papa long Heven: Yu yu bin givim long mi smol tresa—daling boe ia, mo naoia Yu yu stap singaotem hem i go. Sapos yu save mekem se bodi blong hem i ledaon long ples ia mo i no

gat samting i spolem kasem long moning blong laef bakegen long ded. Be yu mekem folem tingting blong Yu. Amen.’

“Mo taem hem i girap long graon mo bifo hem i go, ol las toktok blong hem oli:

“Tata, dia smol Hans—naes boe blong mi.’ Afta wetem hed i hang mo hat i soa, hem i gohed long rod blong hem i gobak long ples we oli kamp long hem.”¹

Presiden Josef Smit (1805–44):


“Ol toktok ia oli gud tumas blong olgeta we oli krae taem oli stap livim wan hasban, waef, papa, mama, wan pikinini, o wan famle, blong save se nomata bodi blong wol ia i ledaon mo i lus, bae oli laef bakegen blong stap long faea we i no save ded samtaem long glori we i nomo save ded, i nomo harem no-gud, i nomo safra, o ded bakegen, be bae oli



kasem ol samting we i blong God mo oli kasem ol samting wetem Jisas Kraes.”²

Josef Watson Yang (1828–73), nifu blong Brigham Yang we i bin travel long Inglan i go kasem Yunaeted Stet long 1853.

“I bin wan taem blong sore blong luk oli berem wan nara man long solwota long let naet wetem hamas man nomo i bin witnesem. . . . Hem i no bin gat wan famle o fren wetem hem long sip blong krae from hem be wan wokman blong hem nomo. Hemia i bin wan bigfala hop blong laef blong wan man long wol we i jes smas gud long wan smol taem nomo. Yang man ia i bin livim evri samting blong hem blong go long Saeon, mo hat blong hem i bin fulap long hop mo wetem wan strong tingting blong fiuja, mo hem i no bin tingting tumas se bae hem i ded long solwota. Be, hem i no bin ded olsem olgeta we oli no gat hop, from pis blong hem i bin stap wetem God blong hem, mo hem i bin gat ful tras blong wan laef bakegen



Lef: Presiden Brigham Yang.
Antap: Josef Watson Yang.

long ded we i gat glori long moning ia we i blong olgeta we oli stret.”³

Presiden Brigham Yang (1801–77):

“Ples ia we oli singaotem ded i wan ples blong tudak mo wan sado! Blong pasem long stet ia blong laef olsem we evri bodi we bae i ded i mas go tru long hem, i go long wan stet we i emti nomo, i defren nomo! Ded hem i tudak! Rod blong ded ia i givim fraet, mo yumi mas folem rod ia yumiwan. Mi wantem blong talem long yufala, ol fren mo ol brata blong mi, sapos yumi save luk ol samting olsem we oli stap, mo taem yumi stap luk mo andastanem olgeta samting ia, rod ia blong ded i smol mo i no impoten we yumi save tanem raon mo luk long hem mo tingting se taem yumi krosem, i tru se hem i wan bigfala janis blong ful laef blong mi, from mi bin kamaot long wan stet blong harem nogud, soa, krae, ol problem, ol nogud samting, i go long stet blong laef, we mi save glad blong laef longtaem hemia samting ia i save hapen sapos i no gat bodi.”⁴





Dan Jons (1811–62), wan man Wels we i bin konvet, wetem Misis Williams mo ol nara memba blong Jos, mo i bin sel i go long Yunaeted Stet long 1849:

"Misis Williams, blong Wainisbon kolo-sap long Tregaron long [Wels], helt blong hem i stap kam moa nogud kwiktaem, mo ol saen i soem se hem i no save laef long-taem. . . . Hem i talem se bigfala ona we hem i bin kasem long laef blong hem i we blong save kam wan memba blong tru jos blong Pikinini blong God, se i no gat fraet long tingting blong hem abaot narafala laef mo se relijin blong hem naoia i pruvum paoa blong samting ia bitim bifo. . . . Hem i kaonselem ol boe blong hem blong gohed blong stap fetful kasem ded from olsem bae oli save kasem wetem hem wan laef bakegen long ded we i moa gud. . . . Hem i gohed blong tingting long samting truaot long naet, mo long kwota pas fo long nekis moning, spirit



Raet: Presiden
Jon Teila.
Antap: Dan
Jons.

blong hem i bin aot wetem pis, mo livim wan smael i stap long fes blong hem."⁵

Presiden Jon Teila (1808–87):

"Ol toktok ia i gud tumas blong olgeta we oli mas krae from ded blong ol dia fren, blong save se bae yumi mitim olgeta bakegen! Hem i leftistmap tingting blong evriwan we i stap laef folem ol prinsipol blong trutok we God i bin talemaot, ating speseli long olgeta we oli stap kam kolosap long en blong laef, we oli bin safa longtaem mo stanap strong kasem en blong save se, bifo finis, yumi save girap bakegen long gref, mo kam laef bakegen mo gat ol sol we i nomo save ded, blong save stap glad long sosaeti blong ol fren blong yumi we oli bin traem olgeta mo save trastem olgeta, mo nomo save safa from ded mo blong finisim wok blong Papa we hem i bin givim long yumi blong mekem!"⁶

Andru Jenson (1850–1941), wan man Danmak we i bin aot mo travel long Andru H. Skot wagon kampani long Nebraska, YSA, i go long Yuta long 1866.

“Taem mifala i bin stap witnesem ol bodi blong olgeta we [oli travel wetem mifala] we oli berem long graon long drael ples, mifala evriwan i krai, o filim blong krai; from, wetem tingting ia blong berem olgeta we oli ded folem fasin ia, taem ol fren mo famle i mas hariap mo aot, mo no gat hop blong visitim ol grev ia bakegen blong olgeta we oli ded, i bin wan taem blong sore mo wan hadtaem tru. . . . Be bae yumi faenem ol grev blong olgeta taem Gabriel i bloem trumpet blong hem long fas moning blong resureksen. Olgeta ia we oli bin go, oli lego ol bodi blong olgeta i stap long graon taem we oli stap maj i go blong kasem Saeon. Lod i bin singaotem olgeta blong go hom long Hem bifo oli kasem ples we oli stap wantem go long hem. Lod i no bin letem olgeta blong luk Saeon long bodi; be bae oli kasem



Lef: Presiden
Wilford Wudrof.
Antap: Andru
Jenson.

glori mo glad long laef afta; oli bin ded taem oli stap traehad blong obei God mo kipim ol komanmen blong hem, mo olgeta we oli ded oli kasem blesing long [Lod].”⁷

Presiden Wilford Wudrof (1807–98):

“Sapos i nogat gospel blong Kraes, seperesen we ded i mekem i wan long ol bigfala topik blong sore we man i save tingting long hem plante; be taem we yumi kasem gospel mo lanem prinsipol blong laef bakegen long ded, bigfala pat blong sore, harem nogud mo safring we i hapen tru long ded i nomo gat. . . . Laef bakegen long ded i soem hemwan bitim save blong man, mo hem i gat wan faondesen blong spirit blong hem blong stap antap long hem. Hemia nao hemi ples wea Ol Lata-dei Sent i stanap long hem tedei. Mifala i save long mifalawan, se mifala i no stap long tudak long saed blong topik ia. God i bin rivilim long mifala mo mifala i andastanem prinsipol blong laef bakegen long ded, mo we gospel i karem laef mo fasin blong nomo save ded i kam long laet.”⁸

hem blong stap antap long hem. Hemia nao hemi ples wea Ol Lata-dei Sent i stanap long hem tedei. Mifala i save long mifalawan, se mifala i no stap long tudak long saed blong topik ia. God i bin rivilim long mifala mo mifala i andastanem prinsipol blong laef bakegen long ded, mo we gospel i karem laef mo fasin blong nomo save ded i kam long laet.”⁸



OL NOT

1. Robert Aveson, “Leaves from the Journal of a Boy Emigrant,” *Deseret News*, 12 Maj 1921, 4:7; i stap long lds.org/churchhistory/library/pioneercompanysearch.

2. *Teachings of Presidents of the Church: Joseph Smith* (2007), 52.

3. Joseph W. Young, Journal, 6 Maj 1853, Church History Library, Salt Lake City, Utah; i stap long intanet long mormonmigration.lib.

byu.edu.

4. *Teachings of Presidents of the Church: Brigham Young* (1997), 273.

5. “A Letter from Capt. D. Jones to the Editor of *Udgorn Seion*,” insaed long Ronald D.



Wiliam Draeva (1837–1920), wan paeonia we i bin travel long Inglan i go long Niu Yok, YSA, long 1866:

“Wili, dia pikinini blong mi, i bin sik tumas truaot long naet kasem 7:30 long moning taem we hem i ded mo hemi kam fri long ol harem nogud blong hem. God i blesem dia sol blong hem. Hem i bin safi bigwan. Hem i bin ded from kat blong Mista Pouulta i bin brok long hil blong Sent An, Wanswot, Seri, Ingland. O mi bin krai tumas from bigfala hadtaem ia. O Lod, helpem mi tru paoa blong yu blong akseptem olsem ting-ting blong yu mo givim mi paoa blong save givim seves long yu wetem moa respek mo fasin blong stafetful, mo bae mi save laef blong rere blong mitim hem long wan wol



Raet: Presiden
Lorenzo Sno.
Antap: William
Draeva.

we i moa hapi mo i moa gud wetem dia sista blong hem, Elisabet Meriam, mo long taem blong laef bakegen long ded blong olgeta we oli stret, bae mi save stap blong mitim olgeta.”⁹

Presiden Lorenzo Sno (1814–1901):

“Long nekis laef, bae yumi gat ol bodi blong yumi we bae i fulap long glori mo i fri long sik mo ded. I nogat wan samting we bae i moa naes olsem wan man o woman long wan bodi we i laef bakegen long ded mo i fulap long glori. I nogat wan samting we i fulap long lav bitim we blong stafet long wan wei we i olsem mo gat ol waef mo ol pikinini mo ol fren blong yumi oli stafet wetem yumi.”¹⁰ ■

Blong mekem isi blong rid, oli bin stretem sam speling, mak mo kapitol.

Dennis, *The Call of Zion: The Story of the First Welsh Mormon Emigration*, vol. 2(1987), 164–65; i stap long mormonmigration.lib.byu.edu.

6. *Teachings of Presidents of the Church: John Taylor* (2001), 50–51.

7. Jenol blong Andru Jenson, 20 Ogis

1866, long *Journal History of The Church of Jesus Christ of Latter-day Saints*, 8 Okt 1866, Church History Library, Salt Lake City, Utah, 6; i stap long lds.org/churchhistory/library/pioneercompanysearch.

8. *Teachings of Presidents of the Church:*

Wilford Woodruff (2004), 82–83.

9. Frank Driver Reeve, ed., *London to Salt Lake City in 1866: The Diary of William Driver* (1942), 42; i stap long mormonmigration.lib.byu.edu.

10. Lorenzo Sno long Conference Report, Okt. 1900, 63.



I Kam long Elda
Rasel M. Nelson
Blong Kworom blong
Olgeta Twelef Aposol

Misin mo Seves blong **JISAS KRAES**

*Pruf we i moa gud we i soemaot
se yumi laekem Jisas tumas i taem yumi gat
ol fasin we i semmak olsem Hem.*

Olsem wan long medel blong ol spesel witnes blong nem blong Kraes long ful wol (luk long D&C 107:23), mi biliv se mi givim moa gud seves sapos mi tij mo testifae abaot Hem. Faswan, mi save askem ol sem kwestin we Hem i bin askem wan taem long ol Farisi: “Wanem tingting blong yufala long Mesaea ya? Bambae hem i kamaot long laen blong hu?” Matiu 22:42

Ol kwestin ia oli kam oltaem long maen taem mi mit wetem ol lida blong gavman mo blong sam nara relijin. Sam i talem se “Jisas i wan gudfala tija.” Ol narawan oli talem, “Hem i bin wan profet.” Ol narawan oli jes no save Hem nomo. Yumi no mas sapraes tumas. From long en, sam pipol nomo oli gat ol trutok blong gospel we i kambak we yumi gat. Ol memba blong Jos blong Jisas Kraes blong Ol Lata-dei Sent oli stap wan smol grup nomo long medel blong olgeta we oli talem se oli Kristin man.

Situesen blong yumi tedei, Nifae i bin luk handred yia finis bifo.

“Mo i bin hapan se mi bin luk Jos blong Smol Sipsip blong God, mo ol namba blong hem i bin smol nomo . . . , be mi bin luk se Jos blong Smol Sipsip, we oli ol Sent blong God, i bin stap tu long ful fes blong wol; mo ol samting we oli bin rulum long fes blong wol i bin smol. . . .

“Mo i bin hapan se mi, Nifae, mi bin luk paoa blong Smol Sipsip blong God, we i bin kamdaon long ol sent blong Jos blong Smol Sipsip, mo long ol kavenan pipol blong Lod, we i bin seraot olbaot long ful fes blong wol; mo oli blokem olgeta wetem stret fasin mo paoa blong God long bigfala glori. (1 Nifae 14:12, 14).

Fasin ia blong stap stret mo gud, paoa ia, mo glori ia—mo tu, evri plante blesing blong yumi—i kamaot long save blong yumi long Lod Jisas Kraes, i kamaot long fasin blong stap obei, mo glad mo gat lav long Lod Jisas Kraes.



Long smol taem we hem i bin stap long wol; Sevya i bin winim tu stamba gol. Wan, i bin wok blong Hem mo glori blong Hem blong mekem man i nomo save ded mo i kasem laef we i no save finis (luk long Moses 1:39). Narawan i talem long wan simpol wei: “Mi mi putum wan eksapol blong yufala, blong bambae yufala i save mekem sem fasin ya nomo we mi mi mekem long yufala.” (Jon 13:15).

Fas stamba tingting blong Hem we yumi save long hem, hem i Atonmen. Hemia i bin spesel misin blong Hem long wol ia. Long pipol blong Amerika blong bifo, Lod we i laef bakegen long ded i givim misin toktok ia blong Hem:

“Mi bin kam long wol blong mekem wanem we Papa blong i wantem, from Papa blong mi i bin sendem mi.

“Mo Papa blong mi i bin sendem mi blong oli save leftemap mi long kros; mo afta we oli bin leftemap mi long kros, blong mi save pulum evri man i kam long mi” (3 Nifae 27:13–14).

Taem Hem i stap gohed long toktok blong Hem, Hem i soem nambatu stamba tingting blong Hem—blong stap eksapol blong yumi: “Mo yufala i save ol samting we yufala i mas mekem . . . ; from ol wok we we yufala i bin lukim mi mi mekem, samting ia bae yufala i mas mekem tu” (3 Nifae 27:21).

Fas stamba tingting blong Hem, mi bin tokbaot olsem wan *misin*. Nambatu stamba tingting blong Hem, mi laekem blong yumi luk olsem *seves* blong Hem. Bae yumi luk-lukbak long tufala pat ia blong laef blong Hem—misin mo seves blong Hem.

Misin blong Jisas Kraes—Atonmen

Misin blong Hem i bin Atonmen. Misin ia i bin blong Hem nomo. Hem i bin bon long wan mama we i save ded mo wan Papa we i nomo save ded; Hemwan nomo we i save givim laef blong Hem wetem glad hat mo karembak bakegen (luk long Jon 10:14–18). Ol gudfala risal blong Atonmen blong Hem, oli no gat en mo oli no save finis. Hem i bin karemaot soa aot long ded mo mekem harem nogud from ded i blong smol taem nomo

(luk long (Fas Korin 15:54–55). Responsabiliti blong Hem long Atonmen i bin stap finis, bifo taem blong Kriesen mo Foldaon blong Adam mo Iv. Hem i no mekem nomo blong evri man i save laef bakegen long ded mo kasem wan laef we i nomo save ded, be hem i blong mekem se yumi save kasem fogivnes from ol sin blong yumi—folem ol kondisen we Hem i bin putum. From samting ia, Atonmen blong Hem i bin openem rod we yumi save kam wan wetem Hem mo wetem ol famle blong yumi we oli no save finis. Visen ia yumi tekem olsem laef we i no save finis—presen blong God we i moa bigwan we Hem i givim long man (luk long D&C 14:7).

I no gat man i save mekem Atonmen. I no gat wan man, iven spos hem i rij tumas mo i gat paoa, bae i save sevem wan sol—iven sol blong hemwan (luk long Matthew 19:24–26). Mo i no gat wan narafala man bae i nidim o bae i kasem raet blong mekem blad i ron blong mekem fasin blong sevem wan narafala man i hapen. Jisas i bin mekem “wan-taem be blong evriwan” (Hibrus 10:10).

Nomata Atonmen i bin hapen fulwan long taem blong Niu Testeman, ol samting we oli bin hapen long taem blong OlTesteman oli stap tokbaot finis olsem wanem Atonmen i impoten. Adam mo Iv, tufala i bin kasem komanmen blong mekem ol sakrifaes olsem wan samting we bae i semmak long sakrifaes blong Wan Pikinini Ia Nomo blong Papa (luk long Moses 5:7). Olsem wanem? Tru long blad we i ron. Tru long eksperiens blong tufalawan, tufala i bin konfemem long skripja se “olgeta samting we i gat laef, be laef blong olgeta i stap long blad blong olgeta” (Levitikas 17:11).

Ol dokta oli save se taem blad i stop blong ron insaed bodi, trabol i stat. Sapos blad we i ron long wan leg i stop, bigfala soa we i no save kamgud i kasem leg. Sapos blad we i ron i go long bren i stop, bae i save kasem strok. Sapos blad i stop blong ron nomol tru long paep blong blad i go long hat, wan hat atak i save hapen. Sapos blad i lus plante we yumi nomo save kontrolem, ded i save hapen.

Adam, Iv mo ol jeneresen we oli stap kam antap oli bin lanem se evritaem we oli mekem blad blong wan animol i ron, laef blong

WOMAN, LUK PIKININI BLOONG YU (STABAT MATER) | KAM LONG GAREN BLOONG GETSEMANE | KAM LONG GAREN BLOONG PIKA IA LONG GAREN BLOONG GETSEMANE | © BROOKLYN MUSEUM, BROOKLYN, NEW YORK; INSAET: WAN SMOL PAT BLOONG PIKA IA LONG GAREN BLOONG GETSEMANE | KAM LONG GAREN BLOONG GETSEMANE | © BROOKLYN MUSEUM, BROOKLYN, NEW YORK



Blad blong
Sevya i
bin stat
blong ron from
evri man long
wol, i no long
kros be long
Garen blong
Getsemane.



hem i finis. Blong ol sakrifaes seremoni blong olgeta, bae oli no save sakrifaesem *eni* animol olbaot. Bae hem i mas fas sipsip we i no gat wan nating long hem (luk, eksampol, Eksodas 12:5). Ol samting we oli nidim oli olsem ol simbol tu blong sakrifaes blong Smol Sipsip blong God we i no gat mak long hem.

Adam mo Iv, tufala i bin kasem wan komanmen se tufala i mas mekem evri samting we tufala i bin mekem long nem blong Pikinini, mo tufala i mas sakem sin mo prea long God long nem blong Pikinini, blong oltaem (Moses 5:8). Stat long taem ia go kasem medel blong taem, sakrifaes blong animol i gohed blong stap wan eksampol mo pikja blong Atonmen blong Pikinini blong God we bae i hapen long en.

Taem we Atonmen i bin tekem ples, bigfala mo las sakrifaes ia i bin mekem loa blong Moses i kamtru (luk long Alma 34:13–14) mo i stopem wantaem praktis ia blong sakrifaesem animol, we i bin tijim se “olgeta samting we i gat laef, be laef blong olgeta i stap long blad blong olgeta” (Levitikas 17:11). Jisas i bin eksplenem olsem wanem ol pat blong sakrifaes blong bifo oli nomo impoten tedei, hemia from Atonmen i tekem ples mo sakramen i olsem simbol ia nao blong stap tingbaot Atonmen. Tekem not bakegen se ol skripja ia oli tokbaot laef, bodi blong mit mo bun, mo blad;

“Nao Jisas i talem long olgeta se, Tru mi talem long yufala, mi mi Pikinini blong Man. Sipos yufala i o kakae mit blong bodi blong mi, mo yufala i no dring blad blong mi, bambae yufala i no gat laef long yufala.

“Man we i kakae mit blong mi mo i dring blad blong mi, hem i gat laef we i no save finis, mo long Lasdei, mi bambae mi mekem hem i laef bakegen.” (Jon 6:53–54).

From Atonmen blong Jisas Kraes, evri man long wol—iven plante we oli save mekem—bae hem i pemaot olgeta. Blad blong Sevya i bin stat blong ron from evri man long wol, i no long kros be long Garen blong Getsemane. Longwei, Hem i bin tekem long Hemwan evri sin blong evri pipol we bae i laef long wol ia. Andanit long ol hevi samting ia, blad i bin ronaot long evri hol blong skin blong bodi blong Hem (luk long D&C 19:18). Soa blong Atonmen i bin finis long kros long Kalvari.

Profet Josef Smit i bin talem smol olsem wanem Atonmen i impoten. Hem i talem, “Ol stamba prinsipol blong religijn blong yumi oli ol testemoni blong ol Aposol mo ol Profet, long saed blong Jisas Kraes, se Hem i bin ded, oli bin berem Hem, mo Hem i bin girap long nambatri dei, mo i bin go long heven; mo evri narafala samting abaot religijn blong yumi, oli go wetem hemia.”¹

Wetem atoriti ia mo bigfala tangkyu, mi tu, mi tij mo testifae abaot Hem.

Seves blong Jisas Kraes—Man blong eksampol

Nambatu bigfala stamba tingting blong Lod long laef ia i blong stap olsem wan eksampol blong yumi. Eksampol blong laef blong Hem i pat blong seves blong Hem long wol ia. Hemia wetem ol tijing, ol parabol, mo ol toktok blong Hem. I tekem tu ol merikel blong Hem, kaen fasin wetem lav, mo fasin blong safa longtaem wetem ol pikinini blong ol man (luk long Nifae 19:9). I tekem tu fasin blong Hem blong yusum prishud atoriti wetem lav mo sore. I tekem tu stret mo gud fasin blong Hem blong kros taem Hem i jajem sin (luk long Rom 8:3) mo taem Hem i kafsaedem ol tebol blong ol man we oli stap jenisim mane (luk long Matiu 21:12). I tekem tu ol harem nogud blong Hem. Oli bin jikim Hem, wipim Hem, mo ol pipol blong Hem oli no wantem Hem (luk long Mosaea 15:5)—iven wan disaepol i letem Hem i go long han blong ol enemi mo wan we i giaman se hem i no save Hem (luk long Jon 18:2–3, 25–27).

Nomata ol seves we Hem i bin mekem, long Hem, oli no bin mo oli no spesel tumas. I no gat limit long namba blong pipol we i save folem eksampol blong Jisas. Semmak fasin ia, ol profet mo ol aposol blong Hem mo ol nara man long medel blong ol wokman blong Hem we oli bin kasem raet long Hem, oli bin mekem. Plante oli bin stanap strong taem oli kilim olgeta from Hem (luk long Matiu 5:10; 3 Nifae 12:10). Long taem blong yumiwan, yu save ol brata mo sista we oli bin traehad tumas—nomata oli pem wan bigfala praes—blong oli folem eksampol blong Lod.

Hemia i olsem we i mas stap. Hemia i hop we Hem i gat long yumi. Lod i bin askem yumi blong folem eksampol blong Hem. Hem i bin tijim klia ol samting ia:

- “Yufala i mas kam ol wanem kaen man? . . . I olsem [wel] mi stap” (3 Nifae 27:27; luk tu long 3 Nifae 12:48).
- “Yutufala i biaen long mi . . . Bambae mi mi mekem yutufala i man blong pulum man” (Matiu 4:19).
- “Mi mi putum wan eksampol blong yufala, blong bambae yufala i save mekem

sem fasin ya nomo we mi mi mekem long yufala” (Jon 13:15; luk tu long Jon 14:6).

Ol toktok ia mo ol nara skripja we i semmak, oli no bin raetem olsem sam tingting nomo. Oli ol tabu komanmen! Yumi mas folem eksampol blong Hem!

Blong mekem i isi blong folem Hem, ating yumi save tingting long faef eria long laef blong Hem we yumi save folem.

Lav

Sapos mi wantem askem wanem kwaliti long laef blong Hem nao we bae yu faenem fastaem, mi ting se bae yu wantem talem fasin blong Hem blong lav. Hemia bae i go wetem sore mo lav blong Hem, fasin blong stap kaen, jariti, taem mo tingting blong hem, fasin blong fogiv, sore, jastis, mo plante moa. Jisas i bin lavem Papa blong Hem mo mama blong Hem (luk long Jon 19:25–27). Hem i lavem famle blong Hem mo ol Sent (luk long Jon 13:1; Seken Tesalonaeka 2:16). Hem i lavem olgeta we oli mekem sin nomata oli stap mekem sin (luk long Matiu 9:2; D&C 24:2). Mo Hem i bin tijim yumi olsem wanem yumi save soem lav we yumi gat long Hem. Hem i talem, “Sapos yufala i lavem mi, bambae yufala i save obei long ol tok blong mi” (Jon 14:15). Afta blong mekem i klia gud se lav blong Hem i no gat *limit*, Hem i talem bakegen, “Sipos yufala i stap obei long ol tok blong mi, bambae mi mi lavem yufala olwe, stret olsem we mi mi stap obei long ol tok blong papa blong mi, nao oltaem hem i stap lavem mi” (Jon 15:10; luk tu long D&C 95:12; 124:87).

Wan nara wei blong soem lav we Sevya blong yumi i gat long yumi i bin seves blong Hem. Hem i bin givim seves long Papa blong Hem, mo Hem i bin givim seves long pipol we Hem i bin stap mo wok wetem olgeta. From tugeta samting ia, yumi mas folem eksampol blong Hem. Yumi mas givim seves long God, “yumi mas folem ol fasin blong hem mo yumi mas lavem hem” (Dutronome 10:12; luk tu long 11:13; Josua 22:5; luk long D&C 20:31; 59:5). Mo yumi mas lavem ol neiba blong yumi mo givim seves long olgeta (luk long Galesia 5:13; Mosaea 4:15–16). Yumi stat wetem ol famle blong yumi. Bigfala

TOKTOK ANTAP LONG HILL | KAM LONG JAMES TISO; INSAED: WAN SMOLI PAT BLONG PIKIA IA KRAES MO RU YANG LOYA. I KAM LONG HENRI HOFMAN, C. HARRISON CONROY CO | GLAD BLONG SEREM.



Samting we i
some se tijing
blong Sevya
i bitim evri tijing
blong ol nara fala
tija, i bin from
Hem i bin tijim ol
trutok blong im-
poten samting we
oli no save finis.
Hem nomo i save
talemaot stamba
tingting blong
yumi long laef.



lav ia we i fasem ol papa mo mama long ol pikinini blong olgeta i stat tru long seves blong ol papa mo mama ia i go long pikinini blong olgeta long taem we oli dipen bigwan long papa mo mama. Afta long laef, ol pikinini we oli wok, oli save gat janis ia blong gobak mo soem lav ia taem we oli givim seves long papa mo mama blong olgeta taem oli kam olfala.

OI Odinens

Wan nambatu samting long eksampol laef blong Seyva i bin wei we hem i tokbaot bigwan ol tabu odinens. Long taem blong seves blong Hem long wol, Hem i bin soem olsem wanem ol odinens blong sevem man oli impoten. Jon i bin baptaesem Seyva long Jodan Riva. Jon tu i bin askem, "From wanem?"

Jisas i bin eksplenem, "Long fasin ia bambae *yumitufala* i mekem olgeta samting we God i wantem, oli kamtru" (Matiu 3:15; oli ademap italic). Odinens ia i no bin impoten nomo, be eksampol we Jisas mo Jon i bin mekem i bin impoten tu.

Afta Lod i bin soem odinens blong sakramen. Hem i bin eksplenem simbol blong sakramen mo eksplenem mining blong sakramen ia long ol disaepol blong Hem (luk long Matiu 26:26–28; Mak 14:22–24; Luk 24:30).

Papa blong yumi long Heven i bin tijim yumi tu abaot ol odinens. Hem i talem se yumi mas bon bakegen insaed long kingdom blong heven, tru long wota, mo Spirit, blong kam klin tru long blad, we i blad blong Wan Stret Pikinini Ia Nomo blong Papa; blong yumi kam tabu mo fri long evri sin, mo blong yumi stap glad long ol toktok blong laef we i no save finis long wol ia, mo stap glad long laef we i no save finis long wol we i stap kam, we i glori ia we man i no save ded (luk long Moses 6:59).

Long taem blong seves blong Hem long wol afta we Hem i ded, ol hae odinens blong save kam olsem wan God i bin kam tru long revelesen (luk long D&C 124:40–42). Hem i bin givim ol odinens ia insaed long ol tabu tempol blong Hem. Long dei blong yumi tedei, fasin blong wasem, anoentem, mo kasem ol endaomen, oli givim long wanwan man we oli rere gud (luk long D&C 105:12, 18, 33; 110:9; 124:39). Long tempol, wanwan man i save sil long hasban o waef, long ol olfala we oli ded finis, mo long ol famle we bae oli kam yet (luk long D&C 132:19). Masta blong yumi i wan God blong loa mo oda (luk long D&C 132:18). Luk-luk blong Hem long ol odinens i wan pat blong eksampol blong Hem long yumi we i fulap long paoa.

Prea

Wan nambatri pat blong eksampol seves blong Lod hem i prea. Jisas i bin prea long Papa blong Hem long Heven, mo tu, Hem i bin tijim yumi olsem wanem blong prea. Yumi mas prea long God, Papa we I No Save Finis, long

nem blong Pikinini blong Hem, Jisas Kraes, tru long paoa blong Tabu Spirit (luk long Matiu 6:9–13; 3 Nifae 13:9–13; Joseph Smith Translation, Matthew 6:9–15). Mi laekem impoten prea we Lod i bin mekem long bihaf blong ol nara-fala, we oli rekodem i stap long Jon, japta 17. Long ples ia, Pikinini i bin filim fri blong toktok wetem Papa blong Hem long bihaf blong ol disaepol blong Hem, we Hem i lavem olgeta. Hem i wan eksapol blong wan prea we i folem stret fasin wetem sore mo lav.

Save

Wan nambafo eksapol blong Lod hem i fasin we Hem i yusum save blong Hem we i kam long heven. Olsem mi bin talem finis, plante man we oli no Kristin, oli luksave se Jisas i bin wan gudfala tija. Yes, Hem i bin wan gud tija. Be wanem nao i bin nao i mekem se ol tijing blong Hem oli defren long ol narawan? Hem i bin wan tija wetem skil blong tijim injiniaring, matematik, o saens? Olsem Krieta blong wol ia mo ol nara wol (luk long Moses 1:33), Hem i save kam wan kaen tija olsem. O, olsem Man we i talem ol toktok blong skripja, Hem i save tijim olsem wanem blong raet gud.

Samting we i mekem tijing blong Hem i defren long hemia blong evri nara tija, i we Hem i bin tijim ol trutok blong ol impoten samting *we oli no save finis*. Hem nomo i save soemaot long yumi stamba tingting blong yumi long laef. Tru long Hem nomo, yumi save lanem abaot *laef blong yumi bifo* laef long wol ia mo wanem we yumi save mekem *long laef blong yumi afta long wol ia*.

Long wan taem, Masta Tija i bin talem long olgeta we oli stap lisin long Hem we oli gat tu tingting se oli bin gat tri witnes blong Hem:

- Jon Baptae
- Ol wok we Jisas i bin mekem.
- Toktok blong God, Papa we I No Save Finis (luk long Jon 5:33–37).

Afta Hem i bin givim wan nambafo witnes: “Yufala i stap luklukgud long ol tok blong Baebol, mo yufala i bilif se long ol tok blong hem, yufala i gat laef we i no save finis. Be yufala i luk! Ol tok blong Baebol ya oli stap tokbaot mi” (Jon 5:39).

Toktok ia *tingting* long laen ia bae i luk olsem i no stret blong yusum blong fastaem. Be hem i impoten long mining we Jisas i bin traem blong stap yusum. Hem i bin save se plante long olgeta we oli lisin long Hem oli *ting* se laef we i no save finis i bin stap long ol skripja. Be oli bin rong. Ol skripja nomo oli *no save* givim laef we i no save finis. I tru i gat paoa long skripja, be paoa ia i kam long Jisas Hemwan. Hem nao i Toktok ia: *Ol logo*. Paoa blong laef we i no save finis i stap long Hem, we “*bifo we bifo* olgeta, taem we wol

ya i no stap yet, i gat wan man i stap we nem blong hem “Tok blong God”. Tok ya, hem i stap wetem God, mo hem tu i God” (Jon 1:1; luk tu long 2 Nifae 31:20; 32:3). Afta, from strong fasin blong olgeta blong no wantem biliv long Hem, Jisas i bin go blong stopem olgeta: “Yufala i no wantem kam long mi blong kasem laef ya [we i no save finis] long mi” (Jon 5:40).

Masta i save winim yumi wetem save blong Hem long heven, be Hem i no wantem. Hem i givim ona long fridom blong yumi blong save mekem joes. Hem i letem yumi gat glad blong faenem samting. Hem i leftemap tingting blong yumi blong sakem sin from ol mistek blong yumiwan. Hem i letem yumi blong gat eksperiens ia long fridom we yumi kasem taem yumi glad blong obei long ol loa blong Hem long heven. Yes, wei we Hem i yusum save blong Hem i givim wan gudfala eksapol blong yumi.

Fasin blong Stanap Strong

Wan nambafaef pat blong eksapol seves blong Lod, hem i komitmen blong Hem blong stanap strong kasem en. Hem i neva stop long wok blong Hem. Nomata Hem i bin go tru long safaring bitim we yumi save tingting long hem, Hem i neva wan man blong givap. Nomata ol tes blong Hem i kam moa nogud, Hem i bin stanap strong kasem en long wok blong Hem: blong pem praes from ol sin blong evri man long wol. Ol las toktok blong Hem taem Hem i bin hang long kros i bin, “Olgeta samting i finis nao” (Jon 19:30).

Fasin blong Yusum Hemia long Ol Laef blong Yumi


Ol faef poen ia long taem blong seves blong Hem, yumi save yusum long ol laef blong yumiwan. Wan bes mo tru wei blong pruvum se yumi laekem Jisas hem i taem yumi mekem olsem Hem.

Taem yumi stat blong luksave huia Jisas mo wanem Hem i bin mekem blong yumi, yumi save andastanem, smolsmol, risen blong fas bigfala komanmen: “Mo yufala i mas lavem Hae God ya we i God blong yufala long olgeta hat blong yufala, mo long olgeta laef blong yufala, mo longolgeta tingting blong yufala, mo long olgeta paoa blong yufala” (Mak 12:30). Long nara toktok, evri samting we yumi tingbaot mo mekem mo talem, yumi mas mekem wetem lav blong yumi long Hem mo Papa blong Hem.

Askem yuwan, “I gat wan man we mi lavem moa bitim Lod?” Afta komperem ansa blong yu wetem ol standet ia we Lod i bin putum:

- “Man we i lavem papa no mama blong hem moa, i winim we hem i lavem mi, hem i no stret blong i kam man blong mi.”

Eksampol
blong laef
blong Lod i
abaot seves blong
Hem long wol
ia. Hem i tekem
tu ol tijing blong
Hem, ol parabol,
mo ol toktok. I
tekem tu fasin
blong Hem blong
yusum prishud
atoriti wetem
lav mo sore.



- “Mo man we i lavem boe no gel blong hem moa, i winim we hemi lavem mi, hem i no stret blong i kam man blong mi” (Matiu 10:37).

Lav we yumi gat long famle mo ol fren, nomata se i bigwan olsem wanem, bae i gat moa mining sapos i joen long lav i go long Jisas Kraes. Lav blong ol papa mo mama i go long ol pikinini i gat moa mining long ples ia mo afta long ples ia, from Hem. Evri rilesensip blong lav oli kam moa gud long Hem. Lav blong Papa blong yumi long Heven mo Jisas Kraes i givim laet, insperesen, mo tingting blong lavem ol narafala man long wan moa gud wei.

Ol Odinens i soem wan wei blong wok from impoten samting we i no save finis. Ol papa mo mama oli mas save wanem odinens we wanwan pikinini bae i nidim. Ol hom tija oli mas tingbaot wanem odinens stret, wanwan famle we oli lukaotem, i nidim.

Eksampl blong Sevya long saed blong *prea* i mekem yumi tingbaot se prea we yu mekem yuhan, famle prea, mo prea from ol wok blong yumi long Jos i mas kam pat blong ol laef blong yumi. Blong save mo blong mekem tingting blong Papa, i givim moa paoa long saed blong spirit mo tras (luk long D&C 121:45). Blong stap long saed blong Lod i ples ia nao we yumi wantem stap long hem.

Save “long ol samting olsem we oli rili stap, mo ol samting olsem we bae i rili stap” (Jekob 4:13) i letem yumi mekem samting folem ol prinsipol mo doktrin. Save ia bae i mekem fasin blong yumi i kam gud. Ol aksen we, from fasin blong selfis mo tingting blong yumi nomo, i mekem se tru wok nomo i save lidim from wan risen mo from i stret.

Wan komitmen blong *stanap strong kasem en-i-minim* se bae yumi no askem blong oli rilisim yumi from wan koling blong givim seves. Hem i minim se bae yumi no stop blong gohed from wan gol we i klin inaf. I minim se bae yumi neva givap long wan we yumi lavem we i bin foldaon. I minim se bae yumi oltaem stap glad long famle rilesensip blong yumi we i no save finis, iven tru ol dei we i had from sik, from bodi we i nomo save muv, o ded.

Wetem evri hat blong mi, mi prea se paoa blong Lod blong jenisim man i save mekem wan samting i jenis long laef blong yu. Misin mo seves blong Hem i save blesem wanwan long yumi nacia mo blong oltaem. ■

I kam long wan toktok blong wan divosen we hem i bin givim long 18 Ogis 1998, long Brigham Yang Yunivesiti. Blong ridim ful toktok long Inglis, go long speeches.byu.edu.

NOT

1. *Teachings of Presidents of the Church: Joseph Smith* (2007), 49.

Wik blong Ista

Sevyal blong yumi Jisas Kraes i bin mekem Atonmen i hapen—we insaed i gat safaring blong Hem long Getsemane, Taem oli Hangem Hem long Kros long Golgota, mo Laef Bakegen long Ded aot long tumb—long las wik blong laef blong Hem.

Long Kaonsel long Heven bifo oli bin kriitem wol, Papa long Heven i bin presentem plan we Hem i gat abaot yumi, ol pikinini blong Hem. Yumi bin singaot wetem glad taem Papa long Heven i bin jusum Kraes blong karemaot plan blong fasin blong sevem man (luk long Job 38:7 mo Abraham 3:27). Meri i bonem Hem long Betlehem, Jisas i bin laef long wan laef we i no gat sin. From Atonmen blong Hem, yumi save gobak blong stap wetem Papa blong yumi long Heven mo kasem laef we i no save finis. Jisas Kraes bae i kambak bakegen wetem paoa mo glori blong stap long wol long taem blong Milenium, mo bae Hem i stanap olsem Jaj blong evri pipol long las dei.

Hemia ol pikja we oli stap long Baebol video we i soem las wik blong laef blong Sevyal. Gat tingting ia blong ridim ol ves blong skripja we oli listim long wanwan pikja. Blong wan ful lis we i stap long oda blong ol spesel taem ia, lukluk long jat we i soem wea ol skripja i kam long hem long ol fofala Gospel insaed Bible Dictionary o Guide to the Scriptures. Ol baebol video, oli stap long biblevideos.lds.org.



*Long nambafaef dei,
bifo Pasova, Jisas
i klaem long wan
dongki blong go long
Jerusalem olsem we
oli bin profesae. Ol
pipol i bin luksave
Hem olsem King blong
olgeta, mo oli singaot
“Hosana,” mo putum
kot blong olgeta mo
lif blong tri long rod
long fored blong
dongki. (Luk long
Matiu 21:1–11 Mak
11:1–11 Sekaraea 9:9.)*



Blong nambatu taem long taem blong seves blong Hem long wol, Jisas i bin klinim eria blong tempol. “Haos blong mi, bambae ol man oli putum nem blong hem se Haos blong Prea. Be yufala, yufala i stap mekem i kam ples blong haed blong ol man blong stil.” Hem i talem long olgeta we oli stap jenism mane (Matiu 21:13). Afta plante long ol blaenman mo ol man we leg blong olgeta i no gud oli kam long Hem long tempol, mo Hem i bin hilim olgeta. Be taem ol jif pris mo ol tija blong loa i bin luk merikel blong Hem, oli bin kros mo lukaot wan wei blong spolem Hem. (Luk long Matiu 21:12–17; Mak 11:15–19.)

*Jisas Kraes, Wan Pikanini la Nomo
blong Papa, we i bin putum Hem
daon blong kam long wol mo
pemaot evri pipol from Foldaon
blong Adam mo Iv. (Luk long 1 Nifae
11:16–22, 26–33; Alma 7:10–13.)*




Truaot long wik, Sevya i bin givimaot sam long ol gudfala toktok blong Hem we yumi no save forgetem, wetem ol tijing blong Hem abaot kleksen we wan wido i sakem. (Luk long Mak 12:41–44; Luk 21:1–4.)

Long Garen blong Getsemane, Sevya i bin nil-daon mo prea; harem nogud blong Hem from ol sin blong wol i mekem Hem blong i seksek from soa, blad we i kamaot long evri hol blong skin blong Hem, mo safa tugeta long bodi mo spirit (luk long D&C 19:18). I no longtaem Judas Eskariot mo plante ami oli bin arestem Jisas, mo evri disaepol i bin fogetem Lod mo oli ronwe. (Luk long Matiu 26:36–56; Mak 14:32–50; Luk 22:39–53.)




Long taem blong las sapa, Jisas i bin promesem ol aposol blong Hem se bae oli kasem Spirit blong Givhan, o Tabu Spirit, taem bae Hem i go. Hem i bin tijim olgeta blong tingbaot Hem taem oli tekem sakramen. Long en blong naet, Jisas i bin mekem wan Prea long Bihaf blong Olgeta, we Hem i bin prea se ol disaepol oli save kam wan long yuniti. (Luk long Matiu 26:17–30; Mak 14:12–26; Luk 22:14–32; Jon 13–17.)





Afta wan kot we i no folem loa i bin sidaon mo ol strong wip, Jisas Kraes i bin letem Hemwan blong oli hangem Hem long kros, blong komplitim "bigfala mo las sakrifaes" we i mekem fasin blong sevem man i save hapan blong evri pikinini blong God (luk long Alma 34:14–15). Bifo naet i kam, olgeta we oli stap folem Jisas oli bin karemaot bodi blong Hem long kros, oli kavremap long gudfala kaliko ya linen, we i niuwan, mo ol.i putum Hem long hol blong ston. (Luk long Matiu 27; Luk 23; Mak 15; Jon 19.)



Long eli moning long Sandei, mo Meri Magdelen mo ol nara fetful woman oli bin kasem hol blong ston blong anoentem bodi blong Jisas. Oli bin faenem se ston we i blokem hol ia i bin rolaot mo tu enjel we i stap talem gud nius: "Be hem i no stap long ples ya. Hem i laef bakegen finis" (Matiu 28:6). Sevya we i laef bakegen long ded i bin winim ded long saed blong bodi mo mekem i isi blong wanwan long yumi blong save laef bakegen: "Olgeta man we oli joen long Adam oli save ded, mo long sem fasin, olgeta man we oli joen long Kraes oli save laef bakegen long ded" (Fas Korin 15:22). (Luk long Matiu 28; Mak 16; Luk 24; Jon 20). ■

Stap Helpem Ol Pikinini

BLONG RERE BLONG KASEM BAPTAES

I Kam long Jesika Larsen mo Marisa Widison

Ol Magasin blong Jos

Man, taem blong laef blong hem taem hem i pikinini yet, i wan taem blong stap glad taem hem i fas taem blong hem blong kasem samting. Fas taem we i ron long basket, go long skul, o traem wan niufala kaekae; olgeta samting ia oli sam long ol taem we i mekem laef blong wan pikinini i jenis. Olsem ol adalt, yumi gat janis blong helpem ol pikinini blong folem rod blong mitim ol jenis. Olsem ol adalt insaed long Jos, yumi gat janis tu blong helpem olgeta blong gro insaed long gospel (luk long D&C 68:25). Wanem nao yumi save mekem blong mekemsua se baptaes blong wan pikinini—fas kavenan we wan man i mekem wetem Papa blong yumi long Heven we i lavem yumi—i wan naes taem we i gat bigfala mining?

“Hem i stamba tingting blong Jos ia blong tijim ol yut: faswan long hom mo afta long jos,” Presiden Boed K. Peka i bin tijim.¹

Long ol eksampol we oli stap ia, ol papa mo mama oli serem olsem wanem oli bin rere long ol pikinini blong olgeta from ol tabu odinens mo kavenan blong kasem baptaes mo konfemesen.

Mifala I Stat Eli

“Long yia we wanwan pikinini i kasem seven yia i wan taem blong selebret,” Lori i talem, wan mama we i gat fo pikinini. Hem wetem hasban blong hem i tijim ol pikinini blong tufala abaot baptaes stat long dei we oli bon. Be, taem wanwan pikinini i kasem seven yia, famle blong olgeta i statem wan program we i moa spesel. Oli gat wan famle haos naet lesen evri manis abaot ol defren topik we i abaot baptaes, olsem ol kavenan mo eksampol blong Jisas.

Lori i talem se ol lesen long manis we ol pikinini i kasem eit yia betdei blong olgeta i moa spesel. Hem i soem ol pikinini ol klos we oli bin werem taem oli bin kasem wan nem mo wan blesing, mo hem i tokbaot dei we odinens ia i bin tekem ples.

“Hem i taem we i stret gud blong lukluk long ol blessing blong tempol kavenan,” Lori i talem. “Oltaem mifala i mekem wan poen blong tijim se joes blong kasem baptaes, hem i fas step blong stap rere from ol blesing blong tempol.”



Mifala I Mekem I Kam Wan Famle Bisnis

Monika, wan mama we i gat fo pikinini, i talem se i gud blong yusum ol pikinini we oli moa olfala blong oli gat pat, sapos i posibol, blong oli helpem ol yangfala brata mo sista blong rere. “Taem oli stap harem ol yangfala brata mo sista oli testifae mo serem eksperiens blong olgeta, i rili givim paoa,” hem i talem. Lori i talem bakegen se samtaem oli askem ol pikinini we oli rere blong baptaes blong tijim wanem we oli bin lanem long ol yang brata mo sista blong olgeta.



Mifala I Yusum Hemia Olsem Wan Misinari Tul

Taem gel blong Daniel i kasem eit yia, hem i bin save se bae gel blong hem i wantem serem dei ia blong baptaes blong hem wetem ol fren we oli no memba blong Jos. Mekem se famle blong olgeta i bin agri blong givimaot ol invitesen blong baptaes blong Alison long ol fren blong skul mo raon long ples we oli stap long hem. Oli bin askem ol fren ia blong karem i kam long taem blong baptaes ol ves long Baebol we oli laekem. Afta long baptaes, Alison i makem ol ves long niufala skripja blong hem mo raetem nem blong ol fren blong hem long saed blong ves ia.

"I tru, olsem famle blong hem, mifala i bin tekpat long dei ia. Be mifala i bin lego hem tu i stap nomo wetem ol fren smol taem afta i talem long olgeta olsem wanem hem i filim," Daniel i talem. "I bin wan spesel taem blong luk pikinini blong mifala i stap soem wan eksampol."

Mifala I Praktisim Intaviu blong Bisop

Kimbeli, wan mama blong ol pikinini we i stap kam long yia blong kasem baptaes, i tingbaot taem hem i wokbaot i go long ofis blong bisop blong kasem intaviu blong baptaes taem hem i bin gat eit yia. "Mi bin fraet!" Kimbeli i talem.

Naoia hem i traem blong mekemsua se ol pikinini blong hem oli no fesem ol filing ia blong fraet. Hem mo hasban blong hem i bin toktok long ol pikinini blong tufala abaat intaviu blong bisop mo askem olgeta ol kwestin abaat baptaes long wan wei olsem we oli stap gat tru intaviu. Ol intaviu ia i mekem moa bitim we blong mekem ol pikinini i save gud wetem ol wei blong intaviu—oli leftemap tingting blong ol pikinini blong tingting hevi long wanem kavenan blong baptaes i minim long olgeta.

Mifala I Gat Wan Gudfala Janis

Ol papa mo mama ia, oli kwik blong poenemaot se oli no bin mekem eni samting we i tumas blong rere ol pikinini blong olgeta blong kasem baptaes mo konfemesen, be plante long olgeta i bin yusum ol toktok olsem "wetem kea" mo "i semmak oltaem" blong tokbaot ol lesen we oli bin tijim truaot ol yia. "Mifala i mekemsua ol pikinini blong mifala oli bin andastanem se hemia i bin wan impoten step long ol laef blong olgeta, mo i wan impoten samting," Kimbeli i talem. "Mifala i bin mekemsua se mifala nao i bin rere long olgeta, mo no stap hop se ol Praemerij tija i bin stap tijim olgeta."

Hem i wan gudfala janis we mifala i bin kasem blong helpem mekem ol pikinini we mifala i lavem oli rere blong kasem baptaes mo konfemesen! Taem bae mifala i mekem wetem prea, Lod bae i stap wetem mifala blong mekem gud ol fas eksperiens ia blong mekem kavenan i kam wan strong fandesen blong save gro gud long saed blong spirit long fiuja. ■

Long nekis tu pej, ansarem sam kestin we ol pikinini oli gat long saed blong baptaes mo konfemesen.

NOT

1. Boyd K. Packer, "Teach the Children," *Liahona*, 16 Mei 2000.

Andastanem Baptae

I Kam long Marisa Widison

Ol Magasin blong Jos



Huia bae i baptaesem mi?

Huia we bae i baptaesem yu, i nindim blong gat prishud—paoa blong mekem samting long nem blong God. Taem Jisas i bin wantem blong kasem baptae, Hem i bin go long Jon Baptae, we i bin gat prishud (luk long Matiu 3:13).

Man we i baptaesem yu bae i kasem raet long bisop o branj presiden.



Bae mi nidim blong go andanit long wota blong kasem baptae?

Jisas i bin baptaes andanit wota, we i minim se Hem i bin go daon fulwan andanit long wota mo kam antap kwiktaem (luk long Matiu 3:16). Hemia nao olsem wanem bae yu kasem baptae. taem yu kasem baptaes long wei ia, i rimaenem yumi se yumi livim bihaen olfala laef blong yumi mo folem wan niu laef we yumi dediketem blong givim seves long God mo ol pikinini blong Hem.



Wanem promes mi mekem taem mi kasem baptae?

Taem yu kasem baptae, yu mekem wan kavenan, o wan promes wetem Papa long Heven we i wok long tu wei. Yu promesem Hem se bae yu mekem sam samting, mo Hem i promes blong blesem yu. Kavenan ia oli tokbaot insaed ol prea blong sakramen we oli stap talem evri Sandei (luk long D&C 20:77–79). Yu promes:

- Blong tingbaot Jisas Kraes.
- Blong obei ol komanmen blong Hem.
- Blong tekem long yuwan nem blong Kraes, we i minim se blong putum ol wok blong Hem fastaem long laef blong yu mo mekem wanem Hem i wantem be i no wanem we wol i wantem.

Taem yu kipim promes ia, Papa long Heven i promes se Tabu Spirit bae i stap wetem yu mo bae Hem i fogivim ol sin blong yu.



Wanem ia Tabu Spirit?

Presen we i Tabu Spirit i wan long ol impoten presen we i kam long Papa long Heven. Baptaes blong yu long wota i no fulwan kasem we ol man we oli gat Melkesedek Prishud oli givim yu wan blesing blong kasem Tabu Spirit (luk long Jon 3:5).

Tabu Spirit i wan memba blong Godhed. Hem i testifae long saed blong Papa long Heven mo Jisas Kraes mo i helpem yumi save wanem i tru. Hem i helpem yumi blong kam strong long saed blong spirit. Hem i wonem yumi long denja. Hem i helpem yumi blong lanem samting. Tabu Spirit i save helpem yumi filim lav blong God.

Taem oli konfemem yu wan memba blong Jos, Tabu Spirit i save stap wetem yu oltaem sapos yu jusum raet.



From wanem mi mas kasem eit yia stret blong kasem baptaes?

Lod i tijim se ol pikinini oli no save kasem baptaes kasem taem we oli bigwan inaf blong andastanem wanem i defren bitwin raet mo rong, mo ol skripja i talem se long eit yia nao (luk long Moronae 8:11-12; D&C 29:46-47; 68:27).



I Kam long Elda
Jairo Masagardi
Blong Olgeta Seventi

Kolosap long Tempol

Blong plante pipol, tempol i givim i kam ol filing we oli kam long heven we kwiktaem yu save filim insaed long hat.

Bifo oli singaotem mi wan memba blong Seken Kworom blong Olgeta Seventi, mi mo waef blong mi i bin spendet sam yia blong wok long ol tempol blong Kampinas mo Sao Polo Brasil. Long tugeta tempol, oltaem mi sapraes se pipol we oli pas long saed blong tempol, bae oli kam kolosap long tempol mo bae oli stop, go insaed mo askem moa abaot tempol.

Taem oli go insaed, mifala i talem long olgeta se bae oli no save go moa from oli mas folem stret fasin blong rere gud. Afta bae mifala i eksplenem stamba tingting blong tempol, serem sam stamba doktrin blong gospel, mo invaetem olgeta blong mitim ol misinari. Blong plante gud pipol, tempol hemwan i olesem wan misinari from i givim ol filing we i kam long heven we i save kwiktaem go long hat.

Mi mo waef blong mi Elisabet i save mo witnesem stret, paoa blong ol kaen filing ia. Kolosap 40 yia i pas finis, wan gudfala fren mo wan we i wok wetem mi, wan memba blong Jos, i bin stat blong tokbaot gospel wetem mifala long wan nomol storian. Long wanwan taem, hem i bin sendem ol misinari blong visitim mifala. Mifala i bin laekem ol misinari mo agri blong tekem ol lesen, be mifala i no intres tumas long wanem oli gat blong tijim.

Samting ia i bin jenis long Oktoba 1978, taem we fren blong mi i invaetem sam fren, wetem mifala, i go long



open haos blong Sao Polo Brasil Tempol. Hem i bin rentem sam bas we hemwan i pem blong mekem se ol fren blong hem i save joenem hem long tempol, kolosap 80 kilomita longwe.

Taem Elisabet i bin go insaed long ples we oli stap mekem baptaes long hem, hem i bin filim wan samting we hem i neva gotru long hem bifo, wan samting we hem i luksave afta olsem Tabu Spirit. Filing ia i bin wan bigfala glad long hat blong hem. Hem i bin save long taem ia se Jos i bin tru mo i bin Jos ia nao we hem i bin wantem joenem.

Wan sem filing olsem i bin kam long mi long en blong open haos, taem oli bin tekem mifala i go long siling rum mo kasem tijing long ol famle we i no save finis. Doktrin ia i bin tajem mi. Mi bin gat sakeses wetem wok blong mi, be mi bin filim sol blong mi i emti. Mi no bin save wanem nao bae i fulumap emti spes ia, be mi filim se i mas gat wan samting wetem famle. Be longwe, long siling rum, ol samting i stat blong kam klia long maen mo hat blong mi.

Blong sam dei, ol misinari i bin kontaktem mifala bakegen. Taem ia nao mifala i bin intres bigwan blong harem mesej blong olgeta.

Ol elda i bin leftemap tingting blong mifala blong prea wetem glad abaot trutok. Mi plan se hemia i bin wan wei ia nomo we mi *save* prea long hem. Mi bin save se mi no save mekem wan komitmen blong joenem Jos sapos mi nogat wan testemoni. Mi bin wari blong go kolosap long Papa long Heven blong askem wan konfemesen long Hem, be long semtaem, mi bin sua se Hem i save ansarem mi. Mi bin serem wetem Hem ol samting we mi wantem tumas we i stap insaed long hat blong mi mo askem Hem blong givim mi wan ansa we bae i mekem mi filim sua se joenem Jos i bin wan stret rod.

Long nekis wik long Sandei Skul, fren blong mifala we i bin invaetem mifala i go long open haos blong tempol i bin sidaon bihaen long mi. Hem i lei i kam long fored mo

stat blong toktok long mi. Ol toktok we hem i bin talem i bin stret samting we mi bin prea from blong save. Mi no bin gat tu tingting se Papa long Heven i bin stap toktok long mi tru long hem. Long taem ia, mi bin wan strong mo had man, be hat blong mi i bin sopsop mo mi bin stat blong krae. Taem we fren blong mi i finis blong toktok, hem i bin invaetem waef blong mi mo mi blong kasem baptaes. Mitufala i bin akseptem.

Long 31 Oktoba 1978, sam wik afta long eksperiens blong mifala long Sao Polo Tempol, mifala i bin kasem baptaes mo konfemesen. Long nekis dei, mitufala i bin tekempat long nambatu sesen blong dedikesen blong Sao Polo Brasil Tempol. Wan yia afta, mitufala i bin gobak long tempol wetem tufala boe blong mitufala we bae oli sil yet long mitufala olsem wan famle. Evri trifala taem ia i bin naes tumas, mo oli ol memori we bae mifala i no save fogetem. Mifala i bin gohed blong gat ol filing ia taem mifala i stap go mekem tempol wosip truaot long ol yia.

Twante-eit yia afta long dei afta baptaes blong mifala, mi mo waef blong mi i bin stanap bakegen long Sao Polo Brasil Tempol. Oli jes singaotem mi olsem tempol presiden. Hem i bin wan naes eksperiens blong mitufala blong wokbaot long ol veranda blong haos blong Lod mo blong filim bakegen naes filing we i olsem stamba samting long jenis blong laef blong mitufala.

Tempol i gohed blong karem i kam, long mi mo waef blong mi, wan bigfala glad. Taem mitufala i luk wan yang kapol i go insaed long tempol blong sil olsem wan famle we i no save finis, mitufala i filim bigfala hop.

Plante pipol raon long wol oli stap rere blong harem mesej blong gospel. Oli bin filim se oli tosta semmak long wanem we mi bin filim moa bitim 30 yia i pas finis. Tempol mo ol odinens blong hem, oli fulap long paoa we i save mekem man we i tosta i nomo tosta mo fulumap ol spes. ■

SAMTING I BIN RONG WETEM PLEN BLONG MI

Wan naet taem we mi stap drae-vem plen blong mi long graon we i fulap long ol pasenja long rod blong hem, mi bin filim se samting i rong wetem stia blong plen. Blong konfemem ol filing blong mi long saed blong spirit, mi stopem plen ia mo tanem raon blong 360 digri. I no luk se wan samting i rong.

Mi bin tingting, "Bae mi tekof mo mekem ol pasenja i go long ples we oli wantem go long hem long stret taem, o bae mi tanem raon nomo i gobak long get?" Mi bin save se sapos mi gobak bae i mekem plen let blong wan longfala taem. Ol plen oli gat raet blong travel long wan wei nomo; Bae mi mas wet blong olgeta we oli kontrolem trafik long graon

blong givim spes long mi blong travel long nara daereksem. Afta mifala i mas wet long man we i stap fiksim ol plen blong kam jekem plen ia. Spos plen i let, i save mekem problem long kampani blong plen mo ol pasenja we oli gat ol pipol blong mitim mo ol nara flaet blong tekem i go long narafala kantri. Mi stap tingting tu se olsem wanem dipatmen blong mentenens bae i tekem ripot blong mi se plen ia i bin gat wan problem, we i no gat pruf long hem be wan strong filing nomo.

Olsem kapten blong plen ia, mi bin risponsibol long laef blong mifala, mekem se mi plan blong folem filing blong mi ia mo gobak.

Taem mifala i kasem get, mi bin

talem long man blong mekanik se mi filim wan samting i bin rong wetem plen be mi no bin save se wanem nao trabol. Hem i no bin biliv se i bin gat wan problem.

"Ating hem i from rod blong yu i wetwet," hem i talem. "Ating yu bin glis long kolta." Be hem i bin agri blong lukluk long ol pat blong stia long fored blong plen. Afta we hem i jekem, hem i bin askem mi blong karemaot ol pasenja blong hem i save ron mo testem plen.

Taem hem i kambak afta 30 minit, hem i bin wari. Long taem blong tes, hem i bin harem wan pat blong plen we i gohed blong mekem noes. Taem hem i yusum brek blong tanem raon blong kambak long get, hem i lusum kontrol long plen mo kolosap hem i kamaot long rod blong plen.

Wan gud jekap i soem se oli no bin fiksim gud ol brek long naet bifo. Sapos bae mi lan afta long flaet blong mifala, bae ol brek oli no wok, mo bae mi save lusum kontrol blong plen.

Mi bin kasem wan nara plen blong paletotem, mo mi bin go sef mo putum gud ol pasenja blong mi long ples blong olgeta, afta tri aoa.

Mi glad we mi bin lisin long smol voes blong Spirit. Mi save se Spirit bae i lidim yumi sapos yumi lukao-tem blong Lod i givhan long yumi mo lisin long voes blong Spirit we i stap kam. ■

Kreg Wili, Yuta, YSA

Mi stap tingting tu se olsem wanem dipatmen blong mentenens bae i tekem ripot blong mi se plen ia i bin gat wan problem, we i no gat pruf long hem be wan strong filing nomo.



STAP FAENEM GLAD LONG LAEF

Long wan taem mi bin stap ridim wan toktok blong jeneral konfrens we i kam long Elda Rijad G. Skot blong Kworom blong Olgeta Twelef Aposol. Nomata mi bin harem mo ridim toktok ia bifo, wan laen blong toktok i bin kasem ae blong mi mo i stap long maen blong mi.

Sam aoa afta, boe blong mi, we i bin stap long wan apatmen wetem ol fren blong hem, i bin kam mekem wan visit. Hem i bin go long wan fultaem misin mo i bin go long kolej blong sam semesta. Hem i no bin sua wanem rod long saed blong eduke-sen nao bae hem i tekem, mo wanem wok nao bae hem i skul from. From se hem i bin taed mo filim se skul, blong naoia, i blong westem taem mo mane nomo, nao hem i stopem ol stadi blong hem i stap mo stat blong wok fultaem.

Hem i bin talem long mi se wan long ol fren blong hem i givim tingting ia blong oli go long wan aelan long Bahamas o long Kareibien, kasem ol wok, mo pleiplei blong sam manis. Boe blong mi i bin glad tumas from tingting ia. Mi bin luksave olsem wanem olsem wan laef eksperiens we man i fri tumas blong mekem samting, i save pulum tingting blong wan yang man.

Long stret taem ia, toktok blong Elda Skot i kam long maen blong mi. Mi bin pikimap *Ensign* mo ridim pat ia long boe blong mi: "Yu yu stap ia long wol from wan tabu stamba tingting. I no blong kasem entetenmen o blong oltaem lukaotem hapines blong wol ia. Yu stap ia blong oli testem yu, blong pruvum yuwan se yu save kasem moa blesing we God i gat blong yu. Hemia i rili nidim fasin blong save wet longtaem." ("Finding Joy in Life," *Ensign*, Mei 1996, 25).

Boe blong mi i no talem wan toktok, i tekem wan magasin ia, i go, mo ridim fulwan toktok ia. Afta, hem i talem se bae hem i nomo go long aelan trip blong hem.

Long wan stret taem, hem i bin go long skul blong polis; wan rod we i lidim hem blong go mitim fuja waef blong hem. Tufala i bin mared long Mesa Arisona Tempol, mo tedei tufala i gat tri naesfala pikinini. Long 2010, boe blong mi i finisim bajela digri blong hem, mo i tru se hem i "faenem glad long laef blong hem."

Trip blong boe blong mi ia, ating bae i bin wan gud eksperiens; be long

narasaed, i save kam wan samting we i denja long saed blong spirit. Evri taem mi luklukbak long eksperiens ia, Spirit i tajem hat blong mi.

Mi talem tangkyu from ol toktok blong ol profet, mo tangkyu from i bin kam long mi blong tingbaot wan toktok we i bin helpem mi blong givan. Mi talem tangkyu se boe blong mi i bin lisin long wan mesenja blong Lod, mo i letem Spirit i wok long hem. Mi save se plante blesing mo fulap sore oli kam taem yumi lisin mo folem ol tijing blong Sevya mo ol wokman blong Hem. ■

Karen Rokwud, Aedaho, YSA



Taem boe blong mi i bin talem long mi se wan long ol fren blong hem i givim tingting ia blong oli go long wan aelan long Bahamas o long Kareibien, kasem ol wok, mo pleiplei blong sam manis, toktok blong Elda Skot i kam long maen blong mi.

TELEFON I OF

Long Maj 1997, taem we mi stap long siti blong Rasia long Rostov on Don, mi mo hasban blong mi i bin kasem baptaes long Jos blong Jisas Kraes blong Ol Lata-dei Sent.

Taem mi bin stap stadi ol doktrin blong Jos, mi bin kasem ansa long plante long ol kwestin blong mi. Mi bin intres blong lanem abaot plan blong fasin blong sevem man, hemia wetem praktis blong baptaes blong olgeta we oli ded. Mi bin sapraes blong lanem se yumi save kasem baptaes from ol olfala blong yumi we oli bin ded longtaem finis.

Wan yia afta long baptaes blong mitufala, misin presiden i bin invaetem mitufala blong rere blong go long tempol. Olsem pat blong mekem mitufala i rere, mitufala i stat blong mekem famle histri wok. Wan dei taem we mi stap tingting blong mekem wok ia, telefon i ring. Mama blong hasban blong mi i ring. Mi bin askem hem sapos hem i save sendem wan lis blong ol olfala long saed blong famle blong hasban blong mi we oli ded finis. Hem i bin sapraes mo talem se baptaes blong ol dedman i no doktrin blong Kraes, be i wan samting we ol

Momon nomo oli mekemap. Mi no bin sua se bae mi ansarem hem olsem wanem from mi no save gud ol skripja we i abaot doktrin ia.

Taem mi stap tingbaot olsem wanem blong ansa, telefon i of. Blong wan minit mi no sua long wanem i bin hapen, be mi putumdaon telefon mo go long bedrum blong mi. Mi tekem Niu Testeman long ol han blong mi, mi nildaon blong prea, mo askem Papa long Heven blong soem long mi wea nao bae mi save faenem ansa.

Long en blong prea blong mi, mi openem Baebol. Mi bin filim olsem se wan man i bin talem long mi blong ridim ves 29 long stret pej we mi bin openem i stap. Mi bin stap long japta 15 blong Fas Korin, we i tokbaot doktrin blong baptaes blong ol ded man.

Papa long Heven i bin ansarem prea blong mi long sem taem ia nomo mo hemia i bin tajem mi mo i mekem mi sapraes. Hem i bin wan gudfala filing.

Mi bin stap tingting plante abaot eksperiens ia taem mi sek nomo se telefon i ring bakegen. Hem i bin mama blong hasban blong mi we i askem se from wanem telefon i bin of. Mi talem long hem se mi no bin save, be afta mi askem hem blong openem Baebol blong hem mo ridim Fas Korin 15:29.

Sam dei afta, wan lis blong ol famle we oli ded finis i bin stap long tebol blong mi. Mama blong hasban blong mi i bin ridim skripja ia, mo naoia hem i bilivim se Sevya, tru long Aposol Pol, i bin tijim doktrin blong baptaes blong olgeta we oli ded.

God i bin promesem ol bigfala blesing long olgeta we oli mekem wok blong pemaot man. Mi save se hemia i tru. ■

Seda Meliksetian, Armenia



Mama blong
hasban blong mi
i bin talem long mi se
baptaes blong ol dedman
i no doktrin blong Kraes
be i wan samting we ol
Momon nomo oli mekemap.

WEA NAO MI SAVE KAREM WAN MAGASIN OLSEM IA?

Taem mi stap long wan trip wetem famle blong mi long Nevada, YSA, i go long Alaska, YSA, mi statem stori wetem wan longfala, naes, gud woman long narasaed laen blong jea.

Hem i bin askem mi wea nao mi stap go, mo mi bin talem long hem se mifala i stap go long Juno, Alaska, blong visitim boe blong mifala mo famle blong hem. Hem i bin talem long mi se hem i blong Las Vegas. Afta, wetem krae, hem i talem se hem i stap go long Juno blong visitim papa mo mama blong hasban blong hem blong gat wan memori seves blong hasban blong hem, we hem i bin maredem hem blong 20 yia. Hem i jes ded i no longtaem from hem i kasem kansa.

Mi bin luk i go kros long narasaed laen blong jea mo tingting long miwan se mi laki tumas blong save plan blong fasin blong sevem man mo blong kam wan man blong wok long tempol long Las Vegas Nevada Tempol. Mi stap tingting se wanem mi save mekem blong woman ia blong helpem hem i filim moa gud.

Wantaeom nomo, i kam klia long mi, mi tingbaot wan kwot we i kam long Profet Josef Smit we mi bin givimaot long Rilif Sosaeti. Taem we hem i bin oganaesem Rilif Sosaeti, hem i bin stap luk se ol sista “bae i oli flae blong givhan long wan strenja; bae oli kap-saedem oel mo waen long ol soa hat blong olgeta we oli harem nogud; bae oli stopem ol wota blong ae blong ol pikinini we oli no gat papa mo mama, mo mekem hat blong wido i glad bakegen” (*Teachings of Presidents of the Church: Joseph Smith* [2007], 452).



Mi stap tingting se wanem mi save mekem long woman ia, we hasban blong hem i jes ded, blong helpem hem i filim gud bakegen.

Mi luk i go kros long narasaed jea wan moa taem. Mi luk wan strenja we i harem nogud, wan widow wetem wan soa hat. Mi tingbaot se mi bin ridim Julae 2011 *Ensign* eli long dei ia. I gat insaed sam stori we i save leftemap tingting we mi ting se i save givim sam strong tingting mo kamfot long hem.

Mi pulum strong paoa blong tingting blong mi i kam wanples, mi openem magasin long wan stori, mo askem hem blong ridim. Mi stap luk-lukgud hem, mo bin sapraes se hem i ridim gud—evri laen. Taem hem i finis, hem i ridim wan nara stori.

I klia we wan samting we hem i ridim i tajem hat blong hem. Hem i holem magasin ia i go fas long jes

blong hem mo afta hem i waepem wota long ae blong hem.

“Wea nao mi save kasem wan magasin olsem ia?” hem i askem mi. Mi talem long hem se hem i save kipim. Afta hem i ridim sam moa.

Taem mifala i kasem Juno, hem i holem han blong mi, i luk stret i go long ae blong mi, mo talem, “Tangkyu.”

Mi bin lanem wan bigfala lesen long eksperiens ia. Yumi gat ol strenja raon long yumi wetem ol soa hat we oli nidim wan kaen toktok blong lefemap tingting, mo oli nidim blong save wanem we, yumi, olsem ol Lata-dei Sent, i save. ■

Saron Reta, Nevada, YSA

*Samtaem yu mas livim sam
gud samting from samting
we i moa gud.*

STAP JUSUM PAT IA WE

I Moa Gud

I Kam long Matiu D. Fliton

Ol Magasin blong Jos

Wan dei Soltan Suks blong Seged, Hungari, i bin sapraesem kayak koj blong hem mo talem long hem se bae hem i no go long Jemani blong wan kompetisen.

“Hem i bin long sem dei blong baptaes blong mi, mekem se mi talem no,” Soltan i talem.

Long 17 yia, Soltan i bin winim plante kompetisen long kayak. Hem i wan popula spot long Hungari, mo Soltan i bin gud—gud inaf blong mekem se janis blong kam wan profesenol i save kam ril. Be i no blong mestem wan kompetisen nomo, Soltan i no longtaem afta, bae i givap long kayak fulwan. Hem i gat wan samting we i moa gud blong mekem.

Kaya i bin wan gud samting blong Soltan. Afta plante yia we hem i stap wok wetem koj blong hem, hem i bin lanem blong kontrolem hemwan, blong stap obej, mo blong stap wokhad. Soltan i bin lanem tu blong no akseptem ol samting mo fasin we i save spolem wanem we hem i stap hadwok from. I no bin wan isi laef; hem i stap hemwan, mo blong kam profesenol bae i tekem moa taem. Praktis blong wan profesenol hem i tekem 12 aoa long wan dei mo hem i mas kompit long Sandei.

“Kayak i bin tekem plante taem blong mi,” Soltan i talem. “Mi bin fulataem long hem. From samting ia, mi bin livim plante samting aot long laef blong mi.”

Hem i from wanem Soltan i plan se hem i no save givim hemwan long tugeta samting ia, gospel mo kayak. Long 2004, hem i bin talem long koj blong hem se bae hem i nomo go long kayak bakegen.

Eli long yia ia, ol misinari oli bin stat blong tijim mama blong Soltan. Hem i no bin stap long ol lesen. Sloslo hem i bin akseptem invitesen blong mama blong hem long baptaes blong hem. Be taem hem i bin go insaed long bilding blong jos, wanem hem i bin filim i bin tajem hat blong hem. Soltan i bin agri blong mitim ol misinari, from long wan saed, hem i save luksave se hem i semmak long olgeta.

“Mi intres long ol misinari, from long mi, oli ol nomol pipol nomo, be oli laef long wan standet we i moa hae,” hem i talem.

From hae standet ia nao we Soltan i bin stap long hem finis olsem wan man blong kayak, hem i rere blong akseptem ol tijing blong gospel olsem wan samting we i gat valiu. Hem i bin kasem baptaes tu manis afta.

Long fas taem, hem i bin ting se bae hem i save gohed blong go long kayak, be no go long ol kompetisen long ol Sandei. Be from hem i wan man we, taem hem i komitim hem long wan aktiviti o kos, i wantem mekem gud long samting ia, nao hem i bin jusum blong givap fulwan long kayak.

Hem i bin traem wan taem blong mekem kayak olsem wan samting we hem i laekem blong mekem nomo afta long baptaes blong hem. Taem hem i bin mekem olsem, koj blong hem i bin askem hem blong help blong tijim ol narawan mo oganaesem ol trip from se hem i no wantem kompit. Be hem i no bin wantem komitit hem long kayak—o eni nara aktiviti—we i save spolem hem long wok blong hem olsem wan disaepol.

Mekem se Soltan i hangemap barel blong hem mo i dediketem hemwan long seves long Jos wetem wan desisen we hem i tekem folem tingting we wan Presiden Howod W. Hanta (1907–95) i bin mekem taem hem i bin mared. Presiden Hanta i bin wan sakses man blong miusik biffo, mo i plei plante tul blong miusik. Long naet taem, hem i bin stap plei long wan okestra, be laefstaal blong olgeta we hem i plei wetem olgeta oli no folem ol gospel standet. Mekem se Presiden Hanta i putum ol tul blong miusik blong hem i stap, mo karemaot olgeta nomo taem long ol famle aktiviti blong singsing tugeta.¹

Soltan i misim kayak, be hem i luksave se lav blong hem blong kayak i bin strong inaf blong kompit, mo i save winim, lav blong hem blong Lod sapos hem i bin stap kolosap tumas long spot ia.

Semmak prinsipol ia hem i blong eni aktiviti we i tekem yumi longwe



*Soltan Suks, blong
Seged, Hungari, i bin
givap long kayak blong
gat moa taem blong
gospel.*

long huia nao God i wantem yumi blong kam. Long wanwan long yumi, i gat sam samting we i moa gud blong yumi no gat olgeta, taem yumi go tru laef—nating sapos oli ol gud samting—i no nid blong yumi lusum laef blong yumi we i no save finis blong kasem olgeta samting ia.

“Jos i bin kam laef blong mi,” Soltan i talem. “Afta we mi save se kayak i no wan samting blong laef from sapos mi wantem stap aktiv, be i save stap olsem wan samting we mi laekem nomo blong mekem, nao i mekem i isi blong givap long hem. From, mi wantem mekem Papa long Heven i stamba tingting blong mi.”

Soltan i bin stat blong stadi gospel wetem sem paoa we hem i yusum long ol nara samting we hem i stap wantem kasem long laef. Hem i bin putum wan gol blong go long wan misin. Hem i bin wantem blong stap long kantri blong hem mo tijim ol narafala man.

Hem i bin go long misin long Hungari, mo naoia hem i wok olsem wan hae skul Inglis tija. Hem i go hed blong putum gospel olsem fas samting. “I gat ol samting we yumi nidim blong givap from oli blokem rod blong God,” hem i talem. “Hem i isi blong givap long ol nogud samting taem yumi save se yumi mas mekem. Plante taem yumi no luksave wetaem nao yumi mas givap long ol gudfala samting blong kasem ol samting we oli moa gud. Yumi ting se from oli no ol nogud samting, bae yumi save kipim mo gohed yet blong folem plan blong God.” Be Soltan i save se yumi mas givap ol gud samting sapos oli mekem se yumi no folem plan we God i gat long yumi. ■

NOT

1. Luk long Eleanor Knowles, *Howard W. Hunter* (1994), 81.

“Olsem wanem nao bae mi eksplenem long fren blong mi se fasin blong brekem loa blong jastiti i no wan gudfala tingting nating?”

Papa long Heven i wantem yumi blong stap hapi mo klin inaf blong gat Spirit blong Hem, mekem se Hem i givim yumi ol komanmen blong helpem yumi kipim ol tingting, ol toktok, mo ol aksen blong yumi long ol stret ples. Loa blong jastiti i helpem kipim tabu paoa blong mekem pikinini insaed long mared laef nomo. Wan risen Hem i komandem se tabu paoa blong mekem pikinini i tekem ples nomo bitwin hasban mo waef, hem i from “ol pikinini i save bon i kam nomo tru wan man mo woman we tufala i bin mared folem loa olsem hasban mo waef.¹

Yu save serem wan kopi blong *Blong Ol Yut Oli Kam Strong* wetem ol fren blong yu. Hem i givim sam risen from wanem i gud blong kipim loa blong jastiti: “Taem yu klin gud long saed blong seks, rere yuwan blong mekem mo kipim ol tabu kavenan long tempol. Yu rere yuwan blong bildim wan strong mared mo blong karem i kam long wol ol pikinini olsem pat blong wan famle we yu lavem mo we i no save finis. Yu protektem yuwan aot long ol samting we i save spolem yu long saed blong spirit mo tingting we i save kam taem yu gat rile-sensip long saed blong seks bifo mared. Yu protektem yuwan tu long ol rabis sik. Kipim yu stap klin gud long saed blong seks i helpem yu gat tras mo hapi mo i mekem se fasin blong yu blong mekem gud desisen naoia mo long fiuja we i kam bae i kam antap gud.”²

Tempol



Papa blong yumi long Heven i gat ol stamba tingting blong yumi evriwan, mo stamba tingting ia i save kamtru long tempol. Yumi mas klin inaf blong go insaed long tempol blong mekem se ol famle blong yumi i save sil blong oltaem. Bae yumi stap wetem Papa blong yumi long Heven bakegen, mo hemia we i moa impoten, bae yumi gat wan glad we i no gat en, we man we i no klin inaf i no save gat.

Alofa M., 18 yia, Samoa

Mared mo Famle



Oli bin leftemap tingting blong yumi blong stap klin gud long saed blong seks blong mekem se yumi save stap klin inaf blong go insaed long tempol mo kipim ol tabu kavenan. Sapos yumi folem loa blong jastiti, yumi save bildim wan strong mared mo famle long fiuja. Setan i stap oltaem blong temtem yumi, be tru prea, ol skripja, mo ol gud fren, yumi save winim samting ia.

Resti M., 16 yia, Filipin

Oi Ansa we Oli No Stret

I gat plante samting we i kamaot we oli no stret taem wan i brekem loa blong jastiti, be i no evriwan we yu lanem abaot olgeta long helt klas. Taem yu brekem loa blong jastiti i save ronem Spirit i aot long laef blong yu, mekem olgeta we i stap kolosap yu oli harem nogud, mo mekem yu filim nogud long yuwan. Mi wantem givim tingting ia blong yu lukluk wan Momon vidio mesej we oli singaotem “Jastiti: Wanem Ol Limit?” [long youth.lds.org long Inglis, Potugal, mo Spanis].

Matiu T., 17 yia, Yuta, YSA

Fasin blong Stap Klin Gud mo Respek

Taem yumi stap folem loa blong jastiti, yumi stap klin gud long ae blong God, yumi respektekem yumiwan, mo yumi helpem ol narawan blong respektekem yumi tu. Sapos yumi obei loa blong jastiti, yumi soem se yumi ol pikinini blong God mo we yumi sapotem ol hae standet. Bae yumi no akseptem fasin blong stap rigret. Taem yumi obei long Papa blong yumi long Heven, speseli abaot loa ia, laef blong yumi bae i moa hapi long wol ia mo long wol we i stap kam.

Aliana G., 19 yia, Filipin

Wan Tabu Presen

Sapos presen blong tabu paoa blong mekem pikinini i no impoten, spesel presen ia we i kam long God bae oli tritim olsem wan samting nating. Blong givim wan presen bae i no filim olsem se oli presen long yu sapos man we yu givim long hem i no ting se hem i spesel. Wan i mas oltaem tritim tabu paoa blong mekem pikinini olsem wan tabu samting; from yumi evriwan i ol tempol blong God mo i mas stap klin mo klin gud olsem wan tempol.

Jeron Z., 15 yia, Aedaho, YSA

Sprit I Stap Wetem Yumi



Taem yu stap klin aot long sin, bae yu hapi tumas mo bae yu kasem blesing. Ol bodi blong yumi oli olsem ol tempol, mo Papa long

Heven "i no stap long ol tempol we oli no tabu" (Alma 7:21). Mekem se taem yumi stap klin long sin, Spirit i save stap wetem yumi.

Marian P., 14 yia, Akansas, YSA

Oi Impoten Kwestin

Ansarem ol kwestin blong fren blong yu taem yu askem sam kwestin ia: "Be olsem wanem sapos fiuja hasban o waef blong yu i stap lukluk yu naoia?" Evri pipol we mi bin harem abaot olgeta we oli bin brekem loa blong jastiti, oli bin rigret. "Be olsem wanem sapos fiuja pikinini blong yu i askem sapos yu bin brekem loa blong jastiti?" Fren blong yu i nidim blong lanem olsem wanem loa blong jastiti i impoten naoia, bifo wan boe o gel i askem kwestin ia. Yu nidim blong kipim yuwan i klin mo klin gud blong lidim wan hapi, helti laef mo no gilti from tabu loa ia we yu bin brekem.

Robin K., 13 yia, Yuta, YSA

Klin Fasin mo Jastiti



Lod i glad long klin fasin mo jastiti, mo evri samting i mas hapen long stret taem blong hem. Loa blong jastiti i wan komanmen we i kam long Lod. Prea mo kampani blong Spirit oli ol samting we oli stret gud evriwan blong save se, blong stap klin, i wan blesing.

Selene R., 18 yia, Nikaragua

Insaed long Mared

Bae mi eksplenem long fren blong mi se, blong brekem loa blong jastiti, i wan nogud tingting from tabu paoa blong mekem pikinini, oli mekem nomo blong ol kapol we oli mared follem loa. Taem yumi brekem loa blong jastiti, yumi lusum Tabu Spirit long laef blong yumi.

Ogustina A., 15 yia, Gana

OL NOT

1. "Famle: Wan Ofisol Toktok I Go long Wol," 35538 852.
2. Luk long *For the Strength of Youth* (buklet, 2011), 35.



BLONG STAP BREKEM LOA BLONG JASTITI I MEKEM MAN I HAREM NOGUD

"Long medel blong
stap strong long

kavenan blong mared, Lod i givim raet long hasban mo waef blong yusum ol tabu paoa blong mekem pikinini, we i gat lav mo i naes, mo blong i tekem ples nomo folem ol limit blong loa ia we Hem i putum i stap. . . .

"Be, ol praevet rilesensip ia, Lod i stopem blong oli happen aotsaed long komitmen blong stap strong long mared, from oli wok agensem ol stamba tingting blong Hem. Insaed long tabu kavenan blong mared, ol kaen rilesensip ia oli folem plan blong Hem. Taem oli eksperiensem long eni narafala wei, oli stap agensem tingting blong Hem. Oli mekem man i harem nogud long saed blong filing mo spirit. Nomata olgeta we oli tekpat oli no luksave se i stap happen naoia, be bae oli luksave afta. Rabis fasin long saed blong seks i kam wan wol we i blokem paoa blong Tabu Spirit."

Elda Rijad J. Skot blong Kworom blong olgeta Twelef Aposol, "Making the Right Choices," *Ensign*, Nov. 1994, 38.

KWESTIN WE I STAP KAM

**"Wanem nao mi mas
mekem taem wan
topik i kamaot long
skul we i go agensem
ol gospel tijing, olsem
abosen (fasin blong
kilim bebi i ded taem
hem i stap yet long bel
blong mama)?"**

Sendem ansa blong yu bifo 15 Mei i kam long liahona@ldschurch.org o tru long adres ia

Liahona, Questions & Answers 5/13
50 E. North Temple St., Rm. 2420
Salt Lake City, UT 84150-0024, USA

Bae oli save jekem mo oli save katemaot sam pat blong ol ansa blong oli stret gud mo oli klia blong man i andastanem.

Infomesen mo raet ia i mas stap insaed long imel o leta blong yu: (1) ful nem blong yu, (2) deit we yu bon long hem, (3) wod o branj, (4) stek o distrik, (5) leta blong yu blong givim raet, mo, sapos yu no gat 18 yia yet, papa o mama blong yu i mas raetem leta i kam blong givim raet (oli akseptem tu tru long imel) blong publisim ansa mo foto blong yu.



I Kam long Presiden
Tomas S. Monson

OLSEM WANEM BLONG GIVIM SEVES LONG OL PRISHUD KOLING

Long laef blong yu, yu bin tingting hevi finis long wanem nao praes blong sol blong man? Long laef blong yu, yu bin gat askem yuwan abaot **paoa we yumi save kasem yet** blong mekem samting, we i stap insaed long wanwan long yumi?

Wan taem, mi bin go long wan stek konfrens taem foma stek presiden blong mi Pol K. Jael i bin tanem i go long Doctrine and Covenants 18 mo stat blong ridim ples we Lod i bin talem se **praes blong ol sol** oli bigwan tumas long ae blong God (luk long D&C 18:10).

Afta Presiden Jael i askem, “wanem nao praes blong sol blong man?” Hem i traem blong no singaotem wan bisop, stek presiden, o hae kaonsela blong givim wan ansa. Be, hem i jusum presiden blong wan kworom blong ol elda.

Man ia, wetem fes we i sek, i bin stap kwaet nomo blong wanem we i luk olsem wan taem we i no save finis, mo afta hem i talem, “Praes blong sol

blong man hem i **hamas hem i save mekem blong kam olsem God.**”

Evriwan we i bin stap i bin tingting hevi long ansa ia. Presiden Jael i bin gohed wetem mesej blong hem, be mi, mi stap gohed blong tingtingbak long ansa ia we i kam tru long insperesen.

Blong go aot, blong tij, blong tajem ol spesel sol we Papa blong yumi long Heven i bin rere long olgeta from mesej blong Hem, i wan bigfala wok. Sakses, oltaem, hem i no simpol. Oltaem, bifo long sakses ia, i gat **wota blong ae, ol tes, tras, mo testemoni.**

Ol wokman blong God oli kasem kamfot long stret tok blong Masta we i talem: “Bambae mi stap wetem yufala oltaem” (Matiu 28:20). Bigfala mo naes promes ia i sastenem yufala, ol brata blong Aronik Prishud, we oli singaotem yufala long ol posisen blong kam lida long ol kworom blong ol dikon, ol tija, mo ol pris. Hem i leftemap tingting blong yufala long taem we yufala i stap rere blong go givim seves long misin graon. Hem i kamfotem yufala long ol smol taem ia we tingting i givap, we i kam long evriwan.

Lod i talem se **yumi no mas wari blong mekem gud samting,** from yumi stap putum fandesen blong wan bigfala wok. Mo aot long ol smol samting, ol bigfala samting oli kamaot long hem.

Lod i nidim wan hat mo wan maen we i wantem mekem samting (luk long D&C 64:33–34). **Wan strong fet, wan tras we i stap oltaem, mo wan strong tingting blong wantem mekem**

samtina, oltaem, oli ol fasin we oli blong olgeta we oli givim seves long Lod wetem evri hat blong olgeta.


Sapos eni brata we i stap harem voes blong mi, mo filim se hem i no rere, o i no save mekem inaf blong ansa long singaot ia blong givim seves, blong sakrifaes, blong blesem ol laef blong ol narafala man, nao tingbaot trutok ia, se: **“Huia we God i singaotem, God i mekem hem i kwalifae. ■**

I Kam long wan toktok blong jeneral konferens blong Epril 1987.

OLSEM WANEM YU BIN YUSUM HEMIA LONG YUWAN?

“Wetem save ia, se Lod i stap long saed blong mi, i helpem mi tingbaot from wanem mi stap go long wan misin: blong givim seves long Lod mo karem ol narawan oli kam long Sevya blong yumi, Jisas Kraes. Mi save se bae Hem i no save givim mi wan samting we mi no save winim taem mi stap long misin blong mi.”

Dilan M.,
Yuta, YSA




KAONSEL WETEM LOD

Taem mi bin gat 15 yia, mi bin laekem wan gel long klas blong mi long skul mo mi wantem blong deitem hem. Hem i naes tumas, be mi stap tingting sapos mi save askem hem blong go aot bifo mi gat 16 yia. Mi tingbaot Alma 37:37, we i talem se: "Askem advaes long Lod long evri wok blong yu, mo bae hem i ldidim yu blong gud." Mekem se hemia nao wanem mi bin mekem. Mi bin prea mo mi wet blong sam dei blong kasem ansa blong Lod bifo mi mekem wan desisen.

Wan dei long jos, bisop blong mi i bin singaotem mi i go long rum mo invaetem mi blong toktok long nekis Sandei. Traem ges se wanem topik? No mas deit bifo yu gat 16 yia. Mi bin filim se hemia i bin ansa blong Lod long mi, mo hem i no. Olsem wanem nao bae mi tijim wan samting we mi no bin praktisim?

From mi bin askem advaes long Lod, mi bin save lanem tingting blong Lod abaoat laef blong mi, mo tu, blong kamaot long temtesen. Mi save se sapos yumi askem advaes long Lod, bae Hem i talem tingting blong Hem long yumi mo bae Hem i blesem yumi bigwan.

Eduardo Olivera, Sera, Brasil



SKRIPJA BLONG MI WE MI LAEKEM TUMAS

LUK LONG DOCTRINE AND COVENANTS 24:8

Skripja ia i mekem mi filim gud taem mi stap go tru wan tes from hem i talem, "Mi stap wetem yu, iven kasem en blong ol dei." Hemia i minim se sapos mi lukaotem Hem, Papa long Heven bae i oltaem stap wetem mi kasem en blong laef blong mi.

Aleks Otis, Nuevo Kasas Grandes, Meksiko



PAOA BLONG ATONMEN

Taem ol misinari oli bin tijim mi, ol stamba topik blong ol lesen blong olgeta, oltaem i Jisas Kraes mo Atonmen blong Hem. Oli bin eksplinem se Atonmen i wan presen we i kam long Jisas Kraes blong wanwan long yumi. Hem i wan presen we yumi save yusum evri dei long ol laef blong yumi taem yumi fesem ol tes o taem yumi mekem sin. Paoa blong Atonmen i leftemap tingting, i hilim, mo i helpem yumi gobak long stret mo smol rod we i lid i go long laef we i no save finis.



Taem ol misinari oli bin serem hemia, mi bin gat wan strong filing we i testifae long mi se, i tru, mo mi bin disaed blong joenem Jos.


Afta sam taem, mi bin disaed blong go long wan misin from mi bin wantem blong helpem ol naraman blong save abaot ol gudfala presen ia. Tru long fasin blong tij mo serem abaot Atonmen, mi bin luk ol narafala man oli jenis i go long wan niu wei blong laef. Wan ful jenis i bin kam, i no from mi bin harem nomo abaot Atonmen be taem mi yusum long laef blong mi tu.

Mi save se Atonmen i tru. Taem yumi invaetem paoa blong hem long ol laef blong yumi, nomata wanem situesen yumi stap long hem, evri samting bae i oraet mo bae yumi filim glad.

Ioriti Taburuea, Kiribati



Holi Baebol



Buk blong Momon


FROM WANEM YUMI NIDIM

BUK BLONG MOMON

Sam pipol i save askem yu from wanem yumi nidim Buk blong Momon taem we yumi gat Baebol finis. Wanem i tru, Jisas Kraes i bin testifae se samting ia bae i hapen (luk long 2 Nifae 29:3). I gat plante risen from wanem Buk blong Momon i impoten long dei blong yumi (eksapol, luk long 2 Nifae 29:7–11). Hemia sam nomo long ol risen from wanem hem i impoten.

Wan Narafala Witnes blong Jisas Kraes

Ol skripja oli soem long yumi wan fasin blong yusum plante witnes blong stanemap trutok long Jos blong Kraes. Buk blong Momon i mekem nambatu witnes long Baebol olsem wan testemoni blong Kraes. Elda Mak E. Pitason (1900–84) blong Kworom blong Olgeta Twelef Aposol



TUFALA WITNES

Baebol i wan witnes blong Jisas Kraes; Buk blong Momon i wan narawan. From wanem nambatu witnes ia i impoten tumas?

Smol eksapol ia bae i save help: Hamas stret laen yu save droem tru wan singgel poen long wan pis pepa? Ansa hem i : i no gat en. Blong smol taem, tingting se singgel poen ia i representem Baebol mo ol handred stret laen ia we i go tru long poen ia oli ripresentem ol defren intepretesen blong Baebol, mo we wanwan long ol intepretesen ia i ripresentem wan defren jos.

“Be wanem nao bae i hapen sapos long pis pepa ia i gat wan nambatu poen we i representem Buk blong Momon? Hamas stret laen yu save droem bitwin tufala poen ia: Baebol mo Buk blong Momon? Wan nomo. I gat wan intepretesen nomo long doktrin blong Kraes we i mekem testemoni blong tufala witnes ia i laef.

“Bakegen mo bakegen, Buk blong Momon i stap olsem wan witnes we i konfemem, i kliarem, i joenem wanem we Baebol i tijim.”

Elda Tad R. Kalista blong Presidensi blong Olgeta Seventi, “The Book of Mormon—a Book from God,” *Liahona*, Nov. 2011, 75.



JOENEM STORIAN



i bin talem wan taem, "Stamba risen we yumi gat Buk blong Momon hem i from long maot blong tu o tri witness bae evri trutok i save kamaot. (Luk long Seken Korin 13:1.) Yumi gat Baebol; yumi gat tu Buk blong Momon. Tugeta tufala i mekem tu voes—tu buk blong skripja—we i kam long tu defren pipol blong bifo we i stap wanwan, tugeta i serem testemoni abaot tabu trutok ia blong Lod Jisas Kraes."¹ Presiden Ezra Taft Benson (1899–1994) i bin ademap, "Yumi no mas fogetem se Lod Hem-wan i givim Buk blong Momon olsem stamba witnes blong Hem."²

Ful Gospel

Yumi save se "ol samting we i klia mo gudgudfala . . . oli bin tekemaot long" Baebol truaot long taem (1 Nifae 13:40) Buk blong Momon i kliarem doktrin blong Kraes mo i karem fulnes blong gospel i kam long wol bakegen (luk long 1 Nifae 13:38–41). Ekapol, Buk blong Momon i helpem yumi save se baptaes i mas hapen long fasin blong draonem man andanit long wota 3 Nifae 11:26) mo we ol smol pikinini oli no nid blong kasem baptaes (luk long Moronae 8:4–26).

I Stap long Medel blong Jos we I Kambak

Josef Smit i bin testifae se Buk blong Momon i "ki ston blong bilif long God blong yumi."³ From yumi save finis hemia, hem i no wan mistek se Jos blong Jisas Kraes blong Ol Lata-dei Sent i bin oganaes long 6 Epril 1830 hemia 11 dei stret afta we Buk blong Momon i kamaot blong fastaem blong oli salem

long pablik long 26 Maj 1830. Jos i no bin oganaes kasem taem we ki ston skrijpja blong hem i bin kamaot long ol memba blong hem.

Wan Blesing long Ol Laef blong Yumi

Abaot Buk blong Momon, Josef Smit i bin tijim se "wan man bae i kam moa klosap long God sapos hem i folet ol tijing blong hem, bitim eni narafala buk."⁴ Hem i gat paoa blong jenisim ol laef—wetem blong yu mo olgeta we yu serem Buk blong Momon wetem olgeta. Presiden Henri B. Aering, Fas Kaonsela long Fas Presidensi, i bin testifae, "Paoa blong Buk blong Momon long fasin blong yu, long paoa mo strong tingting blong yu, blong stap wan witnes blong God i mas hapen. Doktrin mo ol gudfala eksapol insaed long buk ia, bae oli leftemap yu, oli lidim yu, mo mekem tingting blong yu i strong. . . . Taemyu stadi wetem prea long Buk blong Momon, bae i bildimap fet long God Papa, long Pikinini blong Hem we Hem i lavem, mo long gospel blong Hem. Bae i bildimap fet blong yu long ol profet blong God, blong bifo mo blong naoia. . . . I save tekem yu i kam kolosap long God bitim eni nara buk. I save jenisim wan laef blong kam moa gud."⁵ ■

OL NOT


1. Mark E. Petersen, "Evidence of Things Not Seen," *Ensign*, Mei 1978, 63.
2. *The Teachings of Ezra Taft Benson* (1988), 204.
3. Josef Smit, long Fas toktok long Buk blong Momon.
4. Josef Smit, long Fas toktok long Buk blong Momon.
5. Henry B. Eyring, "A Witness," *Liahona*, Nov. 2011, 69–70.

Truaot Epril, bae yu stadi abaot Aposasi mo Restoresen long ol prishud kworom mo Yang Woman mo ol Sandei Skul klas blong yu (sapos wod o branj blong yu i gat ol niufala lesen long lanwis blong yu). Buk blong Momon we i kamaot i bin wan impoten pat blong Restoresen. Afta we yu ridim storian ia, tingbaot olsem wanem laef blong yu i defren from yu gat Buk blong Momon. Yu save raetemdaon ol filing blong yu long jenol blong yu mo tingting blong serem olgeta wetem ol narafala man taem yu testifae long hom, long jos, o long sosol media.



FASIN BLONG GRO LONG GUDFALA GRAON: FETFUL YUT LONG YUGANDA

I Kam long Sindi Smit



Taem oli akseptem mo laef folem gospel blong Jisas Kraes, ol yut long Yuganda, oli stap luk fet mo hop i stap gro raon long olgeta.

Long hat blong Is Afrika, naesfala kantri blong Yuganda i kasem blesing wetem ol plantesen blong suga ken mo banana tri—mo wetem ol yang pipol we oli rere blong akseptem mo laef folem gospel blong Kraes.

Fas stek long Yuganda i bin ognaes long 2010. Jos i gro kwik, wetem plante yang man mo yang woman long wanwan wod mo branj.

Leftemap Wan Flag, Stap Wan Eksampol

Ol yang woman long wan wod oli bin kasem inspiresen tru ol ti-jing blong Sista Ilein S. Dalton, Yang Woman jeneral presiden, abaot klin fasin: “Naoia hem i taem blong yumi wanwan blong girap mo openem flag ia mo singaot i go long wol from klin fasin.”¹ Ol yang woman i bin klaem i go long top blong wan hil mo save luk i go daon long taon blong olgeta mo leftemap golden flag we i wan simbol blong promes blong olgeta blong stap ol eksampol blong klin fasin. Tugeta oli singsing “Antap Antap Tumas” (*Hymns*, no. 5).

Ol yang woman ia oli bin leftemap stret mo gud standet blong olgeta. Fasin blong olgeta blong obei i bin mekem ol testemoni blong olgeta i kam strong moa mo i tajem ol narafala man.”² Mo olsem wan flag, eksampol blong ol yang woman ia i bin flae i go long ful wol.

Olsem plante yang woman long Yuganda, Sandra i stap wokbaot moa bitim wan mael blong go long jos, i help blong klinik mitinghaos long

Fraedei, mo go long seminari long Satedei. Long wik, hem i girap bifo 5 klok long moning blong ridim ol skul buk, mo afta hem i wokbaot i go long skul, kambak hom afta 6 klok afternuun. Hemi bin mestem wan yia blong skul from problem blong mane be hem i fesem ol jaljenj blong hem wetem gudfala tingting: “Gospel i bin helpem mi tumas blong stanap stong mo no muvmuv.”

Sandra, hemwan nomo long hom i memba blong Jos, be papa mo mama blong hem i sapotem hem long Jos seves, olsem blong stap helpem hem taem wod i klinik ol yad blong wan lokol ples blong lukaotem ol pikinini we oli no gat papa mo mama. Ol famle blong hem

Sandrea





Top: Oi Yut oli atendem wan stek faesaad tugeta.

Antap: Susan (long medel), wan we i ronwe long ples blong hem i kam long Yuganda, i faenem pis long gospel mo hem i bin karem i kam wetem hem ol brata mo sista blong hem mosam nrafala pikinini i go long jos.

Long medel: Oi yang woman blong wod ia oli glad blong wok long Progres blong Miwan.

Raet: Denis i bin livim wan spot blong wan profesenol futbol tim blong prijim gospel. Hem mo ol nrafala yang man long kworom blong ol pris, oli bin sakrifaes mo winim ol jalenj blong go long ol misin.

oli bin luk olsem wanem gospel i bin helpem hem blong stap strong, iven taem hem i fesem ol problem. Taem hem i luklukbak long weaples hem i kasem paoa long hem, Sandran i talem: "Taem mi go long jos, mi filim olsem se mi putum long mi klos blong faet blong God" (luk long Efesas 6:11–17).

Susan, we i jes joenem jos, i lavem Jos. Hem i blong Saot Sudan; famle blong hem i bin ronwe long ol hadtaem mo bin gat blesing blong kasem ol misinari long Yuganda. Olsem wan we i ronwe long ples blong

hem, hem i bin faenem pis mo proteksen long gospel. Long ol Sandei, bae hem i tekem ol yangfala brata mo sista blong hem i go long jos, tugeta wetem 10 moa pikinini we oli no memba blong Jos. Afta ded blong wan famle memba, hem i gobak long Saot Sudan, mo wet blong Jos i save stanap long eria blong hem. Tugeta, Susan mo Sandra, i stap fesem ol jalenj, be tufala i dipen long God mo stap glad long ol blesing blong stap laef folet gospel blong Jisas Kraes (luk long Alma 32:6–8, 43).

Stap Sakrifaes blong Go long Wan Misin

Ol yang man blong Yuganda, oli stap plei futbol taem oli ol smol boe, mo yusum ol stik we oli taetem strong blong mekem wan balong. Stat long taem we hem i bin yang, Denis i bin gat wan talen long saed blong spot, mo hae skul blong hem i bin givim hem wan skolasip blong plei blong tim blong olgeta. Afta we hem i komplitim skul, wan profesenol tim i bin wantem givim wan wok long hem, mo bae hem i kasem wan pei, wan ples blong silip, mo kakae. Hem i bin wan





drim we i kam tru, be Denis i bin save se hemia bae i save spolem ol plan blong hem blong go long wan misin samtaem afta long yia.

Denis i wantem tumas blong mekem wanem Papa long Heven i wantem hem blong mekem we i kam strong long hem we i mekem se hem



i no bin wantem kasem temtemsen blong stap long tim taem i kam long stret taem blong hem blong go long wan misin. Plante pipol i bin kwestinem joes blong hem, be Denis i sua se hem i mekem stret desisen—blong hem mo ol narafala wan. “Tufala smol brata mo smol sista blong mi, oli jes baptaes,” hem i talem. “Mi neva ting se sista blong mi bae i wantem harrem gospel. Taem mi luk God i stap mekem merikel long famle blong mi, i givim mi wan hapi hop blong fija blong mi.”

Long wod blong Denis, ol yang man oli stadi long *Prijim Gospel blong Mi* evri wik. Oli bin kam olsem wan tim; oli stap wok kolosap wetem ol fultaem misinari mo stap tekem ol fren oli go long ol Sandei miting mo ol nara aktiviti, olsem basketbol mo futbol gem long wik. Ol pris oli bin baptaesem ol fren mo ol narawan oli bin help blong tij wetem ol misinari. Afta sam yia, tim ia blong ol

yang man i bin mekem ful wod i kam strong moa, mo fo long olgeta, wetem Denis, oli bin kasem leta we oli singaotem olgeta blong go long Kenia Nairobi Misin.

Oli bin folem kaonsel blong Elda Deved A. Bedna blong Kworom blong Olgeta Twelef Apostol blong “kam ol misinari longtaem bifo yu givim ol misin pepa blong yu.”³ Oli bin mekem olsem taem oli bin stap wok tugeta olsem wan kworom, wan tim we i moa gud bitim eni narawan.

Evri fo misinari ia oli bin winim ol jalenj blong mekem se oli save givim seves. Wilbafos i eksplenem: “Kolosap mi lusum hop blong go long wan misin [from mane blong hem], be afta, mi ridim Matiu 6:19–20: ‘I nogud yufala i stap hivimap ol gudgudfala samting blong yufala long wol ya . . . yufala i mas hivimap ol gudgudfala samting blong yufala long heven.’ Mekem se wetem strong tingting mo komitmen, mi bin save kasem gol blong mi blong go givim seves long wan fultaem misin. Mi lavem misinari wok. I no gat wan samting i moa gud bitim we blong lukaotem fastaem kingdom blong Papa God.”

Hop blong Wan Fija

Ol yut blong Yuganda oli stap help blong bildim kingdom blong God long ples ia, wetem bigfala hop long fija. Nomata i no gat wan tempol long Is Afrika, ol yut oli stap lukluk fored long taem we bae oli mared long wan tempol longwe. Wan stek aktiviti i bin lukluk moa long fasin blong rere blong go insaed long tempol, mo long en, wan memba blong stek presidensi i bin serem testimoni blong hem: “God i lavem yufala. Yufala i fija blong Jos long Yuganda.” Ol yut we oli

stret mo gud ia oli stap mekem finis bigfala wok ia.

Ol yang man mo woman blong Yuganda oli stap sakrifaesem ol samting blong wol from ol blesing we bae i stap blong oltaem. Oli bin planem sid blong fet mo oli stap lukaotem mo kea gud long olgeta (luk long Alma 32:33–37). Olsem wan tri we frut i kavrempa (luk long Alma 32:42), ol yut oli bin serem glad blong gospel long gudfala graon ia. ■

Sindi Smit i bin stap long Yuganda taem we hasban blong hem i bin stap wok longwe, mo naoia tufala i stap long Yuta, YSA.

OL NOT

1. Illein S. Dalton, “A Return to Virtue,” *Liahona*, Nov. 2008, 80.

2. Ilain S. Dalton, *Liahona*, Nov. 2008, 80.

3. Deved A. Bedna, “Becoming a Missionary,” *Liahona*, Nov. 2005, 45.





Wanem / Wan TRU FREN?

I Kam long Ilein S. Dalton

Yang Woman Jeneral Presiden

Mining blong wan fren i jenis long wol tedei, long wan taem we yumi evriwan i konek tru teknoloji. Tedei, yumi save tingting se yumi gat plante “fren.” Hem i tru: yumi glad blong save kasem infomesen mo stap save oltaem wanem i stap hapen long ol laef blong plante we yumi save gud long olgeta, semmak wetem olgeta fren blong naoia mo bifo, mo tu, pipol we yumi no mitim stret we yumi singaotem olgeta ol fren blong yumi.

Long wol blong sosol media, toktok ia “fren” oltaem oli yusum blong tokbaot *ol kontak* bitim *ol rilesensip*. Yu save sendem wan mesej long “ol fren” blong yu, be hemia i no sem samting

olsem we blong gat wan rilesensip wetem wan man fes tu fes.


Samtaem ol wari blong yumi i stap long tingting ia blong *gat* ol fren. Ating yumi mas lukluk long tingting ia blong *stap* wan fren.

I gat plante mining blong wanem i minim blong stap wan fren. Bae mi no save fogetem se mi harem Elda Robt D. Hels blong Kworom blong Olgeta Twelef Aposol i tokbaot wanem i minim blong stap wan fren mo paoa blong ol fren long ol laef blong yumi. Eksplenesen blong hem long mining ia i bin wan longtaem samting long laef blong mi. Hem i bin talem,

“Ol fren oli ol pipol we oli mekem i isi blong laef folem gospel blong Jisas Kraes.”¹ Folem tingting ia, blong stap wari long laef blong wan narafala man bifo yumi, hem i stamba tingting ia nao blong frensip. Hem i blong putum wan narafala man fastaem. Hem i blong stap ones tru, stap tru, mo stap klin long evri aksen. Ating toktok ia nao, *komitmen*, i talemaot stret ril mining blong frensip.

Taem gel blong mi Emi, i bin gat 15 yia, hem i bin mekem wan desisen abaot wanem kaen fren bae hem i lukaotem. Wan moning, mi bin luk kopi blong Buk blong Momon blong hem i open long Alma 48. Hem i bin makem ol ves we i stap tokbaot Kapten Moronae: “Mo Moronae i bin wan strong mo wan man we i gat paoa; hem i bin wan man we i gat save we i stret gud. . . Yes mo hem

i bin wan man we i bin stanap strong long fet long Kraes” (ol ves 11, 13). Long saed blong ol toktok ia, hem i bin raetem, “mi wantem deitem mo maretan wan man olsem Moronae.” Taem mi stap luk Emi wetem ol defren yang man we hem i gud fren wetem, mo afta, hem i deitem olgeta taem hem i kasem 16 yia, mi save luk se hemwan, hem i eksampol blong ol kwaliti ia, mo hem i helpem ol narafala man oli laef folem aidentiti blong olgeta olsem ol boe blong God, ol man we oli gat prishud, mo ol fiuja papa mo lida.



Ol tru fren oli lidim tingting blong olgeta we oli gud fren wetem, blong mekem se oli “go smol moa antap [mo] kam gud smol moa.”² Yufala i save helpem yufala wanwan, speseli ol yang man, blong rere from, mo givim seves long misin wetem ona. Yufala i save helpem yufala wanwan blong stap klin long tingting. Ol stret mo gud eksampol blong yufala mo frensip i save givim wan filing we i no save finis, i no long ol laef blong olgeta we yu gud fren wetem olgeta nomo, be tu, blong ol jeneresen we oli stap kam.

Sevya i bin singaotem ol disaepol blong Hem, ol fren blong Hem. Hem i talem:

“Loa blong mi i olsem, se yufala i mas lavlavem yufala, olsem we mi mi lavem yufala.

“I no gat man we i lavem ol fren blong hem moa, i winim man we i lusum laef blong hem blong i sevem ol fren blong hem.

“Mo sipes yufala i stap mekem ol samting we mi mi talem long yufala, yufala i fren blong mi.

“Mi mi no moa save singaot yufala, se ol man blong wok blong mi, from we man blong wok, hem i no save ol samting we masta blong hem i stap mekem. Naoia mi mi stap singaot yufala, *ol fren* blong mi, from we olgeta samting ya we mi mi harem long Papa blong mi, mi talemaot finis long yufala” (Jon 15:12–15; oli ade-map italic).

Taem yu laef mo serem gospel blong Jisas Kraes, bae yu pulum ol pipol i go long yu we oli wantem blong kam ol fren blong yu—i no jes wan kontak tru long sosol media long intanet, be ol kaen fren we Sevya i stap olsem eksampol tru ol toktok blong Hem mo eksampol blong Hem. Taem yu traehad blong kam wan fren long

ol narafala man mo letem laef blong yu i saen, eksampol blong yu bae i blesem ol laef blong plante we yu mekem fren wetem. Mi save se taem yu lukluk moa blong kam wan fren long ol narafala man, olsem we ol profet i eksplenem, mo ol eksampol insaed long ol skripja, bae yu hapi, mo bae yu kam wan gud eksampol long wol, mo wan dei bae yu kasem ol promes blesing we oli talem insaed ol skripja abaot tru frensip. Promes ia [long ol skripja] i talem long yumi se wanem we yumi mekem long laef long wol ia bae i semmak long nekis laef, be, i tu taem moa wetem ol blesing we i no save finis. (Luk long D&C 130:2). ■

OL NOT

1. Robert D. Hels, “This Is the Way; and There Is None Other Way,” insaed long *Brigham Young University Speeches of the Year, 1981–82 Speeches* (1982), 67.
2. Gordon B. Hinckley, “The Quest for Excellence,” *Liahona*, Sept. 1999, 8.

OL KI TINGTING ABAOT FRENSIP

“Jusum ol fren we oli serem ol valiu blong yu mekem se yu save mekem oli kam strong moa mo leftemap tingting blong wanwan long yufala blong save laef folem ol hae standet.

“Blong gat ol gud fren, stap olsem wan gud fren . . .

“Taem yu lukaotem blong kam wan fren long ol narafalawan, yu no putum ol standet blong yu i go daon.”

Luk long For the Strength of Youth (buklet, 2011), 16.



INVITESEN blong Mi long **FASIN BLONG SEVEM MAN**

I Kam long Emeson Jose da Silva

Olsem wan yang man, mi bin visitim plante jos mo mi bin konfius from wanwan i bin tijim defren intepretesen blong ol skripja. Mi no bin filim gud long fasin blong jik we mi faenem long sam long olgeta, mekem se mi givap nomo blong traem faenem wan jos blong go long hem.

Sam yia afta, wan fren blong mi, Kleiton Lima, i bin baptaes long Jos blong Jisas Kraes blong Ol Lata-dei Sent. Hem i no bin ta-lem long mi nomata we mitufala i bin gud fren, be sam taem afta, mi stat blong luk ol jenis long hem. Long ol Sandei, mi bin stap go oltaem long haos blong hem long moning blong mifala i save ple-iplei futbol, be mi no save faenem hem long hom. Hemia i bin ha-pen tu o tri Sandei i folfolem olgeta. I kam long taem we Kleiton i bin taalem long mi se bae hem i nomo save pleiplei futbol long ol



Sandei from hem i stap givim ona long dei blong Lod. Mi bin talem long hem, "Jos ia i mekem yu krangke."

Afta, Kleiton i bin invaetem mi blong go long jos. Mi bin givim hem wan eskius from mi no bin hapi yet wetem relijin. Blong 10 manis, Kleiton i bin tekem ol misinari i kam blong ti-jim mi, be oltaem, mi gat eskius blong miwan o talem long olgeta se mi bin bisi. Be hem i neva givap.

Wan dei long Jun, hem i bin invaetem mi blong go long wan danis blong Jos. Mi jikim hem, "Bae i gat plante kakae we i fri mo plante gel?" Wetem laf, hem i talem yes!

Mi mas talem se bel blong mi i winim mi. Mi bin visitim jos mo mi lavem. Evriwan i bin welkamem mi, mi bin kakae plante, mo mi bin gat intres blong atendem wan miting. Taem mi bin kam long jos long Sandei, mi bin mitim plante pipol mo mi bin harem ol testemoni blong olgeta. Mi no bin save Buk blong Momon, be mi bin filim Spirit blong Lod taem sam long ol memba blong

Jos oli bin testifae, "Mi save se Buk blong Momon i tru, se hemia i Jos blong Jisas Kraes, mo we Josef Smit i bin wan profet we God i singaotem." Mi neva bin filim gud olsem. Mi no wantem mitim ol misinari yet, be testemoni miting ia i bin tajem mi.

Long nekis wik, Kleiton i invaetem mi bakegen blong go long jos. Mi no save go from mi bin gat sam samting blong mekem. Mi save luk fes blong hem we i harem nogud taem mi bin talem long hem se mi no save sapos mi save go o no.

Be long Sandei moning, mi bin wekap wetem wan tingting blong wantem go long jos. Mi wekap long 6:50, we i bin had long mi, mo mi bin rere mo wet long Kleiton blong kam. Hem i bin sapraes taem hem i bin luk mi mi jenis gud mo stap wet. Long Sandei ia, bisop i bin tij abaot prishud. Mi bin filim strong Spirit mo gat wan filing se mi mas tekem ol misinari lesen. Long en blong Ol Yang Man miting, mi bin save se bae mi kasem baptaes.

Taem jos i finis, mi talem long Kleiton, "Mi wantem kasem baptaes!"

Hem i bin ting se mi bin stap tok fani nomo. Be afta, hem i talem: "Sapos mi singaotem ol elda, bae yu save mitim mi wetem olgeta?" Mi bin ansa yes.

Mi bin kasem tijing long tu gudfala elda. Taem mi bin harem mesej

blong Restoresen, mi kasem strong konfemesen se mi mas kasem baptaes. Be mi wantem blong save miwan sapos Buk blong Momon i tru. Ol elda oli bin makem Moronae 10:3–5 long Buk blong Momon blong mi mo invaetem mi blong prea mo askem God sapos hem i tru.

Long nekis naet, mi bin tingbaot se mi no bin ridim Buk blong Momon yet. Taem mi stat blong rid, mi bin filing wan strong spirit. Mi bin prea mo bifo mi finis, mi bin save se Buk blong Momon i tru. Mi glad tumas long God blong save givim ansa long prea blong mi. Mi bin baptaes long Julae 2006.

Samtaem afta mi bin sev olsem wan misinari long Brasil Kuiaba Misin, mo fren blong mi Kleiton i bin sev long Brasil Santa Maria Mision. Mitufala i bin mekem wanem we Kleiton i bin mekem blong mi: invaetem pipol blong kam long Kraes mo helpem olgeta blong kasem gospel we i bin kambak taem oli yusum fet long Jisas Kraes, stap sakem sin, kasem baptaes, mo kasem presen we i Tabu Spirit. Hemia i tru rod ia nao blong kasem fasin blong sevem man.

Oltaem, bae yumi invaetem ol fren mo ol famle blong yumi blong lanem abaot gospel ia, from Sevya i bin invaetem evriwan taem Hem i talem: "Kam long mi" (Matiu 11:28). Mi save se hemia i Jos blong Jisas Kraes, mo we naoia, i taem blong invaetem evriwan blong kam long Hem. ■



OL TEN WEI BLONG SAVE SE YU BIN JENISIM LAEF

I Kam long Teila Oton

Mi bin lanem long prishud miting se wan long ol stamba tingting blong Aronik Prishud i blong hel-pem mifala “i jenism laef i kam long gospel blong Jisas Kraes mo laef folet ol tijing blong Hem.”¹ Mi no bin sua se i minim wanem blong “jenism laef i kam long gospel blong Jisas Kraes.” Mi askem papa mo mama blong mi mo ol bigfala brata mo sista blong mi blong talem wanem oli ting se i minim, mo tugeta, mifala i bin toktok raon long plante wei we yu save luk sapos yu bin jenism laef.

Ating i gat plante narawan, be hemia ol 10 wei we mifala i bin kam antap wetem. From se fasin blong jenism laef i wan rod we i longfala, yumi no nid blong kam stret evri-wan long wanwan long ol eria ia naoia, be oli save helpem yumi save sapos yumi stap mekem progres.

1. Taem we yu bin jenism laef, yu no bin *save* nomo wanem yu mas mekem, be tu, yu bin *wantem* tumas blong mekem raet samting. Hem i no inaf blong jes no mekem wan samting we i rong from yu fraet blong oli kasem yu, o panisim yu. Taem yu jenism laef tru, yu rili wantem blong jusum raet.

2. Wan nara saen blong kam blong jenism laef, i we yu nomo wantem nating blong mekem rong samting. Ol Antae Nifae Lihae oli gudfala eksampol blong samting ia. Taem oli bin jenism laef i go long gospel blong Kraes, oli bin “mekem wan kavenan wetem God blong wok blong hem mo holem ol komanmen blong hem” (Mosaea 21:31). Olsem ol pipol blong Nifae we oli bin kasem tijing long King Benjamin, oli “nomo wantem blong mekem nogud

fasin" (Mosaea 5:2). Oli bin jenisim laef fulwan i go long gospel blong Kraes, mo ol temtesen blong Setan i no bin gat paoa ova olgeta.

3. Taem Yu jenisim laef, Yu wari moa long wanem nao tingting blong God bitim wanem we ol narafala man oli ting abaot Yu. Long skul blong mi long Indonesia, ol studen i stap drink tumas. Samtaem bae i temtem mi blong go aot mo pati taem evriwan i stap mekem olsem mo stap laf long Yu taem Yu no go. Brata blong mi, oli i bin invaetem hem blong dring mo pati plante taem, be hem i neva bin mekem—hem i bin stanap from wanem we hem i biliv long hem. I bin had, mo hem i bin spendem plante naet long

hom hemwan nomo. Taem ol studen oli stap talem tata long graduesen blong hem, sam pipol i bin talem long hem olsem wanem oli sapraes se hem i no save akseptem fos blong ol fren blong skul, mo blong stap tru long ol standet blong hem. Oli bin talem long hem hamas oli bin lukluk hem antap from samting ia. Hem i bin soem olsem wanem hem i bin jenisim laef taem hem i bin stanap agensem fos we i kam long ol studen fren blong hem.

4. Taem Yu jenisim laef, Yu traem bes blong laef folem gospel oltaem—i no long ol Sandei nomo o taem we i stret, be i mas evri taem. Ol aksen blong Yu oli no jenis folem huia Yu stap wetem o folem huia i

stap lukluk Yu. Taem ol fren blong Yu oli talem wan rabis fani tok o wantem lukluk wan rabis muvi, Yu no go folem nomo from Yu ting se i no gat man i stap lukluk Yu; be Yu stanap from wanem we Yu Yu biliv.

5. Taem Yu jenisim laef, Yu kam moa kaen mo gat lav mo sore taem Yu dil wetem ol narawan. Yu no mas jaj o tokbaot man o gosip. Yu kam blong save moa long ol filing blong ol naraman, mo i kam wan nomol samting blong faenem ol wei blong givim seves mo help. Sapos Yu stap wokbaot daon long holwei blong skul blong Yu mo wan studen i mestem ol buk blong hem, Yu no nid blong tingbaot wanem blong mekem. Yu stop semtaem mo help.




5.




WAN TRU ROD I GO LONG HAPINES

"Lod i wantem ol memba blong Jos blong Hem blong jenisim laef blong olgeta fulwan i go long gospel blong Hem. Hemia i wan tru rod ia nomo blong stap sef long saed blong spirit naoia mo gat hapines blong oltaem."

Elder Donald L. Holstrom blong Presidensi blong Olgeta Seventi, "Converted to His Gospel through His Church," *Liahona*, 15 Mei 2012.



6.



2.


Blong soem se bae oli stap tru long ol kavenan blong olgeta blong laef folem gospel, ol pipol blong Leman oli bin berem ol tul blong faet blong olgeta (luk long Alma 24).

7.



6. Taem yu jenism laef, fasin blong yu blong wantem prea i kam antap mo bae yu filim olsem we yu stap toktok stret wetem God taem yu prea. Bae yu oltaem faenem taem blong prea nomata yu filim olsem wanem o wanem i stap hapan long laef blong yu. Presiden Ezra Taft Benson (1899–1994) i bin talem long yumi, “Sapos yumi no filim blong prea, nao yumi mas prea kasem we yumi filim blong prea.”²

7. Taem yu jenism laef, yu lukluk fored long Sandei from hem i Sabat. Taem Sandei i kam, yu no tingting se: “O man, i wan dei we mi no save go aot wetem ol fren blong mi o go long muvi,” be yu tingting se: “Gud tumas, wan dei we mi save go long jos mo tingting long ol samting long saed blong spirit mo spendem taem wetem famle blong mi!”



8. Taem yu jenism laef, yu kipim ol komanmen mo yu no lukaotem ol eskius, faenem risen blong ol rong fasin blong yu, o traem blong faenem ol spesel risen blong brekem ol komanmen. No traem blong go bitim wanem we i raet; simpol nomo, yu obei long ol komanmen from yu save se hem i moa gud wei.

9. Taem yu jenism laef, yu lukluk fored blong pem taeting blong yu. Yu luk hemia olsem wan spesel janis mo filim se 10 pesen i no tumas, speseli taem yu komperem wetem ol blesing mo ol harem gud we yu kasem. Ol blesing ia oli moa bitim mane yu pem.

10. Taem yu jenism laef, yu wantem tumas blong helpem ol narafala man blong save trutok mo fasin blong stap hapi we yu bin

faenem. Wan gud eksapol insaed long ol skripja hem i drim blong Lihae we hem i wantem tumas blong serem ol swit frut blong tri blong laef wetem famle blong hem. Taem hem i tekem frut ia, hem i bin tingbaot fastaem blong no tekem tumas blong hemwan be blong lukaotem famle blong hem blong oli save tekem frut ia tu mo gat semmak fasin blong stap hapi (luk long 1 Nifae 8:12).

Long sot, yu save se yu stap jenism laef taem yu stat blong laef folem loa we i hae moa, we i gospel blong Jisas Kraes. Yu laef folem spirit blong loa ia semmak olsem yu laef folem toktok blong loa. Yu laef folem gospel long evri saed blong laef blong yu. Yu laef folem gospel fulwan, i no from yu mas mekem be from yu wantem blong mekem. Yu yu wan man we yu moa hapi mo naes, mo yu wantem blong kam man we Papa long Heven i wantem yu blong kam. Yu wantem kam olsem Jisas Kraes mo folem eksapol blong Hem. Taem yu kam man ia, yu bin rili jenism laef blong yu fulwan. ■

Teila Oton i stap long Java, Indonesia.

OL NOT

1. Luk long *Handbook 2: Administering the Church* (2010), 8.1.3.
2. Ezra Taft Benson, “Pray Always,” *Liahona*, 4 Jun 1990.

HADWOK I GUD MO **INIDIM**

Bae yu sapraes long wanem we yu save
mekem sapos yu gohed blong traehad.

(Luk long *For the Strength of Youth* [booklet, 2011], 40–41.)



Smol Misinari blong Bubuwoman Deni

I Kam long Emilia Maria Gimaraes Koria

"From taem we wan man i toktok wetem paoa blong Tabu Spirit, paoa blong Tabu Spirit i karem toktok ia i go long ol hat blong ol pikinii blong ol man" (2 Nifae 33:1).

Vito i bin stap wetem mama mo sista blong hem long hom blong Bubuwoman Deni. Bubuwoman blong Vito i bin sik mo i no save muvaot long bed blong plante wik. Hem i bin stap hemwan nomo long rum blong hem.

Vito i bin disaed se bae hem i save stap wetem Bubuwoman Deni. Evri dei, taem hem i kam hom afta skul, hem i tekem wan kopi blong *Liahona* i go long rum blong Bubuwoman mo ridim ol stori we oli stap long ol pej blong ol pikinini i go long hem.

Afta we hem i ridim evri kopi blong *Liahona* we famle blong hem i bin gat, hem i stat blong ridim Buk blong Momon mo Baebol long hem. Bubuwoman Deni i no bin wan memba blong Jos, be hem i lavem blong harem Vito i rid long hem. Hem i bin hapi blong lanem abaot gospel.

Bubuwoman i bin askem plante kwestin. Sapos Vito i no bin save

ol ansa, hem i askem Praemerij tija blong hem o lukluk insaed long ol skripja. Bubuwoman i bin sing-aotem Vito, smol misinari blong hem.

Bubuwoman Deni i bin talem Vito se hem i bin lanem plante samting long hem. Hem i promes se bae hem i go long jos wetem Vito taem hem i kam oraet. Wanem we hem i bin lanem i me-kem hem i wantem blong kam oraet gud mo stadi moa abaot gospel.

Taem Bubuwoman i oraet, hem i bin kipim promes blong hem. Hem i bin go long jos wetem Vito blong lanem moa abaot wanem we Vito i bin tijim hem. I no long-taem nating afta, Bubuwoman i kasem baptaes mo konfemesen. Vito i bin helpem hem blong lanem se gospel i tru.

Taem Vito i kam bigwan, hem i kam wan fultaem misinari long Boston Masajusets Misin. Bifo hem i go, hem i bin go long tempol—wetem Bubuwoman Deni. ■

Emilia Maria Gimaraes Koria i stap long Federal Distrik, Brasil.





I Kam long Elda
M. Rasel Balad

Blong Kworom blong
Olgeta Twelef Aposol

*Ol memba blong Kworom blong
Olgeta Twelef Aposol oli ol spesel
witnes blong Jisas Kraes.*

Jisas Kraes Hemwan i bin givim nem blong Jos (luk long Doctrine and Covenants 115:4). Ol toktok *Jos blong Jisas Kraes* i talemaot se hem i Jos blong Hem. *Blong Ol Lata-dei* i eksplenem

se hem i sem Jos olsem Jos we Jisas Kraes i bin stanemap taem Hem i bin stap long wol, be long ol las dei ia, jos ia i bin kambak bakegen.

Ol Sent i minim se yumi folem Hem mo traehad blong folem

tingting blong Hem.

Oli singaotem ol memba blong yumi, *Ol Momon*, from yumi biliv long Buk blong Momon. ■

I kam long “The Importance of a Name,”
Liahona, Nov. 2011, 79–82.




I Kam long Dasi Jensen

Taem Sol Lek Tempol i bin komplit long 1893, Ol Lata-dei Sent oli bin glad. I bin tekem olgeta 40 yia blong bildim tempol ia. From ol pikinini oli bin donetem mane blong helpem bildim tempol, Presiden Wilfod Wudrof i bin disaed blong holem faef spesel dedikesen sesen blong ol pikinini oli kam long olgeta.

Tedei ol tempol oli stap kavremap wol, mo ol pikinini oli stap help yet blong selebretem ol tempol we oli komplit. Luk olsem wanem ol pikinini oli bin stap tekpat bifo mo naoia. ■

Dasi Jensen i stap long Kalifonia, YSA.

I gat moa long 12,000 pikinini oli bin kam long Sol Lek Tempol blong mekem dedikesen. Ol pikinini ia we oli kam long Suga Haos Wod, oli bin tekem tren blong save kam.



Tikit ia i letem nomo ol pikinini we yia blong olgeta i kasem 16 yia blong tekpat long spesel dedikesen seves ia blong Sol Lek Tempol. Ol aposol mo ol memba blong Fas Presidensi oli bin toktok long ol pikinini insaed long tempol.



Evi wik taem oli bin stap bildim Gilbet Arisona Tempol ol Praemeris pikinini blong Gilbet Arisona Haelan Stek oli bin putum wan gol blong givim seves long wan memba long ol wod blong olgeta.



Samtaem ol tempol oli dediketem bakegen afta we oli riperem mo bildim fulwan bakegen. Ol pikinini blong Praemeris oli singsing mo karem ol laet taem oli stap tekpat long selebresen blong nambatu dedikesen blong Angkorej Alaska Tempol.

Taem oli bin stap bildim San Diego Kalifornia Tempol ol Praemeris pikinini blong Meksiko i bin mekem wan naesfala tapi wetem plante kala blong tempol. Ol Jeneral Atoriti oli bin stanap long tapi ia long taem blong konaston seves long taem blong dedikesen.



Stap Selebretem Ol Tempol!



Oi Praemerि pikinini long Manitoba, Kanada, oli bin travel tri aoa i go long Rejina Saskatjwan Tempol blong tajem ol wol mo komitim olgeta blong go insaed wan dei.

Oi Praemerি pikinini long open haos blong Kiv Yukrein Tempol oli bin welkamem ol visita taem oli stap singsing "Mi Lavem blong Luk Tempol."



Bitim 800 Praemerи pikinini blong Wes Afrika i bin singsing "Mi Pikinini blong God" long kalja selebresen bifo oli dediketem Akra Gana Tempol.



Wanwan tempol i gat wan konaston we i soem yia we oli bin dediketem. Long taem blong dedikesen, ol Jeneral Atoriti oli silim konaston wetem simen. Aesak B. we i gat 9 yia i bin help blong putum simen long konaston blong Kansas Siti Misuri Tempol.

Oi Praemerи pikinini oli bin singsing long Presiden Godon B. Hinkli taem hem i bin kam blong dediketem Aba Naejeria Tempol.

Ol Tempol Kwestin mo Ansa

From wanem yumi gat ol tempol?

Ol tempol blong Jos blong Jisas Kraes blong Ol Lata-dei Sent oli ol tabu ples we yumi lanem ol trutok we i no save finis mo tekpat long ol tabu odinens.

Insaed long tempol, i olsem wanem?

Tempol i wan ples blong pis, blong stap revren mo i wan naes ples. Evriwan insaed long tempol i klin mo wok long oda. Evriwan i werem waet klos mo toktok wetem ol voes we oli kwaet.

Wanem i stap hapen insaed long ol tempol?

Wan waef i save sil long hasban blong hem, mo ol pikinini oli save sil long papa mo mama blong olgeta. Siling i mekem i isi blong ol famle blong stap tugeta blong taem

we i no save finis. Long tempol, ol man mo woman tu oli kasem wan presen we i ol blesing long saed blong spirit we oli singaotem endaomen. Oli save kasem endaomen blong olgeta mo save sil long bihaf blong olgeta we oli bin ded be oli no bin mekem ol tempol kavenan.

Wanem moa i stap hapen insaed long ol tempol?

Wetem siling mo endaomen, i gat ol nara odinens we oli mekem insaed long ol tempol. Ol pipol oli save kasem baptaes mo konfemesen long bihaf blong olgeta we oli no bin save joenem Jos taem oli bin stap laef. Taem yu kasem 12 yia mo yu klin inaf blong go insaed long tempol, yu save gat janis blong kasem baptaes mo kasem konfemesen long bihaf blong olgeta we oli bin ded be oli no bin save gospel.


Wanem i hapen sapos famle blong mi i no go long tempol yet?

Papa long Heven i save mo lavem yu mo famle blong yu. Hem i wantem evriwan blong gat ol blesing blong ol tempol odinens. Laef klin inaf blong go insaed long tempol. Putum wan gol naoia se bae yu kasem endaomen mo mared insaed long tempol sam dei. Papa blong yu long Heven bae i blesem yu mo famle blong yu. ■



"Ol yang fren blong mi . . . , oltaem gat tempol long ol plan blong yu. No mekem wan samting we bae i stopem yu blong go insaed long ol doa blong tempol mo tekpat long ol tabu mo blesing we oli no save finis."

Luk long Tomas S. Monson, "The Holy Temple—a Beacon to the World," *Liahona*, Mei 2011, 92.



Famle I Stap Tugeta Foreva

(We Oli Mekem I Kam Isi)

Ol toktok oli kam long Rut Muir Gadna
Miusik i kam long Vanja Y. Watkins

I laef $\text{♩} = 80-96$

1. Mi gat wan fam - le long wol ia.
2. Taem mi mi yang - fa - la no - mo

Ol - i gud tu - mas long mi
Bae mi re - re gud taem ia,

Mi wan-tem stap we - tem ol - ge - ta blong ol - taem no - mo.
Blong mi ma-red long tem - pol blong God blong ol - taem no - mo.

Kores

Fam - le i stap tu - ge - ta fo-re - va Tru plan blong God long Hev'n Ol -

taem mi wan-tem stap we - tem fam-le blong mi, Mo Lod i bin so-em rod long mi. Lod

i bin so - em rod long mi.

Ol toktok mo miusik © 1980 IRI. Niufala arenjmen © 2012 IRI. Oli holem evri raet.

Singsing ia oli save kopi long hem blong yusum long jos o long hom be i no blong mekem mane wetem.

Jisas Kraes i bin Putumbak Jos blong Hem long Ol Las Dei ia



Yu save yusum lesen mo aktiviti ia blong lanem moa abaot stamba toktok blong Praemerri blong manis ia.

Tingbaot se yu stap go lukaotem wan tresa. Wea nao bae yu go blong lukaotem tresa? Olsem wanem nao bae yu faenem? Bae i gat wan bokis blong tresa? Wanem bae i stap insaed?

Sam long ol tresa bokis ia i gat ol naesfala jen mo ol gol mane. Be olsem ol memba blong Jos blong Jisas Kraes blong Ol Lata-dei Sent, yumi gat wan tresa we praes blong hem i hae tumas: gospel blong Jisas Kraes

Plante pipol i no save abaot tresa ia, mekem se wan long ol wok blong yumi i blong serem wetem plante man we yumi save kasem.

Afta we Jisas mo ol Aposol blong Hem i ded, sam impoten gospel tijing

mo odinens i bin lus o jenis, hemia i gat baptaes, prishud atoriti, ol tempol, ol profet we oli laef, mo sakramen.

Evri gospel tresa ia oli bin putumbak tru long Profet Josef Smit. Papa long Heven mo Jisas Kraes i bin kamaot long Josef smit long Tabu Bus taem hem i bin prea blong save trutok.

Sam taem afta, Josef i bin kasem ol gol plet mo transletem olgeta i kam Buk blong Mormon. Insaed long Buk blong Mormon i gat ol tijing we oli impoten long yumi from i eksplenem ol trutok we oli bin lus. Yumi kasem plante blesing from yumi gat ol gospel trutok ia.

Wanem nao ol spesel tresa ia! ■

SKRIPJA MO SINGSING



- Luk long Doctrine and Covenants 35:17
- "The Sacred Grove," *Children's Songbook*, 87 (o wan nara singsing abaot Restoresen blong gospel)

YUMI TOKTOK

Serem olsem wanem ol tresa blong gospel blong Jisas Kraes i blessem famle blong yu.

MEKEM WAN GOSPEL TRESA BOKIS

Katemaot mo foldem tresa bokis ia olsem we i stap long droing andanit ia. Katemaot ol koen we i talem sam long ol tresa we gospel i bin givim long yu mo putum olgeta insaed long bokis. Luk ol tresa long bokis plante taem blong rimaenem yuhan long ol blesing blong gospel.



Ples we Jos i bin Oganaes



I Kam long Jan Pinborog
Ol Magasin blong Jos

*Kam wetem mifala blong save
moa abaot wan ples we i im-
poten long histri blong Jos!*



longwe wetem famle Witma long yia 1829. Fasfala haos we i bin stap long ples ia i nomo stap naoia, be smol wud haos ia i stap long sem ples.


Jos bilding we Magi mo Lili, tufala i go long jos long hem, i gat wan senta blong ol visita we oli putum, blong ol man oli luk hom blong ol Witma mo ol spesel samting we i bin hapen longwe. ■

1. Josef Smit i bin finisim transletem
Buk blong Momon long ples ia.





2. Aotsaed, i no longwe long haos, tri man i bin luk enjel Moronae mo ol gol plet. Oli singaotem Ol Tri Witnes from oli bin witnesem, o oli bin luk ol buk ia. Yu save luk ol testemoni blong olgeta long fored blong Buk blong Momon.



3. Long 6 Epril 1830, kolosap 60 pipol i bin kam long wan spesel miting. Josef Smit i bin oganaesem Jos mo mekem i ofisol, mo oli bin blesem mo pasem sakramen. Hemia i bin fas sakramen miting!

BAPTAES LONG TAEM BIFO MO LONG TAEM NAOIA

Magi, 11 yia, mo Lili, 9 yia, tufala i bin baptaes long wan ples blong baptaes kolosap long ples we fas memba blong Jos i bin baptaes long hem.

Tugeta tufala gel i bin glad tumas blong kasem baptaes. Taem i kam long taem blong Lili blong kasem baptaes, hem i bin gat wan intaviu wetem bisop blong hem. "Hem i bin askem mi sapos mi gat wan testemoni blong profet mo sapos mi bin stap pem taeting blong mi," Lili i talem.

Tufala gel tugeta i bin gat ol gudfala memori abaot ol dei blong baptaes blong tufala. "Taem mi bin kamaot long wota, mi bin gat wan filing se mi no save mekem wan samting," Magi i talem.

Tugeta gel i bin gat ol jenol mekem se tufala i save rekodem ol filing blong tufala abaot ol spesel dei ia.



4. Stret afta long miting ia, papa mo mama blong Josef Smit mo sam nara pipol oli bin kasem baptaes aotsaed.

Maks mo Maea I Sevem Dei

I Kam long Kris Diva, Teksas, YSA



Maks i bin rere blong pleplei supahiro. Hem i putum red tisot blong hem. Hem i putum hat blong hem blong supahiro. Afta hem i go long rum blong smol sista blong hem.

“Ale! Kam, Maea!” Maks i talem. “Yumitu go sevem dei ia!”



Maks mo Maea i bin go long salong. Tufala i bin luk wan basket i fulap long ol klos.

“Bae yu helpem mi?” Mama i askem.

“Okei,” Maks i talem. “Afta yumi save go sevem dei ia.”




Maks mo Maea i bin helpem Mama blong foldem evri klos mo go putum olgeta.

Afta Maks i luk sam toti long floa. “Yumitu pikmap evri toti,” Maks i talem. “Afta yumi save go sevem dei ia.”

Maks mo Maea i ron raon long haos.
Tufala i sakemaot evri doti we tufala
i save faenem.

Tufala i bin luk Mama i stap
brum long kitjin. "Mitufala i save
helpem yu," Maks i talem.

Maea i holem samting
blong karemaot doti mo
Maks i brum.



"Naoia yumi go sevem
dei ia," Maks i talem.

Mama i luk raon long
klin haos. Afta hem i
haggem Maks mo Maea.
"Mi ting se yu mekem
finis!" ■



JISAS I WOKBAOT ANTAP LONG WOTA

“Be taem ol man blong hem oli luk hem, we i stap wokbaot i kam, oli fraet tumas, oli talem se, “Hemia wan devel ya.” Mo oli stap singaot, from we oli fraet tumas.

“Be wantaem nomo, Jisas i talem long olgeta se, “Yufala i no harem nogud. Mi nomo ya. Yufala i no fraet.” (Matiu 14:26–27).

OL NIUS BLONG JOS

Visitim news.lds.org blong kasem moa nius mo samting we i hapan insaed long Jos.

Wol Lidasip Trening—Wan Niufala Fasin blong Tij



Elda L. Tom Peri,

Elda Donal L.

Holstrom, mo

Bisop Din M.

**Devis, oli lidim
wan panel tok-
tok long olsem
wanem i impo-
ten blong yusum
ol prishud ki.**

Long ol manis we oli stap kam, ol memba blong Jos raon long wol bae oli tekempat long wan tabu mo niufala fasin blong tij long Wol Lidasip Trening.

Hemia i no semmak long ol trening miting blong fastaem, Wol Lidasip Trening blong yia ia bae i no brodkas wan taem nomo long ol wod mo stek lida. Be, oli seperetem long naen sot pat—long wan DVD mo long LDS.org—we i leftemap tingting blong evri lida, ol memba, mo ol famle blong toktok raon long olgeta truaot long yia ia mo afta tu.

Tingting blong trening ia hem i “Mekem Famle mo Jos I Kam Strong Moa Tru long Prishud.” Long trening ia, ol memba blong Fas Presidensi mo Kworom blong Olgeta Twelef Aposol, wetem ol nara Jeneral Atoriti mo jeneral ofisa, oli givim ol tabu tijing long:

- Olsem wanem ol famle oli save faenem paoa mo pis tru long paoa blong prishud.
- Olsem wanem blong helpem evri famle blong eksperiensem ol blesing blong prishud.
- Olsem wanem olgeta we oli gat ol prishud ki, oli mekem ol hom mo ol famle oli kam strong moa.
- Olsem wanem blong tij long ol wei olsem hemia blong Kraes.
- Olsem wanem blong lukaotem mo tijim ol pikinini long laet mo trutok.

Evri yunit blong Jos bae i kasem ol kopi blong DVD, mo oli askem ol wod mo stek kaonsel blong luk fulwan. Afta oli mas kaonsel tugeta long olsem wanem blong helpem ol memba blong wod mo stek blong save kasem samting aot long ol trening ia.

Long ol miting mo ol klas, ol memba oli save lukluk mo toktok raon long wanwan pat blong DVD ia. Ol famle mo wanwan man mo woman i save lukluk ol pat ia, wetem sam moa tul blong helpem stadi blong olgeta moa, long wwlt.lds.org.

Long evri ples, pat we i moa impoten long trening ia, bae i hapan afta we wan pat i ova mo fasin blong toktok raon i stat. Taem ol lida, ol memba, mo ol famle oli stap tingting hevi, oli serem, mo oli testifae long wanem oli bin harem mo filim, Tabu Spirit bae i givim inperesem long olgeta mo tijim olgeta long olsem wanem blong yusum instraksen ia long ol situesen blong olgetawan. Tru long ol eksperiens ia, Wol Lidasip Trening ia bae i helpem mekem famle mo Jos raon long wol i kam strong moa. ■

Taem oli stanap aotsaed long haos blong Meri Filding Smit, insaed long pak ia we nem blong hem i Ples la Nao, Elda M. Rasel Balad, Linda K. Beton, Elda Ronal A. Rasban, Ilein S. Dalton, Rosmeri M. Wiksom, mo Bisop Geri E. Stivenson oli toktok raon long ol blesing blong stap gat prishud insaed long evri hom.



STAP ANSA LONG SINGAOT IA BLONG GAT MOA MISINARI:

Leftemap Tingting ia, Insaed long Hom mo long Jos, blong Kam Wan Misinari

I Kam long Heta Witel Rigli

Ol Nius mo Samting we I Hapen Insaed long Jos

Bisop Vikto Nogales blong Parkwe Jakabuko Wod, Buenos Aires, Ajentina Kongreso Stek, i sidaon long fored blong wan notisbod we i fulap long ol pikja blong 37 yang man mo woman blong wod blong hem. Taem wan long olgeta i go long wan misin, hem i putum wan not long saed blong pikja ia.

“Ol yang pipol blong mi oli glad tumas taem oli kam long ofis blong mi mo luk ol pikja mo ol not,” hem i talem. “I pusum olgeta blong rere from ol misin blong olgetawan.”

Wod ia long Buenos Aires i spesel from hem i stap olsem eksampol ia blong spirit blong misinari wok. Long ol fas sikis manis blong yia 2012, 19 yut—14 long olgeta oli konvet—mo livim ol hom blong olgeta blong go long ol fultaem misin long eit kantri. Bitim 80 pesen long ol yut we oli save go long wan misin, oli bin komitim olgeta blong go long misin.

Long ol yia we oli jes pas, ol lida blong Jos oli bin mekem sam rikwes blong i mas gat moa yang pipol blong givim seves mo go long misin.

Long Epril 2005 jeneral konfrens, i no longtaem afta we Jos i rilisim *Prijim Gospel blong Mi: Wan Gaed long Misinari Seves*, Elda M. Rasel Balad blong Kworom blong Olgeta Twelef Aposol i bin givim kaonsel

long ol famle mo lida blong lefemap tingting blong gat wan misinari spirit mo mekem moa yang man mo yang woman oli rere blong givim seves wetem ona taem ol famle mo lida ia oli helpem olgeta oli andastanem huia olgeta mo taem oli tijim doktrin long ol yangfala ia (luk long “One More,” *Liahona*, Mei 2005, 69).

Anaonsmen blong Presiden Tomas S. Monson long Oktoba 2012 jeneral konfrens se yia blong ol misinari blong save go long misin i go daon olsem blong rimaenem bakegen nomo se Lod i stap muvum kwik wok blong Hem.

Tedei plante famle mo lida blong Jos oli tekem ol mesej ia insaed long hat blong olgeta mo putum wan gud praktis blong misinari seves long ol eria blong olgeta.

Stap Helpem Ol Yut blong Oli Andastanem Huia Olgeta

Long ansa blong kwestin ia: “Olsem wanem yu bin mekem blong rere plante yut blong yu blong wantem givim seves long misin?” Bisop Nogales i bin ansa: “Taem oli bin singaotem mi olsem bisop, fas samting mi wari long hem, i bin ol yang pipol blong wod blong mi, mo mi bin mekem i klia long ol narafala lida blong wod se mifala i nidim blong kam pat blong laef blong olgeta.”

Eksampol, evri misinari blong Jakabuko oli bin gat ol koling long wod blong olgeta bifo oli go. Plante taem, oli bin invaetem ol niu konvet mo lesaktiv memba blong givim seves olsem ol tija, we i bin helpem olgeta blong tijim gospel.

Bisop Nogales i arenjem tu blong ol yut oli rere long saed blong spirit blong go long wan misin taem oli bin wok wetem ol lokol fultaem misinari.

Taem ol lokol lida mo memba blong Jos oli bin komitim olgetawan long ol yut blong wod, oli bin kasem riwod taem oli luk misinari spirit i stap gro bigwan.

Famle we I Gat Strong Tingting long Misinari Wok

Gat mo Elois Andrus blong Drepa, Yuta, YSA, oli save wanem i minim blong gat famle we i gat strong tingting long misinari wok. Oli gat 17 apuboe we oli bin go long misin, mo tufala i bin go long sikis misin.

Blong lefemap tingting blong gat wan spirit blong misinari wok insaed long famle blong yu, i wan samting we i stat taem ol pikinini oli yang, Brata Andrus i talem.

Sista Andrus i bin agri: “Yu no tokbaot, ‘blong go long wan misin,’ olsem wan kwaet hop, be yu tokbaot blong go long misin long ol pikinini mo ol apupikinini blong yu olsem se, hemia, i no wan kwestin—yu talem: *taem* bae yu go long misin blong yu, be i no *sapos*, yu go long misin blong yu.”

Blong stap tijim ol yut huia olgeta taem yu setem wan eksampol blong misinari seves, i impoten tu. Brata mo Sista Andrus oli bin akseptem fas koling blong olgeta long 1980, stret long taem we las bon boe blong tufala i stap aot i go long misin blong hem.



Bisop Vikto Nogales i stanap long notisbod we i soem evri yut blong wod blong hem, wetem olgeta we oli stap givim seves naoia long misin.

Wan apuboe i bin raet long olgeta afta we hem i kasem wan presen we tufala i bin sendem blong hem i rere from misin blong hem. “Hem i bin talem tangkyu long mifala [from presen ia], be hem i talem, ‘Moa impoten i blong talem tangkyu from eksampol we yutufala i bin soem,’” Sista Andrus i bin talem.

Stap Tijim Doktrin

“Ol yut blong yumi oli gat raet blong ting se papa mo mama blong olgeta, mo ol lida mo ol tija blong olgeta long Jos bae oli luk se oli save mo andastanem gospel blong Jisas Kraes,” Elda Balad i talem. “Tabu Spirit bae i konfemem trutok long hat blong olgeta mo Spirit ia bae i laetem Laet blong Kraes insaed long sol blong olgeta. Mo afta, bae yu gat *wan moa misinari we i rere fulwan*” (M. Russell Ballard, “One More,” 71).

Samples 9,600 km longwe long

Buenos Aeres, rural branj blong Hos-sus Ben kolosap Boas, Aedaho, YSA, i bin luk namba blong misinari wok i kam antap bigwan taem ol famle mo lida oli bin traehad blong wokhad moa blong tijim gospel long ol yut blong olgeta.

Long wan smol branj blong 75 memba, naen yang pipol oli go long misin.

Elda Rasel M. Nelson blong Kworom blong Olgeta Twelef Aposol i bin tokbaot bigwan ol risen mo ol riwod blong go long wan misin. “Evri misinari . . . oli givim seves wetem wan hop ia nomo blong mekem laef blong ol nara pipol i moa gud,” hem i talem. “Desisen ia blong go long wan misin bae i jenism laef long saed blong spirit, blong wan misinari, hasban o waef blong hem, mo laen blong tufala blong ol jeneresen we oli stap kam. Wan strong

tingting blong wantem givim seves i kamaot tru long fasin blong jenism laef fulwan, stap klin inaf, mo fasin blong stap rere” (“Ask the Missionaries! They Can Help You!” *Liahona*, Nov. 2012, 18).

Matin Woka, presiden blong Emet Aedaho Stek, i bin agri. “Blong stap givim seves long wan misin, i putum wan yang man o woman long wan rod we bae i lidim laef blong ol jeneresen,” hem i talem. “Olsem wan stek, yumi mekem evri samting we yumi save mekem, blong rere ol yang pipol from misinari wok.”

Pat blong fasin blong mekem ol yut oli rere, i gat tu blong tijim doktrin long ol yut. Ol yut long Hos-sus Ben Branj i save go long klas blong fasin blong stap rere olsem wan misinari evri wilk we wan foma misin presiden i stap tijim—trening ia i givhan long misinari trening we i kam long stek miting blong rere long ol misinari we i tekem ples evri manus, mo trening we i kam long Kamp blong Aronik Prishud wan taem long wan yia.

LaRen Adam—wan long ol sikis pikinini blong Brata mo Sista Andru—i bin givim seves long saed blong hasban blong hem, Jim, long Kopenhagen Denmak Misin stat long 2007 kasem 2009. Hem i bin testifae long olsem wanem i impoten blong tijim gospel long ol pikinini insaed long hom.

“Wan long ol bigfala samting we yu save mekem blong helpem ol pikinini blong yu blong bildimap wan testemoni blong misinari wok, i blong gat famle haos naet mo famle skripja stadi,” hem i talem. “Sapos yu givim olgeta ol stamba fandesen ia blong gospel stadi mo save ia long gospel, oli rere moa gud mo save moa gud moa abaot gospel.” ■

Ol Yang Jos Seves Misinari Oli Faenem Glad long Seves

I Kam long Karolin Kata

Ol Nius mo Samting we I Hapen Insaed long Jos

Elda Ernesto Sarabia i bin werem wan blak misinari baj evri dei long misin blong hem. Be wok blong hem long misin i bin spesel moa long plante narawan—Elda Sarabia i bin givim seves olsem wan yang Jos seves misinari (YJSM) long Meksiko Hemosilo Misin Ofis.

"Mifala i luksave se bae i no waes blong sam yang man mo yang woman blong yumi blong eksperiensem sik long saed blong bodi mo tingting mo ol jalenn blong wan fultaem misin," Elda M. Rasel Balad blong Kworom blong Olgeta

Twelef Apostol i bin talem. Be hemia, hem i talem, i no minim se oli no save tekempat long ol blesing blong misinari wok ("One More," *Liahona*, Mei 2005, 69).

Elda Rasel M. Nelson blong Kworom blong Olgeta Twelef Apostol i bin talem, "Wan misin i wan wok we man i

glad blong mekem olsem wan seves i go long God mo ol man long wol" ("Ask the Missionaries! They Can Help You!" *Liahona*, Nov. 2012, 18), mo i gat plante wei blong givim seves ia.

Blong olgeta we oli talem olgeta se, wetem ona bae oli no nid blong go long wan fultaem misin, o blong olgeta we oli mas gobak hom eli, YJSM program i save givim wan misin eksperiens we i gat bigfala mining.

Ol Samting we I Nid blong Gat mo Mekem blong Givim Seves ia

Ol YJSM oli mas fit long saed blong bodi, tingting, spirit mo long saed blong filing blong save mekem ol diuti blong koling blong olgeta we i go stret wetem olgeta.

Ol wok blong YJSM i save stap blong 6 kasem 24 manis, mo i save stap blong mekem wok blong sam dei nomo long wan wik i go kasem blong wok fultaem. I gat ol janis blong givim seves long komiuniti, mo tu, long hom. Ol mein wok blong YJSM i gat wok blong lukao-tem famle histri, infomesen teknoloji, misin ofis asisten, help long ol stoa haos blong bisop, mo samfala moa bakegen.

Famle mo Prishud Sapot

Ol papa mo mama, ol prishud lida, mo ol Memba blong Jos oli save helpem ol YJSM blong rere blong go long misin.

Famle blong Sista Elisa Joe Yang

i bin wan strong sapot long hem, taem oli draevem hem i go mo kam-bak long ol ofis blong Jos long Sidni, Ostrelia.

Elda Maekel Hilam, we i wok long Hong Kong Distribusen Senta, i bin talem, "Ol eli moning seminari tija mo ol Yang Man lida blong mi oli bin help mekem mi rere."

Sakrifaes I Givim Ol Blessing

Sista Yang i bin sakrifaesem ol dei we hem i no wok long pat taem wok blong hem blong givim seves olsem wan Jos-Seves Misin. Hem i bin talem, "Mi filim kolosap moa long Papa blong mi long Heven, taem mi save se mi stap helpem Hem."

Antap long ol blesing long saed blong spirit, blong wok long olsem wan Jos-seves misin, i givim ol yang misinari ol gud sosol mo profesonal janis. "Misin blong mi i soem mi se mi save wok long ol wok we mi no nidim spesel asisten," Sista Yang i talem. (Hem i bin wok fastaem long ol wok we oli stap asistim hem nomo.)

Nomata i no evri yang adalt we oli laekem blong givim seves, oli save mekem, be i bin gat bigfala wok blong save tekem evri yang adalt we oli klin inaf. Ol yang man mo woman we oli laekem blong givim seves long wei ia, oli save toktok long ol bisop o branj presiden blong olgeta, we oli save faenem ol stret janis blong olgeta.

Rid moa long news_lds.org taem yu lukaotem "young church-service missionaries." ■



Ol Yang Woman mo Rilif Sosaeti Jeneral Lida Oli Tua long Eria blong Esia

I Kam long Brenda Fransen, Media spesialis blong Eria blong Esia

Wetem ol kontribusen we oli kam long Deved O Hips, Pol Stivens, mo Linda Rae Pon Smit

Blong naen dei long Novemba 2012, Meri N. Kuk, fas kaonsela long Yang Woman jeneral presidensi, Linda S. Riva, seken kaonsela long Rilif Sosaeti jeneral presidensi, i bin tijim mo givim inspiresen long ol sista, yangfala mo olfala, raon long Eria blong Esia.

Trip ia i bin hapen long sem taem we oli bin anaonsem niufala yut kurikulum, *Kam, Folem Mi*, we Ol Yang man, Yang Woman, mo yut Sandei Skul klas bae oli stat yusum long Jenuware 2013. Niufala kurikulum ia, oli mekem blong helpem ol tija blong tij moa olsem Sevya i bin mekem, mo developem ol strong rilesensip wetem ol memba blong klas.

Folem visit blong Sista Kuk mo Sista Riva long Eria blong Esia, plante yut blong Esia mo ol papa mo mama blong olgeta oli ting se naoia oli kam moa strong blong klinim gud mo lukluk bakegen long ol laef blong olgeta, mo kam ol

*Long Taiwan,
Meri N. Kuk mo
Linda S. Riva i
mitim ol eria
atoriti mo ol
prishud lida mo
memba blong
Taiwan.*



FOTO I KAM LONG YANG JIE-WEN

eksampol long ol lokol komiuniti blong olgeta.

Long Hong Kong, Sista Riva i bin promesem ol yut: "Sapos bae yu stap klin long laef blong yu, yu save stanap wetem tras long fored blong eniwan!"


Tru long ol toktok blong hem, 12 yia Tang Kak Kei i bin mekem toktok ia afta long miting: "Mi save se mi nidim blong ridim Buk blong Momon evri dei. Blong stap lanem blong sakem sin mo laef long stret mo gud fasin i wanem buk ia, *Blong Ol Yut Oli Kam Strong* i bin tijim mi blong mekem, blong Laet blong Kraes mo tru hapines i save fulumap mi."

Long India, Sista Kuk i bin mit wetem ol memba long niu mitinghaos long Jenai India Distrik mo wetem ol memba blong niu Haederabad India Stek mo talem long ol yang adalt blong rere from fiuja. "Kwalifaem yufala wan long saed blong edukesen," hem i talem strong, "wetem ol skil blong helpem yufala blong bildimap kingdom. Lukluk moa long famle blong yufala mo wanem yufala i save mekem blong blesem ol memba blong famle blong yufala, mo long fasin blong yufala blong rere long saed blong spirit mekem se bae yufala i save stap klin inaf blong save filim spirit, mo olsem ia nao bae yufala i save wea blong go mo wanem blong mekem."

Long Indonesia, Sista Riva i bin tekempat long fas stek konfrens blong niu Surakarta Indonesia Stek. "Mifala i bin filim hat blong olgeta we i stap daon mo ol spirit blong lav blong olgeta. Oli bin ol fetful memba!" Hem i talem.

Afta Sista Riva i bin visitim Malesia, longwe hem i toktok raon wetem wan grup blong ol Rilif Sosaeti sista abaot wan impoten topik blong Rilif Sosaeti olsem wan oganaesesen long Malesia mo olsem wanem Jos i save givim help mo inspiresen.

Long Taiwan, Sista Riva i bin tokbaot paoa mo dedikesen blong ol lokol memba. Hem i talem: "Mifala i glad tumas blong save abaot ol fetful laef blong olgeta mo olsem wanem oli stap go oltaem long tempol. . . . Ol memba oli eksampol blong lav long ol fren mo neiba blong olgeta." ■



**Oi yut raon long wol
oli stap soem olsem wanem
oli stap stanap long ol tabu ples.**

Singaot blong Oi Foto blong Yut

Stamba Toktok blong Miutuol blong yia ia hem i "Stanap long ol tabu ples mo no muvmuv" (luk long D&C 87:8). Ol yang man mo ol yang woman. *Liahona* i stap lukaotem ol foto blong yufala taem yufala i stap stanap long ol tabu ples. Ol foto ia oli save soem yufala i stap spendem taem wetem famle, stap givim seves, mekem misinari wok, stap mekem art, stap stadi long gospel, stadi long envaeromen, mo sam moa! Hemia olsem wanem blong sendem foto blong yufala:

- Mekem wan i tekem wan foto blong yu we yu stap stanap long wan tabu ples.
- Imelem foto we i hae kwaliti foto i go long liahona@ldschurch.org.
- Putum wan mesej we i talem from wanem hem i wan tabu ples long yu.
- Long imel blong yu, plis putum ful nem blong yu, deit we yu bon long hem, nem blong wod mo stek (o branj mo distrik), mo wan imel adres blong papa mo mama blong yu.

Ol foto blong yut raon long wol bae oli kamaot long nekis namba blong *Liahona*.

Aposol I Visitim Moroko

Long Disemba 2012, afta we oli krieten namba 3000 stek blong Jos long Siera Leone long Wes Afrika, Elda Jefri R. Holan

blong Kworom blong Olgeta Twelef Aposol i bin mekem wan spesel visit long wan branj blong Jos long Rabat, Moroko we i smol mo stap hemwan.

Long wan spesel Sandei naet divosen, Elda Holan i bin serem lav we ol lida blong Jos oli gat long evri memba blong Jos raon long wol, nomata sapos i gat smol nomo o sapos oli stap longwe.

"Oli no fogetem yufala, mo yufala i pat blong wan bigfala wok olsem we Lod i talem mo from kambak blong Isrel long las dei ia i stap hapen kwik," hem i talem.

Oli Dediketem Tegusigalpa Honduras Tempol

Long Sande 17 Maj 2013, folem wan kalja selebresen mo tri wi open haos, Tegusigalpa Honduras Tempol oli bin dediketem long tri sesen, we oli bin brodkastem i go long evri Jos yunit long Honduras mo Nikaragua.

Ol memba blong Honduras, we oli bin travel, olsem oltaem, blong sam aoa i go long Guatemala Siti Guatemala Tempol, oli glad blong luk fas tempol long kantri blong olgeta we oli dediketem. Fas Presidensi i bin anaonsem fas taem long wan leta we deit blong hem i 9 Jun 2006, mo oli bin brekem graon long ples blong bildim tempol long 12 Septemba 2009.

Presiden Monson I Visitim Jemani

Let long 2012, Presiden Tomas S. Monson i bin travel i go long Jemani blong mit wetem ol memba blong Jos long Hambeg, Belin, Munik, mo Frankfet, Jemani, mo blong askem strong long olgeta blong folem Jisas Kraes.

Hem i bin talem long ol memba blong Frankfet: "Hem i bin tijim fasin blong fogiv taem hem i bin stap fogivim man, Hem i bin tijim fasin blong gat sore mo lav taem Hem i gat sore mo lav. Hem i bin tijim divosen taem Hem i givim Hemwan."

Tabu Spirit I Stap Tijim Mi

Stat long taem we famle blong mi i bin joenem Jos, mi bin stap luk paoa we i kam taem wan i ridim *Liahona*. Hem i tru long ol dip toktok ia nao we i givim insperesen long mi blong go long wan misin. Plante topik, oli toktok raon long olgeta insaed long magasin ia, be wanem we i moa impoten long mi, i wanem we Tabu Spirit i stap tijim mi evri taem we mi ridim. Mo tu, bae yumi save fri—iven long "long ples blong enemi" (luk long Boed K. Peka, "How to Survive in Enemy Territory, *Liahona*, Okt. 2012, 24)—taem yumi stadi, rid, mo yusum ol prinsipol we oli tijim. Sevya i laef, prishud i stap long wol, mo God i stap long ol heven.

Niuton T. Seniange, Yuganda

Ol koreksen

Oktoba 2012 *Liahona* i bin putum ol rong foto long stori blong "Fas Stek long India I Oganaes" long ol pej 76–77. Sista Gladis Wig i bin tekem ol foto. Mifala i talem sore from mistek ia.

Long Disemba 2012 *Liahona*, Famle blong Vijil, we oli tokbaot long stori ia "Sacred Transformations" long ol pej 36, i bin baptaes long Julae 2010, be i no Jun 2011. Mo tu, Andria Vijil i bin bon long Julae, be i no Ogis, 2012.

Insaed long *Teachings of Presidents of the Church: Lorenzo Snow*, oli bin rong blong raet long pikja long pej 2. Hem i wan pikja blong boe blong President Snow, Oliver Goddard Snow. Mo tu, long ol pej 28, i nidim blong switjim nem blong Brigham Young Jr. mo Francis M. Lyman we i stap long braket ()�.

STAP DRING LONG WEL

I Kam long Aron L. Wes

Edita, Jos Printing Seves

Taem yumi tokbaot ol samting we i naes long ol tempol, yumi tokbaot ol sap poen antap long tempol, ol windo, mo ol peinting. Yumi tokbaot wetem fasin blong stap revren ol ples blong baptaes, ol rum blong endaomen, mo ol celestial rum.

Be taem wan profet i dediketem wan tempol i go long Lod, hem i dediketem ful biling ia, i no pat nomo we i naes we ol man i luke save. Long prea blong dedikesen blong Kansas Siti Misuri Tempol, Presiden Tomas S. Monson i bin talem: “Yumi dediketem graon ia we tempol i stanap long hem. Yumi dediketem evri pat blong naesfala biling ia, stat long faonden blong biling we mifala i no save luk i go kasem bigfala statu blong Moronae we i stap long en blong sap poen.”¹ Taem Presiden Josef Fielding Smit i bin givimaot dedikesen prea long Ogden Yuta Tempol, hem i bin dediketem “ol fandesen, ol wol, ol floa, ol siling, taoa antap, mo ol nara pat blong biling ia,” mo hem i bin prea from proteksen blong “evri samting we i mekem biling i wok olsem ol laet mo ol fenija, ol fan sistem mo ileveta, mo evri samting we i stap insaed long biling ia.”²

Mi talem tangkyu we Lod i givim inspisen long ol profet blong Hem blong dediketem evri pat blong evri tempol. Nomata sapos hem i wan inj blong doa o wan smol fenija



*Jisas Kraes i wel
blong wota we
i givim laef.*

we i no impoten olsem wan olta long wan siling rum, ol smol pis samting ia i mekem tempol i save kasem stamba tingting blong hem we i blong mekem yumi save kam olsem wan god.

Wan long ol pis we i no impoten ia, i bin helpem mi blong lanem wan lesen we bae i stap wetem mi oltaem. Mi bin stap long Sol Lek Tempol wan dei, mi rere blong aot long rum blong jenis afta we mi bin mekem wan odinens blong wan we i ded finis. Mi luk wan ples blong dring wota, mo mi luksave se mi tosta, mekem se mi bendaon blong dring kwik. Wan mesej i kam long maen blong mi:

*Yu dring wota ia long tempol, be yu bin
dring gud long wota blong laef we i stap long
ples ia?*


Hem i no wan kwestin blong mekem mi harrem nogud o spolem mi—be wan kwaet fasin blong tok strong long mi mo wan kwestin we i kasem gud sol blong mi.

Ansa blong mi long kwestin ia i bin, no. Mi no bin dring gud wota blong laef we i stap long tempol. Mi mas talem tru se maen blong mi i bin go aot smol taem mi stap mekem ol odinens blong ol dedman. Nomata mi bin mekem gud wok blong ol pipol we oli nidim help blong mi, mi no bin letem miwan blong kasem evri help we mi nidim.

Naoia, evri taem we mi go long tempol, mi lukaotem wan ples blong dring wota mo stop blong mi mas dring wota. Mi askem miwan se mi dring wota ia blong laef i dip olsem wanem. Ansa blong mi: I no dip inaf yet. Be tosta blong mi i stap kam bigwan moa. ■

OL NOT


1. Tomas S. Monson, insaed long “Kansas City Missouri Temple: ‘Beacon of Divine Light’—an Offering of Hands and Hearts,” *Church News*, 12 Mei 2012, ldschurchnews.com.
2. Joseph Fielding Smith, insaed long “Ogden Temple Dedicatory Prayer,” *Ensign*, 12 Maj 1972.



PIKIA | KAM LONG ROBERT T. BARET

WILFOD WUDROF

Wilfod Wodruf i bin go long misin blong Inglan long ol yia 1840. From se-
ves blong hem, moa long 1,000 pipol i bin **baptaes**. Afta long hemia, Wilfod
Wodruf i bin stap olsem presiden blong **Sent Joj Yuta Tempol**. Olsem Pre-
siden blong Jos, hem i bin toktok plante blong mekem **Yuta** i kam wan stet.
Hem i bin kasem tu revelesen mo i raetem toktok **Ofisol Toktok 1** we i talem
long ol Sent blong stopem praktis blong poligami (fasin blong gat plante waef).



Ol Akta oli mekem ol sot film
abaot laef blong Jisas Kraes
blong ol vidio long intanet we
i stap long biblevideos_lds.org; sam pat
blong las wik blong laef blong Sevya
i stap long pepa ia long pej 26. Long
“Misin mo Ministri blong Jisas Kraes”
(pej 18), Elda Rasel M. Nelson i tijim
fo poen blong ministri blong Sevya we
yumi save folem long laef blong yumi.